

**EXAMEN D'UNE
APOLOGIE QUI A
ESTÉ FAITE POUR
SERUIR DE
DEFENSE À VN...**







VII. 11. 30.

K.6?

EXAMEN

D'VNE APOLOGIE
 qui a esté faite pour servir de
 defense à vn petit liure intitulé,
 Le Chapelet secret du tres-sainct
 Sacrement : Et pour refuter
 quelques remarques qui auoient
 esté faites sur ledit Chapelet.



A PARIS.

M. DC. XXXIV.

EXAMEN

DE
HET
NATUUR-
KUNDE-
WETEN-
SCHAAP
IN
HET
JAAR
1811



1811

1811

LE CHAPPELET SECRET


du tres-sainct Sacrement.

- 1 Saincteté à Iesus Christ, au tres-sainct Sacrement.
- 2 Verité à I. C.
- 3 Liberté à I. C.
- 4 Existence à I. C.
- 5 Suffisance à I. C.
- 6 Satiété à I. C.
- 7 Plenitude à I. C.
- 8 Eminence à I. C.
- 9 Possession à I. C.
- 10 Regne à I. C.
- 11 Inaccessibilité à I. C.
- 12 Incomprehensibilité à I. C.
- 13 Independance à I. C.
- 14 Incommunicabilité à I. C.
- 15 Illimitation à I. C.
- 16 Innapplication à I. C.

Au tres-sainct Sacrement.



PENSEES SVR LESDITS ATTRIBUTS.

1.  **A**INCTETE'. *Afin que Iesus Christ soit au tres-sainct Sacrement en sorte, qu'il ne sorte point de soy mesme, c'est à dire, que la société qu'il veut auoir avec les hommes, soit d'une maniere separée d'eux, & residente en luy mesme, n'estant pas raisonnable qu'il s'approche de nous qui ne sommes que peché, & mesme en l'estat de la grace il n'y a rien en nous digne de la sainteté de Dieu; de façon que nous deurions dire au tres-sainct Sacrement, ce que S. Pierre disoit à Iesus Christ, Retirez vous de nous Seigneur, car*

nous sommes pecheurs.

2. VERITE'. Afin que Iesus Christ se traicte luy mesme selon ses grandeurs, qu'il soit dans tout ce qui luy appartient, que les ames aillent à luy dans ceste verité, c'est à dire, par luy mesme, sans agir par leur estre créé; parce que les bornes des ames sont opposees à ceste verité, laquelle se doit regarder en Dieu, comme infinité de grandeur.

3. LIBERTE'. Afin que Iesus Christ ne depende plus que de luy mesme, en ce que sa misericorde luy a donné des regles, & des pensees d'accommodement aux hommes, vouloir que son estre soit le principe de tous ses mouuemens, & que comme il est de soy mesme, il est aussi pour soy mesme, & dans ceste pensee renoncer à toutes les promesses de Dieu, entant que promesses qui semblent porter engagement, &

ne les vouloir recevoir que cōme partā^s
du mouuement libre de Iesus Christ.

4. **EXISTENCE.** Afin que Iesus
Christ s'establisſe dans tout ce que les
ames ſont, qu'il ne ſouffre point la
ſubſiſtance de la creature, qu'il ſoit
tout ce qu'il doit eſtre, & face diſpa-
roître tout autre eſtre, comme le Soleil
efface toute autre lumiere, qu'il ſoit
pour eſtre, & que la fin de ſon eſtabliſ-
ſement ſoit pour luy, & non pour l'a-
uantage de l'ame qui le porte.

5. **SUFFISANCE.** Afin que Iesus
Christ prenne en ſoy meſme tout ce
qui eſt deub à vne capacité, à vne di-
gnité & grandeur infinie comme la
ſienne, qu'il ne ſoit point en indigence
au regard des hommes qui ne luy ren-
dent pas ce qu'ils luy doiuent; qu'il ſoit
enrichy de ſes propres tréſors, & que
ſe repoſant dans ſon tout, il paroiſſe

glorieusement desinteressé des usages
des hommes.

6. SATIETE'. Afin que Iesus
Christ ne souffre point de delay dans
l'accomplissement de ses desseins, qu'il
donne lieu à l'instinct de son estre, qui
est de consommer tout en soy mesme,
comme le souuerain estre, qu'il demeu-
re en luy mesme qui est le pain de vie,
& qu'il ne s'engage point dans la di-
sette des hommes, pour rien desirer
d'eux, qu'il prenne rassasiement dans
le contentement diuin, & dans la veüe
de sa propre gloire.

7. PLENITUDE. Afin que Iesus
Christ ait son compte en toutes choses,
que l'effusion de ses graces retourne à
luy mesme, que la reception des ames
soit un rejallissement en luy par une
entiere reference, qu'il ne donne rien
qu'à soy mesme, & pour soy mesme,

Et ne souffre plus de dechet dans l'incapacité de la creature, qui ne peut porter qu'il soit plainement en elle.

8. EMINENCE. Afin que Iesus Christ entre en tous ses droiets, qu'il s'esleue glorieusement dans toutes ses preeminences, qu'il face une separation de grandeur entre luy & la creature, que les ames acceptent leurs bassesses en hommage à ceste grandeur, qu'il soit un Dieu, Dieu, c'est à dire, se tenant dans ses grandeurs diuines, selon lesquelles il ne peut estre dans rien moindre que luy.

9. POSSESSION. Afin que Iesus Christ s'approprie les ames, qu'il les refere à soy, que les ames releuent de luy, & prennent vie en luy, & que tous leurs usages soient les siens, en ce quelles doiuent receuoir mouuement de luy, & luy agir en elles, comme possesseur,

en suite de la possession qu'il a de luy
mesme, selon laquelle tout doit estre
possédé de luy, ains rien n'est digne de
l'estre, & il faut que les ames adorent
en Iesus Christ la possession qu'il a de
luy mesme, & qu'elles n'ayent point de
veuë s'il luy plaist les posseder ou non,
estant assez qu'il se possede luy mesme.

10. REGNE. Afin que Iesus Christ
prenne son Royaume, & qu'il demeure
dans la condition de sa nature, qui
est de regner, & de mettre toutes choses
sous ses pieds; que les creatures demeu-
rent dans l'incapacité qu'elles ont d'e-
stre comparées à Dieu, que sa magnifi-
cence soit esleuée sur tous les cieux,
qu'il soit dans le zele de sa gloire, qu'il
aneantisse toute puissance, & qu'il
face venir le sceptre de sa diuinité, esta-
blissant son regne, & faisant viure
son nom de la vie qu'il a de luy mesme,

sans qu'il soit besoin que les ames consentent à son regne.

II. INNACCESSIBILITE'. *Afin que Iesus Christ demeure en luy mesme, laissant la creature dans l'incapacité qu'elle a de l'approcher, que tout ce qu'il est n'ait point de rapport à nous, que son innaccessibilité l'empesche de sortir de soy mesme, que les ames renoncent à la rencontre de Dieu, & consentent qu'il demeure dans le lieu propre à la condition de son estre, qui est un lieu innaccessible à la creature, dans lequel il reçoit la gloire de n'estre accompagné que de son essence seule.*

12. INCOMPREHENSIBILITE'. *Afin que Iesus Christ demeure dans ses voyes, qu'il les connoisse luy seul, & qu'il ne rēde compte qu'à luy mesme des desseins qu'il prend sur ses creatures; que les ames se rendent à l'igno-*

rance, & qu'elles aiment le secret des conseils de Dieu, qu'elles renoncent à la manifestation des choses cachées en Dieu, entant qu'elles doiuent demeurer dans la seule science diuine.

13. INDEPENDANCE. Afin que Iesus Christ agisse comme premiere cause, sans assujettissement aux fins qu'il s'est donné à luy mesme, en sorte qu'encore que ce Sacrement soit un signe d'amour, il en tire, s'il veut, un effect de iustice; qu'il n'ait point d'esgard à ce que les ames meritent, mais qu'il face tout selon luy, & que les ames renoncent au pouuoir qu'elles ont d'assujettir Dieu, en ce qu'estant en grace, il leur a promis de se donner à elles; qu'elles ne fondent point leurs esperances sur cela, mais demeurent dans une bien-heureuse incertitude qui honore l'indépendance de Dieu.

14. INCOMMUNICABILITE'. *Afin que Iesus Christ ne se rabaisse point dans des communications disproportionnées à son infinie capacité ; que les ames demeurent dans l'indignité qu'elles portent d'une si diuine communication, quelles laissent leur estre à Dieu, non pas pour receuoir participation du sien, mais pour honorer l'excellence de son incommunicabilité, par la communication du peu que nous sommes, se-estimant heureusement partagées de n'auoir aucune part aux dons de Dieu pour sa ioye, qu'ils soient si grands, que nous n'en soyons pas capables.*

15. ILLIMITATION. *Afin que Iesus Christ agisse dans l'estendue diuine, qu'il ne luy importe ce qui arrive de tout ce qui est finy, qu'il ruine tout ce qui limite ses desseins, que les ames pour l'honorer dans ceste perfection,*

rompent leurs liens, qu'elles ne se tiennent pas dans leurs pensées, ny dans leurs veuës, qu'elles se precipitent dans la vastitude des desseins de Dieu, renonçant à toutes fins finies. Que Iesus Christ enferme tout en soy, & qu'il ne soit enfermé de rien, mais atteigne d'un bout à l'autre pour executer tout ce qui luy plaira.

16. INNAPPLICATION. Afin que Iesus Christ s'occupe de luy mesme, & qu'il ne donne point dans luy d'estre aux neants, qu'il n'ait esgard à rien qui se passe hors de luy, que les ames ne se presentent pas à luy pour l'objet de son application, mais plustost pour estre rebutées par la preference qu'il doit à soy mesme; qu'elles s'appliquent & se donnent à ceste innapplication de Iesus Christ, aimant mieux estre exposees à son oubly, qu'estant en

*son souuenir luy donner sujet de sortir
de l'application de soy mesme, pour
s'appliquer aux creatures.*



C E N S U R E.

NOus sous-signez Docteurs
en Theologie de la Faculté
de Paris, certifions auoir leu le pre-
sent liure qui porte tiltre de Châp-
pelet secret du tres-sainct Sacre-
ment, lequel nous auons trouué
n'estre aucunement vtile pour l'in-
struction des ames, mais au con-
traire, contenir plusieurs extraua-
gances, impertinences, erreurs,
blasphemes, & impietez, qui ten-
dent à separer, & destourner les
ames de la pratique des vertus,
specialement, de la foy, esperan-

ce, & charité ; destruire la façon de
 prier, instituée par Iesus Christ, &
 introduire des opinions contrai-
 res aux effets d'amour que Dieu
 a tesmoigné pour nous, & nom-
 mément au Sacrement de la tres-
 sainte Eucharistie, & Mystere de
 l'Incarnation ; l'auons iugé peril-
 leux & de dangereuse consequen-
 ce, digne d'estre supprimé & de-
 fendu : En tesmoignage dequoy
 nous auons signé la presente. A
 Paris au College de Sorbonne, le
 dixhuictiesme Iuin, mil six cens
 trente trois. Ainsi signé,

A. du Val. Le Clerc. Charton.
 H. Bachelier. François Hallier.
 Martin. Morel. Et N. Cornet.



A V A N T - P R O P O S D V D E F E N S E V R.

IE n'aurois pas entrepris la refutation d'un escrit faict par un Theologien que ie ne cognois point, s'il n'auroit couru long temps dans Paris parmy des personnes de qualité qui n'estant pas versees dans les choses dont il parle, en ont fait plus d'estat qu'il ne merite: car ie puis asseurer que s'estant mis en peine de chercher des erreurs où il n'y en a point, il est tombé par un iuste iugement de Dieu, dans des Ariannismes, Nestorianismes, Pelagianismes, & dans plusieurs blasphemes & impietez contre la Majesté Diuine, & les plus saincts Mysteres de l'Eglise. Ce qui m'a fait resoudre d'empescher le mal qu'il pouuoit causer à ceux
qui

qui l'ont receu pour meilleur qu'il n'est, & de restituer en mesme temps l'honneur qu'il a rauy à des veritez, que tous les Chrestiens sont obligez de reuerer, ioignant par mesme moyen dans mon action, les deux degrez de charité qui regardent Dieu, & les hommes. Je n'en ay point esté destourné par les préiugez qu'on a fait contre l'Escript que ie deffens; pource que ceux mesme qui l'ont iugé plus desauantageusement, reconnoissent auoir esté surpris par la passion de ceux qui pretendoient autre chose que d'extirper des heresies; & ayant sceu outre cela que des Theologiens celebres de deux des plus fameuses Vniuersitez, approuuent ce que ceux-là sont marris d'auoir condamné; & que quantité de personnes de merite, l'ayant considéré sans preuention d'esprit, & avec l'in-

difference necessaire pour reconnoistre
 des choses esleuées par dessus le sens &
 la raison (& d'autant plus exposées à
 la passion des hommes) confessent n'en
 auoir ressentý que des mouuemens d'ad-
 miration, & de reuerence. I'ay creü
 qu'il n'y auoit rien qui me deust empes-
 cher de rendre aux yeux du monde, à
 une doctrine establie sur la tradition
 de l'Eglise, & sur les fondemens de
 nostre Religion, ce que i'ay pensé luy
 deuoir tousiours deuant Dieu, & dans
 mon ame. Pour la bien comprendre il
 faut supposer comme vn principe ge-
 neral, que la fille ayant dessein d'exal-
 ter Iesus Christ par dessus les creatu-
 res, elle le regarde tousiours selon sa di-
 uinité, & selon ce qu'il est non dans
 les rabaissemens, où il s'est reduit vo-
 lontairement pour nous, mais dans son
 estre propre & son eminence diuine.

Et qu'au contraire elle regarde les
 hommes, non dans la condition heu-
 reuse où il les auoit mis par la premiè-
 re creation; mais dans la misere & la
 bassesse où ils sont tombez par le pe-
 ché, ce qu'elle fait pour donner gloire
 à Dieu dans sa propre grandeur, &
 dans celle du neant, & de l'indignité;
 surquoy il a versé tant de graces, &
 operé tant des merueilles: & releuer
 autant Iesus Christ par luy mesme,
 qu'il s'est humilié pour nous dans le
 saint Sacrement, luy rendant par sa
 charité comme le contr'eschange de la
 sienne. Cela estant bien remarqué, plu-
 sieurs difficultez (que la hauteſſe du
 discours de ceste fille feroit naistre dans
 les esprits de ceux qui ne sont pas ac-
 coustumez de s'entretenir avec Dieu
 par des mouuemens & des paroles si
 sublimes) disparoistront d'elles mesmes,

Et l'entreprise de ce Theologien sera
jugée moins estrange, tant en ce qu'il a
eu la presumption de combattre des
choses qu'il confesse n'entendre point,
(Et contre lesquelles il ne dit presque
rien, qui ne procede d'une grande igno-
rance) qu'en ce qu'il a bien eu le coura-
ge de s'escrimer si mal contre une fille,
Et d'attaquer publiquement celle qu'il
deuoit plustost consoler dans une affli-
ction qu'elle n'a point meritée.



EPISTRE QVI SERT
COMME D'AVANT-PROPOS
pour l'Examen.

MONSIEVR,
 Je vous remercie de m'auoir enuoyé l'Ecrit qu'on a fait pour defense à la doctrine du Chappelet secret du tres-sainct Sacrement, & puis que vous le desirez ainsi, ie vous en diray mes pensees. Cet Escrit fait deux choses, il attaque vn Theologien qui a fait des remarques contre ceste doctrine: & en l'attaquant il defend ladite doctrine, ou il essaye de le faire. Je ne m'arrestteray pas à la premiere, ny à rechercher, si c'est vn seul Theologien, ou plusieurs, qui ont fait ces remarques, & lais-

seray à ce Theologien mesme à se
 defendre, *Ætatem habet, ipse de se lo-*
quatur. Seulement ie diray qu'on
 le traite fort rudement & fort in-
 iurieusement, & que cela est peu
 conuenable à des personnes qui
 pretendent defendre & pratiquer
 la plus haute & sublime perfe-
 ction. Ie me contenteray de m'ar-
 rester à la seconde, & à vous faire
 voir que toutes les defences & ex-
 plications ne font rien pour iusti-
 fier sa doctrine, & en cela l'au-
 theur de cet Escrit reçoit ce mal-
 heur en sa cause, & me donne cet
 auantage, que sa defense mesme
 le condamne: car il est contraint
 de donner des gloses & des expli-
 cations à la doctrine, & aux pro-
 positions condamnées, si esloi-
 gnées de ce que sonnent & signi-


fient les paroles, que si ces gloses pouuoient passer pour bonnes, elles nous feroient voir vn tres-mauuais dessein qu'on auroit eu de seduire les ames, leur faisant aualer le poison & cachant l'antidote; & que ceux qui ont escrit & publié ceste doctrine, auroient fait comme Aristote disoit à Alexandre de sa Philosophie, qu'il l'auoit escrite & non escrite; escrite pour ceux à qui luy mesme en donneroient l'intelligence, & non escrite pour les autres, ainsi ces nouueaux spirituels ont publié vne doctrine, qu'il n'y a homme au monde, pour sçauant & spirituel qu'il soit, s'il n'est de leur cabale, & n'ait la clef de leur secrette intelligence, qui y puisse trouuer le sens, & la signification qu'ils y entendent,

c'est pourquoy ils ont bien raison de le nommer le Chappelet secret. Mais en cela ils sont blasrables en deux choses, en ce que leur doctrine dans l'intelligence mesme de leur cabale ne vaut rien, & est plaine d'erreurs: & quand elle se pourroit sauuer & expliquer par ladite cabale, de l'auoir publiée en des termes si peu connus, & si particuliers à eux, que de mille personnes qui la liront, à peine y en aura t'il vne qui sçache leurs secrets, & qui la puisse entendre dans le sens que cet Escrit luy donne, & encor voit-on que cet Escrit ne veut, ou n'ose pas tout expliquer. Je sçay qu'ils diront à cela que leur dessein aussi n'a pas esté de publier ceste doctrine, que ce ne sont que les pensees d'yne fille, qui ne les a es-

crites que pour elle, & pour peu de personnes, & qu'il n'y en a jamais eu que deux ou trois copies. Il faut vne grande assurance pour tenir ce langage, la question n'est pas si c'est vne fille ou vn homme qui est l'auteur de la doctrine, mais si la doctrine est bonne, ou ne l'est pas, & si elle est toute parfaite, toute diuine & admirable, comme cet Escrit le maintient, la verité du reste est assez reconnuë par quatre impressions differentes qui en ont esté faites, & par le soin qu'on sçait bien qu'ils ont pris d'en distribuer les copies en tous les lieux où ils ont peü. Si ceste assurance m'a estonné, ie n'ay pas eu moins de sujet de l'estre, sçachant qu'au. mesme temps qu'ils vouloient faire croire à plusieurs dont

ils cherchoient l'appuy & la protection, qu'ils ne prenoient pas la defense de ceste doctrine, mais la desaproouoient & cōdamnoient, en ce mesme temps ils trauailloïēt à faire des Apologies, & à chercher des Euesques & des Docteurs dedās & dehors le Royaume pour la defendre, pour l'approuuer, & pour la proteger. I'adiouste seulement à ce que le Defenseur dit en l'Auant-propos en faueur de la fille, qu'elle n'a pas meritē qu'on la traicte si mal, que c'est luy & les siens qui la traictent ainsi. Qui l'a accusee de cet Escrit qu'eux mesmes? qui l'ont fort bien sacrifiée pour se mettre à couuert, c'est cela qu'elle ne meritoit pas, & on la pourroit bien defendre plus legitimement & veritablement, en di-

sant qu'elle n'a esté que leur Secre-
taire; & si elle a failly, que ce n'a
esté que pour leur estre trop sous-
mise, & pour s'estre laissée aller
trop simplement & inconsideré-
ment dans leurs belles doctrines
& nouveautez spirituelles, encor
sçauent-ils bien en leur conscience
qu'elle y a résisté long temps, mais
venons à l'Examen de la doctrine
& de la defense.



PAROLES DE LA FILLE,
c'est ainsi que le Defenseur
les appelle.

I. PROPOSITION.

I. SAINCTETE'. *Que la Societé
que Iesus Christ veut auoir avec
les hommes, soit d'une maniere separée
d'eux, & residente en luy.*

I. OBJECTION.

Ceste façon de parler est contraire à la façon de parler de l'Escripture Saincte.

R E S P O N S E.

Il ne falloit pas se contenter d'une objection si vague & si confuse. Il falloit marquer les façons de parler de l'Escripture, ausquelles on pretend que celle-cy est contraire, mais il est impossible de produire ce qui n'est point, & le

censeur suëra beaucoup si on le presse de marquer une Escriture, qui dise que la Societé que Iesus Christ veut auoir avec nous, ne doit pas estre d'une maniere separée de nous, & residente dans luy mesme. Au contraire, ce langage est tres-sainct & tres-conforme à l'Escriture, qui dit, que Iesus Christ s'associe avec nous, en nous attirant à luy, en nous incorporant dans luy, en nous faisant sortir de nous mesmes, & qu'il ne sera dans nous qu'entant que nous serons dans luy: Car il nous remplit en nous esleuant, comme dit saint Denis, & nous oste de nostre bassesse pour nous establir dans sa grãdeur: Comme il est sorty du Pere pour venir dans le monde, il nous fait sortir de nous mesmes pour venir à luy, avec ceste difference, qu'il est sorty du Pere sans le quitter, au lieu que nous sortons de

Ioan. 6. v.

44.

Ioan. 12. v.

32.

Ioan. 15.

Luc 9. v. 13.

Ioan. 14. v.

15.

nous mesmes en nous quittant véritablement, & laissant nostre propre vie pour vivre de celle de Iesus Christ, en sorte que ce n'est plus nous qui vivons, mais Iesus Christ qui vit en nous, comme dit saint Paul.

II. OBJECTION.

Cela est unimaginable, vne societé avec les hommes separée des hommes.

R E S P O N S E.

Cela est imaginable à ceux qui mesurent les choses de Dieu par l'imagination, & non par la lumiere de la grace, qui nous apprend à ne trouver pas estrange les contrarietez apparentes qui se rencontrent dans nos mysteres, puis qu'elles ont esté establies en suite de celles qui paroissent dans le premier des mysteres, qui est celuy de l'Incarnation, duquel tous les autres pre-

nans leur origine, ils luy ressemblent & l'honorēt aussi bien en ses contrarietez, qu'en tant d'autres grandeurs qu'ils en reçoivent par dessus l'imagination des hommes; s'il falloit s'arrester à ces repugnances du sens humain, & de la bassesse de la raison, on donneroit cause gagnée à tous les Athées & impies, qui par tels argumens ont tasché de tout temps de ruiner nostre Religion, comme il appert par une infinité de tesmoignages, & encor à present par les objections populaires de nos heretiques. Mais celle-cy n'a pas besoin de cet auertissement, puis qu'elle est desia renuersee par la responce precedente. Car la Societé de Iesus Christ avec les hommes est doublement separée d'eux, premierement en ce qu'elle les separe d'eux mesmes pour les mettre dans luy: secondement, en ce que ceste separation

se fait non par leur propre esprit, mais par le sien infiniment esloigné d'eux. Tellement que les paroles de la fille sont exactement veritables, que la Societé de Iesus Christ avec les hommes est d'une maniere separée d'eux, & residente en luy. Ce qui a trompé ce Theologien, c'est qu'il n'a pas pris garde que le iuste en ce monde n'est pas un homme simplement, mais deux hommes: l'un interieur, & l'autre exterieur: l'un viel, & l'autre nouveau, selon le langage de l'Escripture Sainte, & de tous les Chrestiens, & qui n'a pas esté entierement inconnuë aux Payens mesmes. La Societé de Iesus Christ se fait avec le nouveau, & nous separe du viel; c'est à dire, de ce que nous sommes par la generatiõ d'Adam, & par nous mesmes: & nous en separe non par un simple esloignement, mais par une destruction

struction continuelle, car elle nous unit à luy en nous separant de nous mesmes & de nostre homme viel, & nous en separe en l'aneantissant, & le ruinant tous les iours, comme dit l'Escripture, dont s'ensuit qu'il n'y a nulle contradiction à dire, que la Societé de Iesus Christ avec les hommes est separée des hommes, parce que ceste union & ceste separation se rapportent à deux termes differens, c'est à dire, aux deux hommes qui sont dans nous, selon lesquels plusieurs propositions, qui semblent repugnantes, se verifient sans contrariété quelcōque; comme, Que nous sommes iustes, & que nous sommes pecheurs; Que nous sommes conformes aux volontez de Dieu, & que nous y sommes contraires; Que nous sommes une mesme chose avec luy, & que nous en sommes separez; Que nous pechons,

Et que nous ne pechons point, comme dit saint Jean; Que nous sommes rachetez Et regenerez, Et que nous attendons encore nostre redemption Et nostre regeneration, comme dit le Fils de Dieu dans l'Evangile; Que nous voulons, Et que nous ne voulons point, comme dit saint Paul; Nous devons nous aimer, Et nous haïr; nous sauuer, Et nous ruïner; nous renoncer, nous abandonner nous mesmes, comme dit l'Escripture en tant de lieux.

III. OBJECTION.

Cela destruit, & le mystere de l'Incarnation, & du saint Sacrement qui s'incorpore en nos ames.

R E S P O N S E.

Ceste objection est ridicule, Et ne procede que du peu d'intelligence de cet homme, puis que les mysteres de l'Incarnation Et du saint Sacrement ne

sont pas pour tirer les hommes hors
 d'eux mesmes, & les enter & establir
 dans Iesus Christ: Ce qui découure da-
 uantage l'ineptie du Censeur, qui ose
 dire que le saint Sacrement s'incorpo-
 re en nos ames, au lieu qu'il falloit dire
 qu'il incorpore nos ames dans luy. Car
 encor que le corps de Iesus Christ s'u-
 nisse à nos ames, il ne s'y unit pas pour
 s'incorporer en elles, mais pour les in-
 corporer dans luy, c'est à dire, pour les
 transferer dans son corps & dans son
 esprit, & les soustenir par sa vertu &
 par sa force. Comme ce seroit chose
 ridicule de dire que la greffe incorpore
 en soy l'arbre sur quoy elle est entée,
 puis qu'au contraire c'est l'arbre qui in-
 corpore la greffe en soy; il est tout à fait
 hors de raison de dire que Iesus Christ
 s'incorpore en nous, & c'est renuerser le
 langage de l'Ecriture Sainte, & des

Peres qui disent tousiours le contraire, pour signifier que Iesus Christ est la racine & le tronc qui nous porte & nous viuifie : laquelle gloire luy est rauie par le langage de cet autheur, qui par consequent ne doit pas estre souffert.

EXAMEN.

Societé & separation sont deux termes opposez l'un à l'autre, ainsi dire vne Societé separée, est comme qui diroit du blac qui est noir, du froid qui est chaud, vn iour qui est vne nuict. Le Defenseur pourtant mesprise ces difficultez, & par vne nouuelle philosophie veut accorder ces contradictions. Il dit en premier lieu, que l'vnion ou la Societé de nous avec nostre Seigneur ne se fait pas en nous, mais en luy, que c'est luy qui la fait, & non pas nous; tout cela ne fait rien

à la difficulté, que ie fois vny à
 quelqu'un, il n'importe qui m'y ait
 attaché, que ce soit luy, que ce soit
 moy ou vn tiers, i'y suis tousiours
 vny; & si i'y suis vny, ie n'en suis pas
 separé, il n'importe non plus si ce-
 ste vnion est en luy, ou en moy,
 c'est à dire, que ce soit luy qui m'ait
 attiré à luy, ou moy qui l'aye attiré
 à moy, cela ne fait aucune separa-
 tion, il est bien vray que c'est no-
 stre Seigneur qui fait ceste vnion
 en nous attirant à luy, & en nous
 separant de nos pechez, & de nos
 imperfections; mais cela ne fait
 rien pour sauuer la proposition
 qui se contredit manifestement, &
 nostre Seigneur dit bien tout le
 contraire, quand il dit, *Qui manet*
in me & ego in eo, ad eum veniemus
& mansionem apud eum faciemus.

Il dit en second lieu, qu'en nos mysteres il y paroist beaucoup de semblables repugnances & contrarietez, principalement au mystere de l'Incarnation, d'où les autres prenant leur origine luy ressemblent aussi, & l'honorent en ces contrarietez. Quand les heretiques & infideles ont fait de semblables objections sur nos mysteres, l'Eglise a tousiours maintenu qu'aux mysteres de nostre foy il n'y a aucune repugnance, & qu'ils sont bien au dessus de la raison humaine, mais non contraires à la raison; mais encor qu'il y ait des contrarietez en nos mysteres, que Dieu par sa toute-puissance, & par miracle y voulust establir & conseruer, comme il y en paroist au mystere de l'Incarnation & de

l'Eucharistie, est-ce à dire qu'il faille le souhaiter, qu'il faille demander à Dieu de semblables miracles? il est indubitable qu'une Société separée implique contradiction, ou pour le moins une contrariété manifeste; s'il y a contradiction, il est certain que Dieu ne le peut pas, non qu'il ne puisse toutes choses, mais par impuissance des choses: s'il n'y a que contrariété, il le peut par miracle. C'est donc tousiours au moins demander un miracle, & la Theologie apprend que, *Non sunt multiplicanda miracula sine necessitate*. Mais il dit en troisieme lieu, qu'il n'y a point de contrariété, parce qu'il y a deux termes differens, qu'en l'homme il y a deux hommes diuers, le viel & le nouveau, l'exterieur & l'interieur, le

terrestre & le celeste, que Dieu s'associe au celeste à l'interieur au nouveau, non à l'exterieur & au terrestre, qu'ainsi il sera associé à l'un & separé de l'autre, & consequemment Société avec les hommes separée des hommes. Il n'est pas plus heureux en ceste response qu'aux autres. Il s'agit icy d'une Société de grace, & par grace; & il est indubitable qu'elle ne se fait iamais qu'en l'homme interieur, car au mesme moment que Dieu s'associe par grace à un homme, dans ce mesme moment il le rend interieur, qui est à parler clairement luy oster le peché mortel. Souhaiter donc que la Société que Iesus Christ comme Dieu (car il le faut considerer ainsi comme ils le veulent eux mesmes) se face en l'hom-

me interieur, c'est vn souhait bien
 superflu, & peu iudicieux, puis
 qu'il se fait tousiours ainsi, & qu'il
 ne se peut faire autrement: mais
 cela n'oste pas la contrarieté de la
 proposition, car en ce que Dieu
 s'associe à l'ame, il ne s'en separe
 pas, Dieu s'associe à l'homme inte-
 rieur, nō pour se separer de l'hom-
 me interieur; il se separe de l'hom-
 me exterieur, non pour s'associer à
 l'homme exterieur, ainsi non So-
 cieté separée, si ce n'est comme on
 diroit que quelqu'un a Societé
 avec son amy, & separation avec
 son ennemy, & qu'on voulust
 nommer cela vne Societé sepa-
 rée.



PAROLES DE LA FILLE.

II. PROPOSITION.

IL n'est pas raisonnable qu'il s'ap-
proche de nous, qui ne sommes que
peché.

I. OBJECTION.

Cela est faux que le iuste ne soit
que péché, & Luther tenoit ce
langage.

R E S P O N S E.

Il n'entend ny le langage de Luther,
ny celuy de la Fille, les paroles qu'il
combat ne font point mention du Iuste,
elles ne spécifient rien, mais disent ge-
neralement que nous ne sommes que
péché, selon les sentimens & les prote-
stations ordinaires des gens de bien, &
de tous les Chrestiens. Que si Luther a
tenu ce mesme langage, il devoit plustost

l'estimer à cause de la Religion Chrestienne qui le commande, & de tous les Chrestiens qui le pratiquent, que de reprendre la Religion & les Chrestiens à cause de Luther. Outre que les Iustes mesmes considerant ce qu'il y a en eux, non de Dieu, mais d'eux mesmes, ont raison de dire avec toute sorte de verité, à quelque grace qu'il ait pleu à Dieu les esleuer, qu'ils ne sont que peché, & en ce point consiste toute l'humilité Chrestienne, laquelle cet homme semble entreprendre de ruiner. Autre estoit l'erreur de Luther, qui croyoit que les hommes n'estoient vrayment & interieurement Iustes, ny par eux mesmes, ny par la grace de Dieu, comme sçauent ceux qui ont examiné la doctrine laquelle le Censeur n'entend point.

II. O B I E C T I O N.

C'est pour cela qu'il s'approche pour oster le peché, car il dit luy mesme, qu'il n'est venu que pour les pechez, *Non enim veni vocare iustos, sed peccatores.*

R E S P O N S E.

Il est faux que Iesus Christ ne soit venu que pour les pechez, l'Escripture ne parle point ainsi. Elle dit qu'il est venu pour les pecheurs, comme monstre le passage cité par cet Auteur, mais elle ne dit point qu'il n'est venu que pour les pechez. Il aime les pecheurs, & à cause de cela il est venu pour eux, mais il n'aime point les pechez, & par consequent il n'est venu que pour les destruire dans les pecheurs, pour le salut desquels il est venu. Qui dira que le Soleil ne se leue que pour les ombres ? c'est pour les hommes qu'il

se leue, afin de les illuminer, & les deli-
 urer des ombres de la nuict. En la mes-
 me maniere Iesus Christ de qui le So-
 leil est l'image, est venu pour les pe-
 cheurs, afin de les remplir de la lumiere
 de sa grace. Les Escritures parlent
 ainsi, & c'est à nous de les suivre dans
 les expressions des choses que nous ne
 connoissons que par l'esprit qui les a
 dictées. Or comme de ce que le Soleil
 chasse les tenebres, on ne peut inferer
 qu'il s'approche & se ioint à elles, puis
 qu'il est clair qu'ils sont incompatibles:
 ainsi de ce que Iesus Christ vient ôster
 nos pechez, on ne peut inferer qu'il
 s'approche & se ioint à nous qui ne
 sommes que peché, c'est à dire, à l'estre
 de peché qui est en nous; car au con-
 traire il destruit & aneantit cet estre
 corrompu, que l'Apostre nomme Corps
 de peché, & corps de mort, pour pou-

voir apres s'establiſſir & s'unir dans nos
 ames à l'eſtre diuin qu'il y met, lequel
 le meſme Apoſtre nomme Eſprit de
 Dieu, homme interieur & nouuelle
 creature. Et toute l'apprehenſion de la
 Fille eſt qu'il y vienne ſans deſtruire
 cet eſtre de peché, qu'il le ſouffre, &
 qu'il s'approche de luy, comme il arriue
 lors que nous le receuons ſans le reſpect
 qui luy eſt deû, & le logeons dans no-
 ſtre eſtre mauuais, & dans ce que nous
 ſommes de nous meſmes. Car il y a ce-
 ſte difference entre Ieſus Chriſt, Soleil
 de nos ames, & l'Aſtre qui eſt le Soleil
 de nos corps; que le Soleil agiſſant avec
 impuiſſance & par neceſſité de nature,
 ne peut retenir ſes rayons ny ſouffrir
 des tenebres autour de luy; au lieu que
 Ieſus Chriſt, Soleil puiſſant, non ſeu-
 lement ſur nous, mais auſſi ſur luy
 meſme, arreſte quand il luy plaïſt ſa

lumiere & ses influences, & souffre d'estre mis dans les tenebres sans y lui-
 re, c'est à dire, dans des ames obscurcies
 de peché, & cela non seulement dans
 les meschans, mais aussi dans les Iustes
 qui ne le reçoivent avec toute la sincerité
 qu'ils luy doiuent, & ne sont encor
 paruenues à la parfaite destruction de
 leurs tenebres. C'est en ceste maniere
 que la Fille a dit qu'il n'est pas raison-
 nable que Iesus Christ s'approche de
 nous, en venant dans nos ames souil-
 lées de peché; car quand il y vient rui-
 ner nos pechez, il ne s'approche pas
 d'eux, mais les ruine & aneantit, pre-
 mierement par sa lumiere, pour entrer
 puis apres dans elles par le saint Sa-
 crement.

E X A M E N.

En ceste explication le Defen-
 seur se contredit soy mesme, &

contredit la proposition : Il dit
 avec la proposition que les hom-
 mes ne font rien que peché, que
 Iesus Christ n'est pas venu pour les
 pechez, mais bien pour les pe-
 cheurs. Ou il faut que les hommes
 soient autre chose que peché, ou
 si Iesus Christ n'est pas venu pour
 le peché, qu'il ne soit pas aussi ve-
 nu pour les pecheurs. Dauantage
 si Iesus Christ est venu pour les
 hommes qui n'estoient que peché,
 & qu'il ne soit pas raisonnable
 qu'il s'approche de nous qui ne
 sommes que peché, ou il a fait vne
 chose déraisonnable, & en fait
 encor tous les iours : ou la propo-
 sition elle mesme est bien dérai-
 sonnable. Après cela il met l'hu-
 milité Chrestienne en vne chose
 bien nouuelle, & bien aisee de re-
 connoistre

connoistre, que lon n'est que pe-
ché, parce que tous les Iustes ne
sont que peché. L'humilité doit
estre plus particuliere, & ne doit
toucher que soy mesme: ainsi vn
homme en son particulier peut
bien dire qu'il n'est que peché,
mais non encor dans le sens de la
proposition; car il ne diroit pas
grande chose, & ne feroit pas vn
grand acte d'humilité, de se met-
tre avec tous les Iustes & tous les
Saints qui ont esté. Les hereti-
ques de ce temps ont ceste mesme
humilité, & ils ne chantent autre
chose. Il y doit auoir difference
entre les propositions generales,
& ce qu'une ame peut dire & sen-
tir d'elle mesme pour son particu-
lier. Celles-là doiuent estre sim-
plement dans la verité, & non dās

ces sortes d'humilité: ainsi la proposition est fausse, & (quoy qu'il die) dans le sens de Luther, de dire en general que nous ne sommes que peché, car elle embrasse les Iustes & les Saincts; & il est faux qu'ils ne soient que peché: Vn homme qui n'aura ny peché mortel ny peché veniel, comment ne sera-t'il que peché? Il seroit bien plus vray de dire qu'il ne seroit que grace, & il ne sert rien de respondre que ce qui est de luy n'est que peché, car cela ne dit autre chose, sinon qu'il a eu d'autres fois le peché par luy mesme, & par ceste raison lon pourroit dire que tous les Saincts de Paradis ne sont rien que peché.

PAROLES DE LA FILLE.

III. PROPOSITION.

MEsmes dans l'estat de grace il n'y a rien en nous digne de la Saincteté de Iesus Christ.

I. OBJECTION.

Cela est contre le Concile de Trente, & l'Euangile.

R E S P O N S E.

Il a desia esté dit que cet autheur ne deueroit pas citer ainsi à la volée les Conciles & les Escritures, & se mesler de persuader le monde par des preuues inuifibles. Tant s'en faut que cela soit contraire aux Conciles & aux Escritures, que l'Eglise apprend tous les iours aux plus iustes de dire, quand ils se presentent pour receuoir le sainct Sacrement, & qu'ils doiuent presuppo-

ser dauantage qu'ils sont en estat de grace, Seigneur ie ne suis pas digne que vous entriez dans moy; si ce n'est qu'on veille dire que la doctrine de l'Eglise n'est pas conforme à celle de ce Docteur, ou qu'elle nous apprend à mentir & à pratiquer de fausses humilitez.

II. OBJECTION.

Cela est faux que l'ame qui est en grace soit indigne de Dieu.

R E S P O N S E.

Elle ne dit pas que l'ame qui est en grace est indigne de Dieu, mais qu'elle n'en est pas digne, qui sont deux choses bien differentes: car estre indigne, dit plus que n'estre pas digne, celuy qui n'a pas seruy le Roy, n'est pas digne de ses faueurs, mais pour cela il n'en est pas indigne, s'il ne l'a defferuy. Je dis cecy pour monstrier que cet autheur aigrit & exagere mal à propos ce qu'il entre-

prend de refuter, & qu'il ne s'y prend pas avec la tranquillité d'esprit & la consideration qu'il deuroit. Car il est certain qu'il n'y a ame en ceste vie, quelque iuste qu'elle soit, qui par son propre estat, & par ce qu'elle est d'elle mesme, ne soit vrayement indigne de la sainteté de Iesus Christ. Il est parfaitement pur, & elles imparfaitement saintes, & tousiours dans l'engagement de leurs concupiscences naturelles, qui les empeschent d'estre entierement sanctifiées, & se donnent totalement à luy, & le contraire ne peut estre excusé d'un manifeste Pelagianisme. Or de ceste indignité propre que la fille parle, comme il appert de ce qu'elle oppose à la sainteté de Iesus Christ, non la grace qui est en nous, mais nous mesmes, disant, qu'en l'estat de la grace il n'y a rien en nous digne de la sainteté de

Iesus Christ ; elle ne dit pas que dans l'estat de la grace il n'y a rien digne de la sainteté de Iesus Christ, mais qu'en l'estat de la grace il n'y a rien en nous digne de la sainteté de Iesus Christ, attribuant ceste indignité non à la grace, mais à nous; pour monstrier que quoy qu'esleuez à l'estat de la grace, nous retenons tousiours icy nostre concupiscence, & nostre estre propre, par lequel nous sommes indignes de luy.

III. O B I E C T I O N.

Cela comprend l'ame de Iesus Christ & de Nostre Dame, & partant seroit vne espee de blasphemie.

R E S P O N S E.

Il est hors de toute apparence de comprendre Iesus Christ & la Vierge, dans les paroles qui disent qu'en l'estat de la grace il n'y a rien en nous di-

gne de la sainteté de Iesus Christ. Premièrement, il en naistroit ce sens ridicule, que dans Iesus Christ il n'y a rien digne de la sainteté de Iesus Christ. Secondement, la fille parle des ames en l'estat de la grace; Or Iesus Christ & la Vierge sont en celuy de la gloire. Tiercement, le mot de Nous, ne peut conuenir à Iesus Christ & à la Vierge, puis qu'ils ne sont pas dans le rang des autres hommes, mais incomparablement esleuez au dessus d'eux, & constituent chacun vn ordre à part. Je passe sous silence les autres raisons qui rendent ceste explication impertinente, lesquelles on peut colliger de ce que dessus.

IV. O B I E C T I O N.

Le Sainct Esprit dit, *Probanit eos, & inuenit dignos se.*

RESPONSE.

Il ne dit qu'il les a trouuées dignes de luy, qu'apres auoir dit qu'il les a esprouuées. Or il les esprouue en les purifiant, & les faisant passer par le feu de son saint Esprit : & par conséquent ce passage est hors de propos contre vne fille qui parle de l'indignité que les ames ont par elles mesmes en ceste vie. Outre que c'est mal prouuer en matiere de la grace, que les ames ne sont pas indignes, parce qu'elles sont dignes, puis que ces contrarietez s'accordent bien ensemble, comme il a esté dit, & que la dignité des ames saintes se prend des dons & de la misericorde que Dieu leur fait, & leur indignité d'elles mesmes ; c'est pourquoy le mesme Apostre qui a declaré qu'il n'estoit pas digne d'estre seulement nommé Apostre, a dit ailleurs qu'il auoit bien com-

batu, qu'il auoit gardé la foy, & qu'il attendoit la Couronne de iustice.

E X A M E N.

Ceste proposition est vne consequence de l'autre, & de mesme nature: Il est vray que si le Iuste qui est en grace, n'est rien que peché, qu'il n'y a rien en luy, mesme en l'estat de la grace, qui soit digne de la saincteté de Iesus Christ, mais toutes deux sont fausses. Toute ame qui est en grace, merite, de *condigno*, le Paradis, & Dieu mesme: elle a donc quelque chose en elle qui est digne de Dieu; & si cela ne pouuoit estre, l'Eglise auroit grand tort de nous faire prier tous les iours, *Vt digni efficiamur promissionibus Christi*: si ce n'est qu'elle nous voulust faire faire des prieres & des souhaits en l'air, comme les

leurs, qui ne doiuent iamais venir à leur effect. Et il a bonne grace d'expliquer ce passage, *Inuenit illos dignos se*, que c'est apres que Dieu les a esprouuez par le feu de son sainct Esprit, comme si lors qu'on esprouue de l'or à la couppelle, l'or en estoit moins or. Qui a iamais douté que ceste dignité des ames vienne de Dieu? & pour venir de luy en sont elles moins dignes? Il n'y a rien au monde qui soit si bien à nous que ce que Dieu nous donne, n'a t'il pas pouuoir de donner? donne t'il quelque chose d'autrui? & il donne aux ames ceste dignité, ne l'auront-elle pas? & à meilleur tiltre que si elle leur venoit d'ailleurs? & l'ayant, n'y aura t'il en elles rien digne de la grace, & de la sainteté de Iesus Christ? Mais estant

en la grace, la grace est en elles, mais Dieu luy mesme y est, & Iesus Christ y est tres-particulierement par la Communion. Ainsi par leur belle doctrine, Iesus Christ mesme ne sera pas digne de luy mesme, ny Dieu digne de Dieu; qu'ils voyent à quelles absurditez leur doctrine les mene, & il ne sert rien d'alleguer que l'Eglise enseigne le contraire, lors qu'elle apprend à dire, & mesme aux plus saincts, & au meilleur estat qu'ils doiuent estre, c'est à dire, allant communier, Seigneur, ie ne suis pas digne que vous entriez en moy: Car i'ay desia monsté qu'il y a grande difference entre ce qu'un particulier dit pour soy mesme, & ce qu'on dit dans vne proposition generale. Je ne puis

pas dire avec certitude, que Pierre ou Iean est digne que Iesus Christ s'approche de luy; aussi peu le puis-je dire de moy mesme: mais ie puis bien dire avec certitude que celuy qui est en grace, en est digne.

Ainsi quand on dit en communiant, Seigneur ie ne suis pas digne, c'est qu'on ne sçait pas si on l'est; & quand on le sçauroit, c'est vn acte d'humilité. Cela se peut encor entendre, ie ne suis pas digne des graces que i'ay receuës de vous, ou que vous m'ayez pardonné mes pechez. Il se pourroit encor dire quant à la maniere, & en l'infinie bonté que nostre Seigneur nous tesmoigne en vn si grand & charitable abbaissement en nous, & il semble que ce soit le vray sens, comme il paroist en ce-

luy, d'où l'Eglise a pris ces paroles.
 Le Centenier qui les dist à nostre
 Seigneur les entendit ainsi, il ne
 luy demanda pas qu'il ne s'appro-
 chast pas de son seruiteur par gra-
 ce, par pensee & application, com-
 me veulent ces nouveaux spiri-
 tuels, mais qu'il ne prist pas la pei-
 ne d'y aller en personne, puis qu'v-
 ne seule de ses paroles estoit suffi-
 sante pour le guerir: Ainsi en ces
 mesmes paroles, l'Eglise ne rejette
 pas comme eux, les ~~soins~~, les pen-
 sees, & applicatiōs de Iesus Christ;
 puis qu'elle luy dit, dites vne paro-
 le & mon ame sera sauuée; mais
 esblouye d'un tel excez d'amour,
 qui paroist en ce Sacrement, elle a
 grande raison de faire dire à vn
 chacun qu'il n'en est pas digne. Ce
 qu'il dit de la concupiscence ne

fait rien pour luy, car non seule-
 ment elle ne nous empesche pas
 de meriter, au contraire elle nous
 y aide souuent, & rend le merite
 plus grand; & s'il y prend bien gar-
 de, il verra qu'en cela il s'ap proche
 bien pres de Luther & de Calvin.
 Il aura bien autant de peine à ren-
 dre sa subtilité bien solide, quand
 il dit, que c'est mal prouuer, en ma-
 tiere de grace, que les ames ne sont
 pas indignes, parce qu'elles sont
 dignes; quel moyen d'estre digne
 & indigne à mesme temps, & d'v-
 ne mesme chose? où a t'il le sens?
 n'est-ce pas vne contradiction ma-
 nifeste? & il n'importe que ceste
 dignité & indignité viennent de
 diuers lieux, la dignité de Dieu, &
 l'indignité de nous mesmes, car l'v-
 ne chasse l'autre; vne ame en grace

est digne de Dieu, & de le posséder, & elle n'en est pas indigne, & mesme à lors elle n'en est pas indigne par foy, car l'indignité qu'elle auoit par foy, n'est plus; elle a esté chassée & effacée par la dignité de la grace que Dieu luy a donnée, & si cela n'estoit, S. Paul auroit eu tort de dire qu'il attendoit la Couronne de iustice; & ce qu'il dit ailleurs, qu'il n'est pas digne seulement d'estre nommé Apostre, à diuers sens. (Nous ne condamnons pas les sentimens d'indignité & d'humilité d'un chacun en son particulier.) Cela se peut encor entendre, quant à l'excellence de l'Apostolat, pour la sainteté & capacité qu'il requiert, ou encor de dire, (& cecy paroist plus dans son sens) qu'il n'estoit

pas digne d'auoir esté faict Ap-
stre, & que nostre Seigneur luy
eust donné la foy & la grâce: par-
ce, dit-il, que i'ay persecuté l'E-
glise.



PAROLES DE LA FILLE.

IV. PROPOSITION.

NOus deurions donc dire, comme
sainct Pierre à Iesus Christ,
*Retirez vous de nous, car nous som-
mes pecheurs.*

I. OBIECTION.

Cela se peut dire se considerant
comme pecheur; mais en estat de
grace, si on sçauoit d'estre en grâ-
ce, cela seroit faux & contraire à la
saincte Escriture.

RESPONSE.

R E S P O N S E.

Ceste Censure est vneuident Pelagianisme, qui nie que les hommes en estat de grace sont pecheurs, & dit que cela repugne à la sainte Escriture, encor est-ce vn erreur pire que celuy des Pelagiens, qui ont esté condamnez pour soustenir seulement que l'homme peut en ceste vie paruenir à vn estat où il soit sans peché. Au lieu qu'on dit icy que tout homme qui est en grace, est dans vn tel estat, & n'est plus pecheur; & cependant le Fils de Dieu commande à tous ses enfans, quoy que Iustes, de dire tous les iours à son Pere, Dimitte nobis debita nostra, sans en excepter les Apostres, ainsi que les Saints Peres du Concile de Carthage & Milenitain, & apres eux S. Augustin, l'ont remarqué contre les Pelagiens. Et tous les iours nous nous appellons pecheurs,


quand nous prions la Vierge de prier,
 Pro nobis peccatoribus : Et toute
 l'Eglise en corps demande continuelle-
 ment pardon à Dieu, & luy dit, Pec-
 catores, te rogamus audi nos. Car
 toute la Theologie demeure d'accord,
 que l'Eglise n'est pas entierement pure
 en ceste vie, mais qu'elle est tousiours
 meslée de plusieurs imperfections &
 pechez, & que c'est seulement en l'au-
 tre monde qu'elle sera sans tache &
 sans ride. Que si toute l'Eglise n'est pas
 sans peché, que dira-t'on de celuy qui
 nie que les Justes en particulier soient
 vrayment pecheurs ? C'est une pre-
 somption plus que Pelagienne, qui ne
 doit estre supportée.

E X A M E N.

Sainct Chrysostome dit, qu'il
 ne faut pas imiter les Apostres
 avant la descente du saint Esprit

en eux, qui se fit apres l'Ascension de nostre Seigneur. C'est pourquoy ceste nouuelle façon de prier Dieu n'est pas fort bien authorisée par l'exemple de S. Pierre qui pria de la sorte, de peur & d'imperfection en vn temps où il estoit encor pescheur, aussi bien que pecheur : Et pecheur là, peut estre veu encor dire mortel, & sujet à la mort. Il est vray que nous sommes pecheurs, & nous deuons nous croire tels, mais comme tels, nous ferons beaucoup mieux de suiure pour ce coup, & sans tirer à consequence, les exemples que nostre Defenseur nous donne maintenant, & de dire comme nostre Seigneur nous a appris, *Dimitte nobis debita nostra*, & avec l'Eglise, *Peccatores, te rogamus audi nos*. Cela est-

ce luy dire qu'il se retire de nous? & qu'il ne pense pas à nous? Le Defenseur deuroit appercevoir, que pour combattre son Theologien, il se combat luy mesme.



PAROLES DE LA FILLE.

I. PROPOSITION.

2. **V**ERITE'. *Que les ames aillent à Iesus Christ par luy mesme, sans agir par leur estre créé.*

I. OBJECTION.

Que veut dire aller à Iesus Christ par luy sans agir?

R E S P O N S E.

Si cet homme n'estoit que dans une simple ignorance, on luy pourroit pardonner; mais de reprendre des choses qu'il confesse n'entendre point, c'est ce

qui est intolerable. Il tronque les paroles de la Fille, qui ne dit pas simplement qu'il faut aller à Iesus Christ par luy & sans agir, mais elle y adiouste, & sans agir par leur estre créé, c'est à dire, par l'estre créé tel qu'elles le reçoivent maintenant dans leur naissance, souillé & infecté de peché. Ainsi le sens des paroles que ce Theologien n'entend point est manifeste; c'est à sçauoir, que les ames doiuent aller à Iesus Christ par luy mesme, c'est à dire, par leurs puissances réparées & animées de sa vertu, & non par leur estre agissant, par la condition naturelle & impure, accomplissant la parole de l'Apostre; Que ceux là sont vrayement enfans de Dieu, qui Rom. 8. sont agis par son esprit, & non par leur.

II. OBJECTION.

Que veut dire agir par son estre

créé? cela n'est que par nature, & il s'agist icy d'agir par la grace.

R E S P O N S E.


Il n'entend pas les paroles de la Fille, & i'aduouë que ie n'entends pas les siennes, & ne vois nulle rime ny raison dans son argument: lequel par consequent ie ne refute point, de peur d'estre accusé de temerité comme luy: Car quant à ce qu'il dit qu'il ne sçait que veut dire agir par son estre créé, quoy que ce doute soit mal seant à vn Theologien & à vn Censeur public des discours plus eminens de la grace, toutes-fois il a esté assez expliqué, sans qu'il soit besoin d'en parler dauantage.

E X A M E N.

Quoy qu'il puisse alleguer, il est faux que les ames pour aller à Iesus Christ ne doiuent pas agir par leur estre créé; & par quel

donc? par leur estre increé? Elles n'en ont point, il n'y a que Dieu seul qui ait vn estre increé; leur estre mesme de grace est vn estre créé, & ainsi soit qu'elles agissent par leur estre naturel, ou par leur estre de grace, elles agissent tousiours par vn estre créé; & elles doiuent agir & par l'vn & par l'autre: car elles doiuent agir par tout ce qu'elles ont, & par tout ce qu'elles sont, pour aller à Dieu; & leur defendre, c'est leur oster toute action & toute cooperation. Il est vray que Dieu, & la grace, doiuent estre le principal agent, mais cela n'oste pas l'action & la cooperation de la creature. Ce qu'il adiousté apres, d'agir par leur estre réparé & renouuéllé par Iesus Christ, est bien hors de propos, parlât à des Chre-

stiens baptisez , & consequem-
ment regenererez par le Baptême,
ils n'ont plus d'autre estre que ce-
luy-là, & quand ils en auroient vn
autre, comme les infideles, ou s'ils
veulent par leurs propres pechez,
encor seroient-ils obligez d'agir
par l'estre qu'ils auroient, pour
chercher la grace du Baptême, &
de la Penitence, que Dieu leur
donneroit s'ils faisoient ce qui est
d'eux pour l'acquérir, suiuant ceste
doctrine receüe de l'Eglise, *Fa-
cienti quod in se est, Deus non denegat gratiam.*



PAROLES DE LA FILLE.

II. PROPOSITION.

L Es bornes de l'ame s'ont opposées à
ceste verité qui est Iesus Christ,

*qui ne se doit regarder en Dieu que
comme infinité de grandeur.*

O B I E C T I O N.

Cela est tres-obscur & faux ;
car l'ame des bien-heureux est
bornée, & ne laisse pas de regarder
Dieu en son infinité, sans le com-
prendre, pourquoy ne le peut-on
pas faire en ce Sacrement? 2. l'ame
de Iesus Christ est finie, & celle de
Nostre Dame; pour cela sont elles
opposées?


R E S P O N S E.

*Ces paroles ne sont point de la Fille,
& tous les exemplaires que nous avons
vus, au lieu de celles-là ont celles-cy,
Que les ames doivent agir sans limiter
leurs usages enuers luy, n'y ayant que
la conduite de l'esprit de Dieu qui est
esprit de verité, qui les puisse rendre
dignes de l'adorer dans la mesme verité*

qu'il demande d'elles. Ce langage est bien different de celuy que nostre Censeur allegue, & porte autant de lumiere que celuy là d'obscurité: toutesfois puis qu'il l'aduouë si obscur, il a mauuaise grace de le combattre, & de le demener si mal au milieu des tenebres. Certes quelque sens qu'on donne à ce discours, il est clair que les bornes dont il fait mention, ne peuuent estre que de celles du peché, qui seules bornent les desseins & les grandeurs de Dieu, & luy sont opposées, & ainsi tous les argumens de ce Docteur nouveau tombent par terre: Car ny dans l'ame des bien-heureux, & beaucoup moins dans celle de la Vierge & de Iesus Christ il n'y a nulles telles bornes, mais Dieu y regne, y triomphe, y establit ses grandeurs, & ses desseins pleinement, & dans toute leur estendue.

E X A M E N.

Ceste proposition est dans l'original, comme le Theologien l'a alleguée, & ne se peut expliquer des bornes du peché seulement, car elle les oppose à l'infinité de Dieu. Ce qui est opposé à l'infiny, c'est ce qui est finy, & toutes les ames sont finies, & celle de la Vierge, & de nostre Seigneur mesme. Pour le peché, il est plustost opposé à la bonté de Dieu, qu'à son infinité.



PAROLES DE LA FILLE

I. PROPOSITION.

3. **L**IBERTE'. *Que Iesus Christ ne dépende plus que de luy, en ce que sa misericorde luy a donné des*

regles & des pensées d'accommodement aux hommes.

I. O B I E C T I O N.

Iesus Christ dit le contraire, car il dit qu'il n'a rien fait que dépendamment de son Pere.

R E S P O N S E.

Cet homme monstre bien qu'il a d'autres affaires dans la teste, & qu'il a fait ces belles notes dans le tracas & le tumulte du monde. Car il n'entend ny ce qu'il reprend, ny ce qu'il dit. Il commet un Arianisme en ne souffrant point ceste proposition, que Iesus Christ ne dépend que de luy mesme, c'est à dire, qu'il est indépendant & souverain, estant certain qu'avec la mesme verité qu'il est Dieu, il est indépendant & absolu, puis que l'indépendance est une propriété inseparable de la Divinité: tellement qu'on ne peut nier ceste pro-

position sans un manifeste Arianisme, car d'alleguer que Iesus Christ a dit le contraire, quand il a dit qu'il n'a rien fait que dans la dépendance de son Pere, c'est encor argumenter par l'esprit des Ariens, & Nestoriens, qui en ceste maniere combatoient les passages qui rendent tesmoignage de la Diuinité de Iesus Christ par ceux qui tesmoignent son humanité, & la dépendance de son Pere. C'est pourquoy nous respondons, comme nos Peres ont respondu à ces heretiques, que ces choses sont bien différentes, mais non pas contraires, & que Dieu alliant dans le mystere de l'Incarnation deux natures infinimēt esloignées l'une de l'autre, a par mesme moyen allié ces repugnances apparentes, & nous a obligez de les considerer pour admirer la grandeur & l'incomprehensibilité de ce mystere, & non

pour la destruire. Voila pour ce qui regarde l'obiection de ce Theologien, car pour le sens de la Fille, il ne l'a nullement entendu, parce que dans ces paroles elle n'attribuë pas à Iesus Christ une independance au regard du Pere, mais au regard des hommes, desquels elle desire qu'il ne dépende point dans les regles d'accommodement enuers eux que la misericorde luy a prescrit, comme il sera expliqué plus à propos contre l'obiection suivante.

II. O B I E C T I O N.

Quelle loy luy donne t'on de ne s'accommoder point aux hommes?

R E S P O N S E.

On ne luy donne point de loy, & on ne desire point aussi qu'il ne s'accommode pas aux hommes, mais on desire que dans les accommodemens dont il use

enuers eux, il ne dépende d'eux, & ne leur soit point assuietty: mais que ses accommodemens soient libres, & dépendans de sa seule volonté, en sorte qu'il les puisse faire & cesser selon son bon plaisir, & que suiuant S. Paul il opere tout, Prout vult. C'est manifestement le sens des paroles de la Fille, comme il appert par la seule lecture. C'est vne chose indigne que celuy qui ne les entend point, les ose condamner, & combattre, & luy face payer la peine de son ignorance.

III. O B I E C T I O N.

C'est contre l'intention de l'Incarnation & du sainct Sacrement; on desire donc vn effect tout contraire à celuy de Iesus Christ en ce sainct Sacrement.

R E S P O N S E.

La nullité de ceste obiection appert


de la solution des precedentes, puis que la fin de l'Incarnation & du S. Sacrement est bien que Iesus Christ s'accommode aux hommes, mais non qu'il s'accommode à eux avec engagement & assuiettissement, qui est le seul point du desir de la Fille, lequel par consequent ne repugne nullement à l'intention de Iesus Christ.

E X A M E N.

Je laisse à ce Theologien à se defendre des Arianismes & Nestorianismes, que luy attribuë fort liberalemēt le Defenseur, & viens au sens qu'il donne luy mesme à sa proposition. Dieu, comme infiny en grandeur, ne peut auoir aucune proportion avec sa creature, c'est pourquoy elle ne peut, aidée mesme de sa grace, paruenir iusques à luy, ny meriter de le posseder,

feder, & iouïr de sa gloire; car & la grace, & les œuvres, & la creature, sont tousiours finies & bornées, & luy infiny & sans bornes; sa bonté neantmoins a voulu l'vn & l'autre, & que les hommes le possédassent, & qu'ils méritassent de le posséder; ce qui l'a obligé d'establir vn mérite, non proportionné à sa grandeur, ny à ce qu'il est, mais proportionné à la foiblesse & infirmité humaine; non mérite absolu, mais mérite conditionné; non mérite en soy, ny de soy, mais dans les conditions & promesses de Dieu, *hoc fac, & viues*; & c'est ce que la proposition appelle Regles & pensées d'acc commodement aux hommes, que Dieu s'est voulu donner à luy mesme, par bonté & par misericorde

pour les sauuer. Or vouloir que Dieu ne suiue pas ces regles, c'est vouloir qu'il ne nous sauue pas, ou qu'il nous sauue sans merite; c'est vouloir qu'il manque à ses promesses; c'est vouloir qu'il ne soit plus fidele; c'est vouloir qu'il ne soit plus luy mesme. O Dieu quelle spiritualité! car de dire qu'on l'entend avec engagement, & avec assuiettissement aux hommes, c'est vne glose d'Orleans, & vn de leurs c'est à dire, qui ne veulent rien dire, ou qui disent tout le contraire des propositions, ainsi que nous verrons en toute ceste fuite.



PAROLES DE LA FILLE.

II. PROPOSITION.

Comme il est de soy mesme, qu'il soit aussi pour soy mesme.

I. OBJECTION.

Comment est-ce que Iesus Christ est de soy mesme? Selon la Diuinité est-il pas du Pere? Comme homme, est-il pas du Sainct Esprit, & de la sainte Vierge?

R E S P O N S E.

Ceste objection contient un *Arianisme*, & un *Nestorianisme*: car nier que Iesus Christ, selon la Diuinité, est de soy mesme, c'est un *Arianisme* qui luy oste l'indépendance, sans laquelle il ne peut estre Dieu, & qui luy est attribuée par les *Escriptures* & par les *Saincts Peres*, à quoy il ne faut oppo-

ser que selon la Diuinité il est du Père, puis que de là non seulement il ne s'ensuit pas qu'il n'est point de soy mesme, mais au contraire il s'ensuit qu'il l'est; Car puis qu'il est né du Pere, & qu'il est son Fils, il est donc issu du Pere avec mesme nature que luy, & comme dit saint Athanase dans le Symbole, Tel que luy, égal à luy, Dieu comme luy, indépendant, & de soy mesme comme luy. Il n'y a non plus de repugnance qu'il soit du Pere, & qu'il soit de soy mesme, qu'il y en a qu'il soit Eternel, & qu'il ait un Principe, qu'il ait sa vie du Pere, & qu'il l'ait de luy mesme, ainsi qu'il dit dans l'Euangile, Que comme le Pere a dans luy mesme la vie, il a donné au Fils qu'il l'ait aussi dans luy mesme, pource que la nature de la generation porte ceste consequence necessaire. C'est pourquoy saint Hi-

laire disputant contre les Ariens, dit
souuent que le Fils, Nec est aliunde,
nec est aliud; nec sumpsit aliunde
quod subsistit. Et saint Augustin
expliquant les paroles de Iesus Christ
qui dit, Que le Pere luy a donné d'a-
uoir comme luy la vie dans soy mesme;
demande, Quid est vt in semetipso
vita esset? Et respond, Non aliunde
vita indigeret, sed ipse esset pleni-
tudo vitæ. Comme donc de ce qu'il est
de soy, il ne s'ensuit pas qu'il n'est point
du Pere; ainsi de ce qu'il est du Pere, il
ne s'ensuit pas qu'il n'est point de soy,
selon la maniere d'argumenter de ce
Theologien, qui monstre ignorer les
principaux mysteres de nostre Foy, non
par vne simple ignorance, mais par vn
erreur qui l'engage dans l'Arianisme.

Il fait la mesme faute quand il prou-
ue que Iesus Christ n'est pas de soy dans

Hilar. lib. 6.
de Trinit.
& lib. 9.
S. Aug. tra-
ctat. 12. in
Ioan.

l'Incarnation, parce qu'il est du saint Esprit, & de la sainte Vierge. Car c'estoit l'argument des Nestoriens, qui prouuoient ainsi qu'il n'est pas Dieu, ny plus ancien que sa Mere: mais comme il ne repugne point qu'il soit Fils de Marie, & neantmoins son Pere; il ne repugne pas aussi qu'il soit d'elle, & tout ensemble de soy mesme. Car ceste diuersité se rapporte à l'inegalité des deux natures comprises dans sa personne. A cause dequoy le mesme S. Hilairre declare, qu'il a esté luy mesme son origine, qu'il est né de luy mesme, qu'il a souffert, & qu'il est mort de luy mesme: C'est à dire, que comme il s'est fait naistre, il s'est fait mourir; & que par consequent il n'est pas seulement principe de son estre, mais aussi de son non estre, afin de se rendre en suite principe d'un estre plus excellent & plus diuin.

Sibi ipse origo nascendi est, ex se natus, & per se passus, & ex se mortuus.

Hilar. lib. 9. de Trinit.

Car il adiousté, qu'il a esté luy mesme le Dieu de sa Resurrection, c'est à dire, le principe de luy mesme ressuscité. A quoy S. Augustin adiousté, Que non seulement il a esté enuoyé du Pere, mais aussi qu'il s'est enuoyé luy mesme. Tellement que si selon les Peres il s'est enuoyé luy mesme, il est né de luy mesme, il a souffert, il est mort, & il est ressuscité de luy mesme; c'est vne temerité de nier qu'il est de luy mesme dans son Incarnation. Et d'ailleurs, ce point ne peut recevoir nulle difficulté, puis qu'il est certain par le consentement des Theologiens & des Saints Peres, que toutes les operations exterieures estant communes à toute la sainte Trinité, l'Incarnation & la generation temporelle de Iesus Christ ne peut qu'elle ne procede aussi bien de luy mesme que du Pere & du saint Esprit, quoy qu'on

l'attribuë au saint Esprit par appropriation, & qu'ainſi on ne ſçauroit nier ſans erreur que Ieſus Chriſt dans l'Incarnation ne ſoit de luy meſme.

II. O B I E C T I O N.

S'il vouloit eſtre pour ſoy meſme, à quel propos ſe donner aux hommes par le moyen du ſaint Sacrement ? le principal motif du ſaint Sacrement eſt de ſe communiquer aux hommes avec vn excez de ſa bonté, & ſi voulez qu'il ne ſoit que pour ſoy meſme, eſt-ce pas entierement contre l'Euangile ? *Veni vt vitam habeant, & abundantius habeant* : Eſt-ce cela n'eſtre que pour ſoy meſme ſeulement ? puis qu'il ſe quitte pluſtoſt ſoy meſme pour ſe communiquer à nous ?

R E S P O N S E.

C'est une grande impieté de dire que Iesus Christ n'est pas pour soy mesme, parce qu'il se donne aux hommes par le S. Sacrement. On prouuera par mesme moyen que le saint Esprit n'est pas pour soy mesme, parce qu'il se donne par le saint Sacrement de Confirmation; ny mesme le Pere, parce qu'il se donne à nous avec toute la sainte Trinité, comme dit Iesus Christ dans l'E-uangile, Nous viendrons à luy, & ferons nostre demeure dans luy. Ainsi toute la sainte Trinité ne sera pas pour elle mesme, mais pour les hommes. Que si c'est un blaspheme de le penser seulement, beaucoup plus de dire que Iesus Christ n'est pas pour soy mesme, comme si en se donnant aux hommes il s'arrestoit en eux, & ne leur faisoit pas ses dons pour luy mesme, pour son hon-

neur & pour sa gloire, & que ses plus
 eminens desseins peussent auoir une fin
 créée; & qu'au lieu qu'il est la fin de
 nous & de tout ce que nous sommes,
 nous peussions estre la sienne. L'impiété
 est encor plus claire, & exclut toute sor-
 te de subterfuge dans les paroles sui-
 uantes, où il dit que le principal motif
 du saint Sacrement, est de se commu-
 niquer aux hommes. Car il declare net-
 tement que le but principal du S. Sacre-
 ment est l'auantage des hommes, & par
 consequent sa gloire, & celle de son Pe-
 re, ou n'en sera pas le motif, ou ne sera
 que le moins principal. Ce qui est d'an-
 tant plus faux, qu'il est certain que la
 sainte Eucharistie est principalement
 instituée pour estre sacrifice, & pour
 représenter celuy de la Croix, & qu'il
 n'est Sacrement qu'en suite du sacrifi-
 ce, & pour en rendre les hommes parti-

cipans. D'où s'ensuit que sa principale
 fin est d'honorer la grandeur de Dieu,
 & de luy rendre hommage, comme au
 premier principe, & qu'il ne s'estend
 sur les hommes que comme tout sacrifi-
 ce; apres avoir esté employé pour adorer
 Dieu, est employé pour sanctifier ceux
 qui l'ont offert. Ce qui est encor plus
 considerable, parce que ce sacrifice
 estant sacrifice d'holocauste, & la fin
 & la consommation de tous les sacrifi-
 ces, il deuroit estre tout consommé pour
 Dieu seul. Tellement que nous n'en
 sommes faits participans que par une
 double condescendance & une double
 merueille, qui semble contraire à la na-
 ture de ce sacrifice. D'où on voit claire-
 ment la presumption de ce Docteur, &
 la hardiesse qui le porte à discourir des
 choses dont il n'a presque point de con-
 noissance: Il veut que Dieu traite les

hommes, comme les hommes doiuent
 traiter Dieu, se proposant leur bien
 pour fin principale, au lieu que les hom-
 mes se doiuent ainsi proposer celuy de
 Dieu. Tellement qu'il fait cesser Dieu
 d'estre ce qu'il est, pour le changer en
 homme, & les hommes d'estre ce qu'ils
 sont pour les changer en Dieu. Mais il
 le fait beau voir prouuer ceste double
 impieté par l'Euangile; Comme si de
 ce que Jesus Christ dit, Qu'il est venu
 pour donner la vie aux hommes, il sen-
 suiuoit qu'il n'est pas venu pour luy mes-
 me, mais pour eux: car cela monstre
 bien qu'il est venu pour les hommes,
 mais non qu'il n'est venu que pour eux,
 & non pour soy mesme, puis qu'il rap-
 porte principalement à soy & à son Pe-
 re tant sa venue, que les hommes mes-
 mes pour qui il est venu. Car la parole
 de l'Escripture ne peut estre fausse, que le

Seigneur a operé tout pour soy, qu'il nous a appellez, afin que nous soyons pour la loüange de sa gloire, que tout est à nous, nous à Iesus Christ, & Iesus Christ à son Pere; & quantité d'autres lieux qui rendent ceste verité irrefragable. Et quant à ce qu'on adiouste qu'il se quitte plustost soy mesme, pour se communiquer à nous: Cela ne conclud rien, non plus que le reste, pour prouuer qu'il n'est pas pour luy mesme: parce qu'il ne s'est quitté luy mesme (sil est permis de parler ainsi) & n'est sorty de la gloire qu'il a dans son Pere, que pour y reuenir, & nous y ramener avec luy, afin que nous & toutes les communications qu'il nous fait, soyons eternellement pour luy, & pour son Pere.

EXAMEN.


Parlant de Dieu, dit saint A-

thanase , il ne faut ny separer la
 substance , ny confondre les per-
 sonnes. Ainsi il faut parler diffé-
 remment quand on parle de Dieu
 simplement , où quand on parle
 de quelqu'une des personnes divi-
 nes , avec distinction aux autres.
 Il est vray que Dieu est de soy , &
 par soy ; mais quand on vient à
 particulariser les personnes , &
 qu'on veut demeurer , comme on
 parle à l'Eschole , *In conceptu per-*
sonali , il en faut parler autrement ;
 Et l'on dit que le Pere est de luy-
 mesme , & n'est que de luy-mes-
 me , à la difference des deux autres
 personnes qui procedent de luy ,
 & qui ne sont pas d'elles mesmes
 comme personnes , où bien en-
 tant qu'elles sont Dieu. Ainsi le
 Fils comme Fils , & comme se-

conde personne, n'est pas de luy
mesme, mais du Pere; le Sainct
Esprit, comme troisieme person-
ne, n'est pas aussi de luy, mais du
Pere & du Fils. Or quand on parle
de Iesus Christ lon est encor obli-
gé de se restreindre dauantage, &
d'en parler d'une autre sorte, car il
est Dieu, mais il est aussi homme;
& comme homme, il est vray qu'il
a receu la vie de sa Mere, & non
pas de soy mesme: Et quand l'A-
postre dit que tout est à nous,
nous à Iesus Christ, & Iesus Christ
à son Pere; ce n'est pas tout con-
fondre & mettre tout en vn com-
me eux, humanité, diuinité, sub-
stance, & personnes. Souhaitter
aussi que Iesus Christ soit pour
soy mesme, il est bien ridicule en
quelque façon qu'on le prenne:

car si on parle de Iesus Christ en tant que Dieu, il ne se peut qu'il ne soit pour soy mesme, & qu'il ne soit sa fin derniere; & ainsi c'est luy faire vn fort beau present, & vn grand sacrifice, de luy donner & souhaitter vne chose qu'on ne luy peut oster, & qui ne peut estre autrement; c'est comme quand on luy souhaite qu'il soit Dieu, ainsi que nous verrons. Si on regarde Iesus Christ comme homme, la proposition est encor moins soustenable, & ne merite pas qu'on s'y amuse. Mais elle fait plus que cela, & en son sens elle porte vne exclusion, ou elle ne dit rien du tout; & souhaittant que Iesus Christ soit pour soy-mesme, c'est souhaitter qu'il ne soit que pour soy, & qu'il ne soit pas pour
les

les hommes; & toute personne de bon sens lisant la proposition, l'entendra ainsi. Aussi le Defenseur en vient-il à son, c'est à dire, ordinaire, que Iesus Christ soit pour soy, c'est à dire, pour sa fin derniere, ce que nous auons montré desia bien ridicule.



PAROLES DE LA FILLE.

III. PROPOSITION.

D*Ans ceste pensée renoncer à toutes les promesses de Dieu, entant que promesses.*

I. OBJECTION.

Quelle horrible pensée est-ce cy? &, sous couleur de deuotion, quelle estrange temerité de renoncer à toutes les promesses, c'est

à dire tout l'Evangile & la sainte
Ecriture qui n'est pleine que de
promesses ? Et pourquoy est-ce
que Dieu nous promet tant de
choses, s'il veut apres que la plus
grande perfection soit de renon-
cer tout cela ?

R E S P O N S E.

*La passion de ce Censeur luy fait
en premier lieu tronquer les paroles
qu'il deteste avec tant d'excez. Car il
n'y a pas, qu'on renonce aux promesses
de Iesus Christ entant que promesses;
mais il y a plus, entant que promesses
qui semblent porter engagement, c'est à
dire, en un mot qu'on renonce non aux
promesses, mais à l'engagement, &
qu'on desire que Iesus Christ accom-
plisse ses promesses par amour, sans
auoir égard à l'engagement, comme on
desire obeir de sa part à ses volontez.*

par pure charité, sans auoir égard au commandement. Car la loy n'est pas pour les iustes, mais pour les iniustes, & pour les seruiteurs inutiles qui n'agissent que par crainte, & par esperance. On veut donc traiter avec Dieu par amour reciproque, & que comme de nostre costé nous nous esleuerons par affection au dessus de la loy des commandemens, il s'esleue du sien par dessus celle des promesses, pour donner lieu à une parfaite charité mutuelle. Est-ce là une horrible pensée au iugement de ce Theologien? Est-ce là renoncer aux promesses de Dieu, & ruiner son Euangile? N'y a-il pas plustost sujet de blâmer la temerité qui le porte à iuger de ce qu'il n'entend point? & qui esbloüit sa foible veüe, par la grandeur de sa lumiere?

II. O B I E C T I O N.

On sçait bien que les promesses sans Dieu ce ne seroit pas grande chose ; mais Dieu & ses promesses sont-elles pas à desirer ? Toute la Bible ne chante que cela. Qui jamais les a receuës sinon en tant qu'elles viennent de la liberté & liberalité de Iesus Christ ? Faut-il pas craindre quelque secrette presumption de voir que tous les Saints ne s'appuient que sur les promesses de Dieu , & voir des filles renoncer , &c.

R E S P O N S E.

C'est pitié d'entendre des raisonnemens si bas & si ridicules sur un sujet si diuin, car que veut dire ce jargon, que les promesses sans Dieu ne seroient pas grande chose ? Qui est l'esprit si subtil qui peut comprendre les promesses de

Dieu sans Dieu ? ne le contiennent elles pas luy mesme ? & ne nous le promettent-elles pas ? n'en est-il pas l'objet, la fin, & le principe ? qui peut donc concevoir ces promesses sans Dieu, si ce n'est peut estre celuy qui s'imaginera que les promesses de Dieu peuuent estre vaines & illusoires, & n'auoir autre effect que des paroles ?

D'ailleurs, qui dira que les promesses sans Dieu ne seroient pas grande chose ? mais que Dieu & ses promesses sont à desirer ? comme si les promesses rendoient Dieu en soy, plus grand & plus desirable. Je passe toutes ces absurditez, pour en destruire vne de beaucoup plus estrange : car il adioust que nul n'a iamais receu les promesses sinon en tant qu'elles viennent de la liberté & liberalité de Iesus Christ, mais c'est combattre le sens commun des Chre-

stiens, & nier qu'il y ait des mercenai-
 res & des seruiteurs inutiles qui tra-
 uailent pour la recompense, & la pre-
 tendent de droict apres auoir trauaillé,
 & trouuent mesme souuent estrange
 que Dieu ne leur paye pas assez tost ce
 qu'ils croyent auoir merit  en suite de
 ses promesses. Que si tout le monde tra-
 uaille avec la puret  & desintresse-
 ment que ceste fille desire,   quel propos
 donc appeller horrible sa pens e, & di-
 re qu'elle destruit l'Eu gile? ne paroist-
 il pas beaucoup mieux que cet homme
 se destruit & renuerse luy mesme? La
 puret  donc & la charit  que ceste fille
 desire, est vne chose aussi conforme  
 l'Eu ngile & au sentiment de tous les
 Chrestiens, qu'elle l'est peu   leur prati-
 que. Elle re oit les promesses, mais elle
 en remet l'obligation & tout le droict
 qu'elle y peut auoir entre les mains de


Dieu, afin de dépendre de luy en tout ce qu'elle est, & traiter avec luy par une reuerence & une charité absolue. C'est ainsi que les grands Saints ont receu les promesses de Dieu, le regardant en elles, & non eux mesmes, & y cherchant sa gloire, & non leur auantage.

E X A M E N.

Nous auons dit que tout nostre salut est fondé sur les promesses de Dieu, & sur des accommodemens que sa bonté & sa misericorde luy ont fait prendre pour les hommes, & pour leur donner le moyen de meriter sa gloire; renoncer donc à ces promesses, c'est renoncer à son salut, c'est renoncer à Dieu qui s'est promis luy mesme. Leur, c'est à dire, en tant qu'elles portent engagement, est vne chose puerile: on diroit que

Dieu est vn mineur, qui s'est engagé sans y penser, & qui cherche d'en estre releué; voila des pensées bien esleuées, & bien dignes de la grandeur de Dieu. L'engagement que Dieu s'est donné à luy mesme, si on le veut nommer engagement, est vn engagement d'amour, de bonté, de misericorde; veut-on que Dieu se change? en changeant ses promesses il ne seroit pas Dieu. Et c'est l'erreur la plus commune en toute ceste belle spiritualité, de vouloir continuellement que Dieu se change, qu'il se reforme, & reforme tous ses desseins, ses voyes, & ses intentions. La raison qu'il en rend, que c'est pour donner lieu à vne charité mutuelle de nous avec Dieu, est pour le moins aussi mauuaise.

que la proposition; cela seroit bon entre esgaux, mais de nous à Dieu, c'est deuoir & obligation, de Dieu à nous c'est bonté & misericorde. Je laisse qu'insensiblement cela destruit toutes les bonnes œuvres, sous pretexte de ne vouloir plus de salut par elles ny par nous, ny par les promesses de Dieu, mais purement & simplement de sa franche & libre volonté.



PAROLES DE LA FILLE.

I. PROPOSITION.

4. **E**XISTANCE. *Que Iesus Christ ne souffre point la subsistance de la creature.*

O B I E C T I O N.

Y a-il fille sous le ciel qui en-

rende ses paroles, pourquoy est-ce que Dieu ne souffrira pas la subsistance de la creature, luy qui l'a faite, & qui est mort pour elle? & que peut mais la creature d'estre telle que Dieu l'a faite?

R E S P O N S E.

Ce ne seroit pas chose estrange quand quelque fille n'entendrait pas ce qu'il reprend, mais c'est vne merueille de voir que paroissant en public avec tant de presumption, il ne l'entend pas; & beaucoup plus, que non obstant cela, il le combat, & fait des argumens, qui ne prouuent rien que le peu de connoissance qu'il a, & de ces choses, & de soy mesme : car pour moy ie m'asseure qu'il n'y a fille si peu instruite dans les maximes de pieté, qui n'ait ouy dire qu'il faut destruire son estre propre, & prier Dieu de le ruiner, afin que luy

seul soit dans nous, & nous dans luy,
 & non dans nous mesmes. C'est un
 langage si connu, & si commun parmy
 les personnes de vertu, qu'il faut ne les
 auoir gueres pratiquées, & s'estre esga-
 ré fort auant dans l'embaras du monde
 pour le trouuer nouveau, & beaucoup
 plus pour ne l'entendre pas; car il se
 trouue outre cela, que c'est le propre
 langage de l'Escripture Saincte, qui
 nous ordonne de nous separer de nous
 mesmes, de nous hair, de nous perdre,
 & de faire en sorte que ce soit Iesus
 Christ, & non nous, qui viue dans
 nous mesmes. Et les pointilleries de ce
 beau Docteur n'ont pas moins de force
 contre les Escriptures, que contre l'Escript
 qu'il combat, ou plustost elles sont éga-
 lement friuoles contre tous les deux;
 car par ces manieres de parler, on n'en-
 tend pas que Dieu destruisse l'estre qu'il

a créé, & l'essence de l'homme, mais l'estre qu'il n'a pas créé, & qui vient de la generation d'Adam, & nous constituë enfans autant de sa misere que de sa nature, à la destruction duquel estre trauaillant durant tout le cours de ceste vie, comme Dieu nous y oblige, & n'en pouuant esperer l'entier aneantissement que dans le Ciel, il ne faut pas trouuer estrange si nous souhaitons que Iesus Christ le ruine en nous de plus en plus, & ne le souffre point en sa presence, quand il vient dans nos ames. C'est cet estre que nous appellons l'estre de la creature, que nous exprimons par le mot de nous mesmes, de nostre propre subsistance, & mesme de nostre propre nature, parce que cet estre nous appartient en propre, que nous l'auons non de Dieu, mais de nous mesmes, que nous en sommes les auteurs, & non luy, &

que c'est cet estre par lequel nous subsistons hors de luy dans nous-mesmes, nous constituant comme autant de Dieux separez & independans de luy. Car pour l'essence qu'il nous a donnée, nous sommes à luy, & non à nous-mesmes, nous vivons & subsistons dans luy, selon la parole de l'Apostre, *Ipsi*us *genus sumus*, & *in ipso vivimus*, *mouemur*, & *sumus*. Si nostre Censeur eust sceu ce principe, & ce fondement necessaire pour entendre l'Ecriture, le langage du Christianisme, & le moindre mystere de nostre Religion, il n'eust pas produit des argumens qui ne procedent que de l'ignorance d'une chose si importante.

E X A M E N.


Vn des principes de nos spirituels est, que l'ame est aneantie reellement, & qu'elle entre en

Dieu d'une telle maniere, qu'elle perd absolument son estre, & n'a plus d'estre que celuy de Dieu mesme : que cet aneantissement reel se commence en la terre par grace, & est accomply & tout consommé dans la gloire. Que l'ame ainsi absorbée en Dieu, est comme vne goutte d'eau qui tombe dans la mer, & en suite ils expliquent precisément à la lettre & sans modification ces paroles de saint Paul, *Vivo ego, iam non ego, vivit verò in me Christus*. Et il faut estre bien aveugle pour ne pas voir que toutes les paroles de ceste proposition, & de celles qui suivent apres, tendent à ceste verité imaginée. Mais le Defenseur n'a pas osé defendre son principe; c'est vn des mysteres cachez qui

ne se ~~qu'à~~ qu'à l'oreille & que sous le
secret : neantmoins , en quelque
sens qu'il la veuille expliquer , il
n'en scauroit sortir à son honneur.
Je veux entendre avec luy que c'est
de l'estre du peché qu'il est parlé
en ceste proposition, (ce qu'il faut
pourtant deuiner :) On demande
donc à Nostre Seigneur qu'il ne
souffre point la subsistance de cet
estre, c'est à dire, la subsistance du
peché. On pourroit dire en pre-
mier lieu, que le peché n'a point
de subsistance, & qu'ainsi la pro-
position n'en peut estre entenduë :
Mais disons ; ou ils veulent que
Nostre Seigneur le face ou par
iustice, ou par misericorde ; le pre-
mier est mieux dans leur sens, dans
leur humeur, & plus conforme à
leur doctrine. On ne voit autre

chose en tout ce Chappellet, sinon que Dieu mette tout à feu & à sang ; Dieu nous garde de telles charitez. Mais comment le fera-il par iustice ? Sa iustice souffre cet estre de peché, mesme aux damnez & aux demons. Veulent-ils donc qu'il les aneantisse, & aneantisse tous les pecheurs ? Si par misericorde, qu'ils auisent à quoy ils obligent Nostre Seigneur, de remettre en sa grace les demons, les damnez, les impies, & les athées: c'est bien donner d'estranges loix à Dieu.

PAROLES



PAROLES DE LA FILLE.

II. PROPOSITION.

QUE *Jesus Christ* soit tout ce qu'il doit estre, & face disparaistre tout autre estre.

O B I E C T I O N.

Cela est horrible de desirer que Dieu aneantisse tous les estres des creatures ; & pourquoy cela puis qu'il en tire tant de gloire ? quel mal fait la creature à Dieu, si elle ne peut pas estre Dieu ?

R E S P O N S E.

Il continuë tousiours à blasmer ce qu'il n'entend point, & de croire que lon demande l'aneantissement de tout l'estre que Dieu a faict ; au lieu que lon demande l'aneantissement de celuy

qu'il n'a pas fait, & de qui il reçoit
 non gloire, mais deshonneur & des-
 obéissance; car l'estre dont lon deman-
 de la destruction, est celuy qui est op-
 posé à tout ce que Iesus Christ doit estre
 dans nous, & qui l'empesche d'y subsi-
 ster pleinement; ce qui ne peut estre, que
 nostre estre propre & celuy que nous
 auons receu d'Adam, deuenue nostre
 premier principe par son peché, au lieu
 qu'il la voulu estre par son excellence:
 car l'estre que nous auons receu de Dieu
 ne l'empesche pas d'estre & regner dans
 nous, au contraire il est impossible qu'il
 n'y soit, & qu'il n'y regne comme dans
 son bien & dans sa creature; & le
 contraire ne peut estre soustenu que
 par des Manicheens. Par cet estre il
 est vne partie de ce qu'il doit estre dans
 nous, c'est à dire, Createur & Con-
 seruateur de la Nature; & par conse-

quent la Fille ne l'exclud pas, mais le comprend quand elle demande qu'il soit dans nous tout ce qu'il y doit estre, elle desire seulement qu'il face disparoistre tout autre estre, c'est à dire, tout estre par lequel il n'est pas ce qu'il doit estre en nous, & qui empesche son establisement, prenant sa place dans nos ames.

Voilà pour ce qui est de l'intelligence des paroles de la Fille. Car quant aux argumens du Censeur, ils porteront tousiours la marque de son esprit & de sa lumiere: Il dit qu'il ne faut pas desirer que Dieu destruisse l'estre des creatures, parce qu'il en tire tant de gloire: Cela resent le Pelagianisme, car la gloire que Dieu tire de nous ne vient pas de l'estre qu'il nous donne par la creation, mais de celuy qu'il nous donne par la redemption & par la grace, comme

l'Eglise l'enseigne contre les Pelagiens. Il est vray qu'il reçoit aussi quelque gloire de nostre estre naturel, en ce que l'ayant créé, il tesmoigne la grandeur de sa Diuinité : Mais cela ne peut estre appellé tant de gloire, comme parle nostre Censeur, sur tout parmy les Chrestiens ; cela pourroit estre souffert parmy les Payens & les Philosophes : mais dans l'eschole du Fils de Dieu, dans son Eglise, & dans les discours de ses plus hauts & diuins secrets, c'est un crime de parler ainsi, & de constituer dans l'estre de la creation la grande gloire qu'il reçoit des Chrestiens, puis que la gloire que nostre creation luy donne, est de mesme ordre que celle qu'il reçoit des bestes, & des moindres choses inanimées. Dire aussi qu'il ne s'est faiët homme que pour cela, c'est à dire, pour cet estre naturel, &

pour en tirer ceste gloire, est insupportable aux oreilles des Chrestiens, puis qu'il a esté dit tant de fois par l'Eglise & par les saincts Peres, que Dieu ne s'est pas faict homme afin que nous fussons, mais afin que nous fussions sauuez; & que la gloire qu'il pretend de nous, par son Incarnation, n'est pas celle qui procede de nostre estre naturel, mais de la grace où il l'esleue. De toutes lesquelles fautes il est facile de iuger si le Censeur qui faict le Maistre de ceste Fille, ne deuroit pas plustost deuenir son disciple, puis qu'au lieu des grandes veritez qu'elle dit, & qu'il n'entend point, il commet tant d'erreurs que personne ne peut mesconnoistre.

EXAMEN.

Iesus Christ est ce qu'il veut estre d'une volonté absoluë, & il veut

ce qu'il doit. Ainsi il est ce qu'il doit estre; mais il ne veut pas que ce qu'il veut d'une volonté conditionnée, soit tousiours effectiue-ment: moins encore le veut-il faire par puissance & par precipitation, comme le veut ceste doctrine, corrigeant chaque fois les pouvoirs, les vouloirs, & les intentions. Apres, que veut dire faire disparoistre tout autre estre? Nostre Seigneur se repaist-il des apparences? Ce qui disparoist laisse-t'il d'estre? Et s'il est, comment disparoistre à ses yeux? Luther & Calvin disent que les pechez que Dieu pardonne, ne sont pas effacez ny ostez, mais seulement cachez, & qu'ils ne font que disparoistre.

 PAROLES DE LA FILLE.

III. PROPOSITION.

Que la fin de son établissement
 soit pour luy, & non pour l'a-
 uantage de l'ame.

OBJECTION.]

Et comment donc sera-il Sau-
 ueur des ames ? 2. Quelle obliga-
 tion luy aurons-nous s'il ne fait
 rié pour nous ? 3. Cela détruit tou-
 te l'œconomie de l'Euangile ; *Qui*
propter nos homines , &c. descendit
de cœlis. 4. Sous couleur d'honorer
 Iesus Christ, on luy oste la gloire
 infinie de s'estre presque anean-
 ty soy mesme, comme parle saint
 Paul, pour enrichir les hommes.

R E S P O N S E.

Cela est pitoyable de voir l'argu-

ment de ce Censeur ; car qui peut s'op-
 poser au souhait par lequel on veut que
 la fin de l'establissement de Iesus Christ
 dans nous soit pour luy, & non pour
 nous, s'il ne veut qu'il ne soit pas luy
 mesme sa fin, & que son operation se
 termine en nous comme en sa fin der-
 niere ? Or qui le peut vouloir sans bla-
 spheme ? Ainsi le souhait de la Fille est
 saint, & sans difficulté, le prenant
 dans toute la rigueur qu'on voudra.
 Et c'est clairement ce que le Prophete
 dit en des termes encor plus forts, Non
 nobis, Domine, non nobis, sed
 nomini tuo da gloriam. Car quel-
 que chose que Iesus Christ ait operé
 dans nous, il en est en effet tousiours la
 fin, & il est impossible que l'auantage
 de la creature le soit, qui ne peut estre
 qu'un moyen de la gloire qu'il se donne
 luy mesme dans le salut des hommes.

C'est pourquoy toutes les objections du Censeur sont sans apparence, & il ne les auroit pas faites si la passion luy eust permis de peser ces paroles de la Fille, qui n'empesche pas que Iesus Christ ne vueille ce qui est à l'avantage des ames, mais seulement qu'il ne le vueille comme sa fin, & ne rapporte tout à soy. Tellement que ce n'est pas elle qui destruit l'Euangile, & l'Incarnation, mais luy qui en ruine la fin dernière, la constituant dans l'avantage de la creature, & non dans Dieu mesme, & dans sa gloire. Ce n'est pas elle qui renuerse l'obligation que nous auons à Iesus Christ, mais luy qui oze dire que nous ne luy en aurons point, si dans les faueurs qu'il nous faict, il se regarde comme sa fin, & ne s'arreste dans nous mesme. Ce n'est pas elle qui luy oste sa gloire infinie, mais luy qui met la fin de


ses operations plus diuines dans les crea-
 tures, & non dans sa gloire, & con-
 stituë sa gloire infinie à s'estre presque
 aneanty luy mesme, au lieu que la gloi-
 re infinie de Dieu ne peut estre dans ses
 operations temporelles, mais toutes dans
 son estre eternal; & que dans cet ane-
 antissement non seulement ne gist pas
 sa gloire, mais plustost la priuation & le
 desquillemeñt de la gloire & de la clar-
 té infinie qu'il possede de toute eternité
 dans le Pere, comme dit l'Euangile, &
 le mot mesme d'aneantissement le tes-
 moigne. Bref, il est faux que saint
 Paul dise qu'il se soit presque aneanty,
 puis qu'il dit absolument, & sans re-
 striction, qu'il s'est aneanty, & anean-
 ty iusqu'au neant de la mort du corps,
 ne pouuant l'estre iusqu'à celui de l'a-
 me; c'est pourquoy ceste allegation fal-
 sifie la parole de Dieu, comme les au-

res objections ruinent sa Verité.

E X A M E N.

C'est vne chose pitoyable que tous les actes de ceste nouuelle deuotion sont tous faux, ou tous inutiles; le Defenseur aduoie luy-mesme qu'il ne se peut faire autrement que Iesus Christ ne soit la fin; à quel propos donc le souhaiter, & faire de ce souhait vn acte tout diuin? Mais qui a iamais ouï dire que la fin derniere excluë les autres fins qu'ad elles luy sont subordonnées? Ainsi afin que Iesus Christ soit pour luy mesme, pourquoy faut-il qu'il ne puisse estre pour les ames, & à l'auantage des ames? Et remarquez que le mieux qu'on puisse esperer de leurs gloses & de leurs explications, c'est de reduire toute leur spiritualité en fu-

mée. Ainsi ceste proposition avec leur, c'est à dire, est que Dieu soit sa fin dernière ; voilà vn grand miracle , il faut bien tant suer , & tant de mots extraordinaires qui ne signifient rien moins que ce qu'ils veulent ; ils prennent force peine à dire peu de chose.



PAROLES DE LA FILLE

I. PROPOSITION.

5. **S**VFFISANCE. *Qu'il ne soit point en indigence au regard des hommes qui ne luy rendent pas ce qu'ils luy doivent.*

OBIECTION.

Quel bon sens peut-on donner à cela ? 2. les hommes peuvent-ils rendre à Dieu ce qu'ils doiuent, ny

les Anges? Que veut donc dire ce discours? Et puis, quelle indigence est-ce à Iesus Christ que les hommes soient hommes?

R E S P O N S E.

Cela est honteux de voir tousiours cet homme refuter ce qu'il confesse n'entendre point; & c'est encore une honte de voir qu'il n'entend pas ce que tout Chrestien doit entendre, & qu'il le combat par des erreurs que tout Chrestien doit reietter. Ce que la Fille desire que Iesus Christ ne soit pas en indigence au regard des hommes, n'est-ce pas ce que luy dit le Prophete? Vous estes mon Dieu, parce que vous n'avez pas besoin de mes biens. Et ce qu'elle adioust, Que les hommes ne luy rendent pas ce qu'ils luy doiuent; n'est-ce pas une verité que nous auons tous incessamment deuant les yeux par nostre propre ex-

perience? Quelle apparence y a-il donc de dire, que lon ne peut donner un bon sens à ces paroles? Et qui vit iamais Theologien si remply d'obscurité au milieu d'une pleine lumiere? Le desir donc de la Fille est saint & facile, & elle l'explique dauantage par les paroles qu'elle adioust peu apres, Qu'il paroisse glorieusement desinteressé des usages des hommes, monstrant qu'elle souhaite que Iesus Christ face voir qu'il n'est pas en indigence au regard des hommes, & ce d'autant plus qu'ils ne luy rendent pas ce qu'ils luy doiuent, & que de si petits seruices ne scauroient augmenter ses biens & son honneur. D'où paroist l'ineptie des argumens de nostre Theologien, laquelle luy pourroit estre pardonnée, si elle n'estoit releuée d'erreurs inexcusables: Car par quelle Theologie oze-il asseurer que les

hommes ne peuuent rendre à Dieu ce qu'ils luy doiuent ? Que luy doiuent-ils autre chose que l'aimer & l'honorer de toute leur pensée, & de toute leur force ? Et qui doute qu'ils ne le facent parfaitement dans le ciel ? Quelle est donc ceste erreur & ceste heresie qui rend impossible aux bien-heureux mesmes ; & aux Anges l'accomplissement de leur deuoir, & soustient qu'ils sont obligez à ce qu'ils ne peuuent pas faire ? C'est une heresie opposée à celle des Pelagiens, & pire que celle des Calvinistes ; car au lieu que les Pelagiens tenoient que la Loy de Dieu pouuoit estre parfaitement accomplie en ce monde, on dit icy qu'elle ne le peut estre mesme dans le ciel ; & au lieu que les Calvinistes disent qu'elle est impossible à ceux qui sont en ceste vie, on la rend impossible aux bien-heureux mesmes.

E X A M E N.

Le Defenseur recognoist luy
mesme par les paroles du Psalmi-
ste, *Que nostre Seigneur n'a aucune
indigence de nous, ny de nos biens:*
Pourquoy donc luy faire ce sou-
hait? Est-ce pas se mocquer de
Dieu & des hommes? Ne verrons-
nous iamais que de semblables
choses? Nostre Seigneur leur est
fort obligé, de luy souhaitter touf-
jours des choses ou qu'il ne veut
pas, ou qui ne peuuent estre autre-
ment, il y a grande difference d'é-
noncer & de recognoistre vne
grandeur de Dieu comme faisoit
Dauid, ou de luy souhaitter com-
me ils font; le premier est publier
sa gloire, le dernier la diminuer,
car tels souhaits luy sont iniurieux.
Tout souhait presuppose vne in-
certitude;

certitude. Je souhaite la santé & le salut à mon amy, parce qu'il se peut faire qu'il n'ait ny l'un ny l'autre ; souhaitter donc à Dieu qu'il ne soit pas en indigence, c'est croire qu'il y peut deuenir: si c'est auoir les sentimens qu'il faut auoir de luy, ie le laisse à iuger.



PAROLES DE LA FILLE.

II. PROPOSITION.

Q*V'il soit en son tout, & paroisse glorieusement desintéressé aux usages, des hommes.*

OBJECTION.

Voulez-vous oster toute la gloire de Iesus Christ, qui dit que son pain, sa ioye, sa gloire est de conuerser, & conuertir les hom-

îmes ? 2. Les Saincts parlent tout au rebours de cela. 3. Peut-il estre desinteressé de l'usage des hommes , puis ne qu'il fust fait homme que pour mesler ses intersts avec les nostres ?

R E S P O N S E.

Elle ne veut pas que Iesus Christ ne face rien pour les hommes , ny les hommes pour Iesus Christ : mais elle veut seulement que Iesus Christ paroisse desinteressé de leurs usages , & ne les recherche pas comme necessaires à son parfait contentement , lequel il a en toute plenitude dans luy mesme. Qui a-ilen cela qui ne soit saint , conforme à la verité , à la grandeur de Dieu , & au sentiment de tous les Chrestiens ? Que ce Theologien nous nomme donc les Saincts qu'il pretend auoir parlé tout au rebours de cela :

mais qui le peut faire sans impiété?
 Et qui peut pretendre, sans blaspheme,
 que Dieu est interessé dans le service des
 hommes, comme si sans eux il man-
 quoit quelque chose à son entier conten-
 tement? Qui osera dire avec ce Theo-
 logien, qu'il ne s'est fait homme que
 pour mesler ses interests avec les nostres,
 comme s'il gaignoit quelque chose avec
 nous, comme nous gagnons avec luy?
 car c'est ce qui signifie, en François,
 mesler ses interests avec les nostres. Et
 qui pourra souffrir que lon soustienne
 que le dessein de l'Incarnation ne con-
 siste qu'en cela, & qu'il ne consiste pas
 principalement à procurer à Dieu des
 serviteurs, & des adorateurs qui l'hon-
 norent & le glorifient eternellement,
 sans qu'il ait pourtant nul interest dans
 leurs honneurs & leurs services? Qui
 a iamais oüy qu'il ait dit luy mesme,

îmes ? 2. Les Saincts parlent tout au rebours de cela. 3. Peut-il estre desinteressé de l'usage des hommes, puis ne qu'il s'est fait homme que pour meller ses interets avec les nostres ?

R E S P O N S E.

Elle ne veut pas que Iesus Christ ne face rien pour les hommes, ny les hommes pour Iesus Christ : mais elle veut seulement que Iesus Christ paroisse desinteressé de leurs usages, & ne les recherche pas comme necessaires à son parfait contentement, lequel il a en toute plenitude dans luy mesme. Qui a-il en cela qui ne soit saint, conforme à la verité, à la grandeur de Dieu, & au sentiment de tous les Chrestiens ? Que ce Theologien nous nomme donc les Saincts qu'il pretend auoir parlé tout au rebours de cela :

mais qui le peut faire sans impieté?
 Et qui peut pretendre, sans blaspheme,
 que Dieu est interessé dans le service des
 hommes, comme si sans eux il man-
 quoit quelque chose à son entier conten-
 tement? Qui osera dire avec ce Theo-
 logien, qu'il ne s'est fait homme que
 pour mesler ses interests avec les nostres,
 comme s'il gaignoit quelque chose avec
 nous, comme nous gagnons avec luy?
 car c'est ce qui signifie, en François,
 mesler ses interests avec les nostres. Et
 qui pourra souffrir que lon soustienne
 que le dessein de l'Incarnation ne con-
 siste qu'en cela, & qu'il ne consiste pas
 principalement à procurer à Dieu des
 seruiteurs, & des adorateurs qui l'hon-
 norent & le glorifient eternellement,
 sans qu'il ait pourtant nul interest dans
 leurs honneurs & leurs services? Qui
 a iamais oüy qu'il ait dit luy mesme,


avec ce Censeur, que son pain, & sa gloire est de conuerſer & conuertir les hommes? Certes ces diſcours ſont inſupportables, & indignes d'un eſprit Chreſtien; & il n'y a celuy qui ne voye, que puis que nous deuons meſme nous deſintereſſer avec Dieu, & le ſeruir par charité, & non par intereſt, ſans auoir égard au beſoin que nous en auõs, à plus forte raiſon il eſt deſintereſſé avec nous, & n'a nul intereſt ny en ce qu'il nous donne, ny en ce qu'il reçoit de nous, puis qu'il n'a nul beſoin ny de l'un ny de l'autre, & poſſede tout dans luy meſme.

EXAMEN.

Il eſt vray que Dieu eſt pleinement deſintereſſé des vſages des hommes, pour ce qui regarde ſa gloire eſſentielle, mais auſſi il eſt impertinent de le luy ſouhaitter, &

de l'y conuier. Il ne veut pourtant pas paroistre desinteressé de nous, & de nostre salut, comme veulent nos Spirituels ; en toute l'Escripture sainte il paroist non seulement interessé pour nous, mais avec langueur, avec inquietude, & avec souffrance il languit pour l'espouse, comme l'espouse fait pour luy. C'est que sa bonté est si grande pour nous, & son amour si violét, qu'ils luy donnent les mesmes dispositions pour les effects & pour les apparences que les meres ont pour leurs enfans, & les poules pour leurs pouffins ; c'est luy mesme qui parle de la sorte: Appelleron cela paroistre desinteressé ? Mais il a eu tort d'en vser ainsi, nos zeles ne le peuuent souffrir. Saint Augustin dit qu'il faut croire que

ce que Dieu fait est tousiours le mieux fait; il veut paroistre intereffé en nostre salut par amour & bonté, & ces gens ne le veulent pas; ne se laisseront-ils iamais de se mettre au dessus de Dieu, pour reformer ses conseils & ses voyes? Il est encore vray que Iesus Christ reçoit de veritables intereffs en nostre salut, non pour sa gloire essentielle comme Dieu, mais pour sa gloire comme homme, & comme Redempteur, & pour la gloire mesme accidentelle de son Pere, & de luy comme Dieu. Et que cela suffit pour faire voir l'erreur de la proposition.



PAROLES DE LA FILLE.

I. PROPOSITION.

6. **S**ATIETE'. *Qu'il demeure en luy mesme qui est le pain de vie.*

OBIECTION.

Voila qui est diametralement opposé au dessein de Dieu, en se donnant dans le saint Sacrement; il ne se donne qu'afin de demeurer dans nos cœurs, & icy on desire tout le contraire; n'est-ce pas renverser le dessein de Iesus Christ par Iesus Christ mesme?

R E S P O N S E.

Ie ne sçay pas ce que veut dire icy, renverser le dessein de Iesus Christ par Iesus Christ mesme, ie ne suis pas capable de ceste pointe, mais ie sçay bien

que ce Theologien erre dans les principes, s'imaginant que Iesus Christ ne peut demeurer en luy mesme, & tout ensemble dans nous par le saint Sacrement; par ce moyen on prouueroit que sortant de son Pere pour venir dans le monde, il n'est pas demeuré dans le Pere; ou qu'estant demeuré dans le Pere, comme personne n'en peut douter, il n'en est pas sorty & venu dans le monde; ou qu'estant sorty de la terre & remoné vers son Pere le iour de l'Assension, il n'est pas demeuré sur la terre; qui est un des argumens par lesquels les Huguenots veulent ruiner ce tres-saint Sacrement. Que s'il ne repugne pas qu'il soit sorty du Pere, & qu'il y soit demeuré tout ensemble, & qu'il soit allé au Pere & demeuré en mesme temps dans le monde, comme la Foy nous l'apprend, il faut aduoüer

qu'il ne repugne pas dauantage que demeurant dans nous, il demeure tout ensemble dans luy mesme; & ce Theologien ne peut inferer que mal à propos de ce qu'on veut qu'il demeure en luy mesme, qu'on ne veut pas qu'il demeure dans nous, & qu'on renuerse le dessein de Iesus Christ, car on veut l'un & l'autre avec Iesus Christ; & ainsi c'est luy seul qui renuerse son dessein, ne voulant qu'il demeure dans luy mesme, & qu'il y soit tousiours prenant son repos, son contentement, sa satisfaction, & son parfait bon-heur dans sa nature, comme dans le pain, & dans la source de vie eternelle, tant pour luy mesme que pour les autres, puis que le Pere luy a donné d'auoir la vie dans luy mesme, comme il dit dans l'Euan-gile.

Comme il n'y a que deux ou trois pensées mal digerées en tout ce Chappelet, on n'y void que les mesmes choses, & les mesmes redites; on souhaite que Iesus Christ demeure en foy, & il ne peut qu'il n'y demeure; qui a-t'on peur qui l'empesche d'y demeurer? S'ils ne faisoient ces souhaits qu'une fois, on leur pardonneroit; mais d'en faire sans cesse, & d'establir en ces souhaits leurs plus hautes & sublimes spiritualitez, il n'est pas tolerable. Aussi sont-ils si fort hors de propos, qu'il n'y a personne qui lisant celuy-cy, ne iuge qu'on veut que Nostre Seigneur ne vienne pas en nous, de peur de faire tort à sa grandeur. Et ceste intention paroist par tout ce Chappelet, mais

la raison en est bien iudicieuse, parce qu'il est le pain de vie; elle concluroit plustost le contraire, car le pain ne fut iamais fait pour demeurer en soy, mais pour entrer en autruy, & se destruire luy mesme pour le nourrir; & de fait, au tres-sainct Sacrement où il est nostre vray pain de vie, il y perd vn estre local pour entrer en nostre ame, & luy servir de nourriture.



PAROLES DE LA FILLE.

II. PROPOSITION.

Q*V'il ne s'engage point en la disette des hommes.*

OBIECTION.

Cela est contre le vray dessein de Dieu en l'Incarnation, & spécialement dans la sainte Eucharie-

stie, qui n'est faite que pour cela, & on veut s'opposer au dessein de Dieu. 2. Quel engagement y peut-il auoir en cela qui blesse la gloire de Dieu? 3. Cela est tout contraire à saint Paul, qui adore Dieu de ce qu'il s'est fait pauvre, pour soulager la disette des hommes.

R E S P O N S E.

Il s'esgare tousiours du discours de la Fille, dans des impietez lesquelles il est impossible d'éuiter, en combattant des veritez irrefragables; car elle veut que Iesus Christ ne s'engage point dans la disette des hommes, pour rien desirer d'eux, quoy qu'il ait retranché ces dernieres paroles, c'est à dire, comme declarent les suivantes, Qu'il ne s'assujettisse pas à desirer rien des hommes, comme si leurs honneurs & leurs services luy estoient necessaires, mais qu'il

les traite avec toute sorte de desgage-
 ment & de liberté, comme se pouuant
 passer d'eux, & n'en exigeant rien que
 pour leur besoin, & non pour le sien,
 parce qu'il a son rassasiement diuin
 dans la veüe de sa propre gloire. Or
 cela estant ainsi, qui peut dire qu'on
 s'oppose au dessein de Dieu dans l'In-
 carnation & dans l'Eucharistie, puis
 qu'encor qu'il ait resolu de demander
 quelque chose de nous, il n'a pourtant
 pas resolu de le faire avec obligation
 & assujettissement, mais avec une
 volonté souueraine & independante,
 comme un Dieu infiniment remply de
 ses biens & de sa propre gloire, & ne
 pouuant recevoir de nous nul contente-
 ment qu'il ne possede eternellement dans
 luy mesme? Qui peut entrer dans la
 pensèe du contraire? Et qui peut dire
 qu'elle ne blesse pas la gloire de Dieu,


Et qu'elle repugne à saint Paul, disant : Que Dieu s'est fait pauvre pour soulager la disette des hommes ? Qui a-il de plus ridicule que la maniere de ce Censeur contre des choses si saintes ?

EXAMEN.

Ce sont tousiours les mesmes fautes & les mesmes choses inutiles ; on souhaite que Iesus Christ ne s'engage point dans la disette des hommes, & le Defenseur aduoüe luy mesme qu'il ne le peut, dans le sens qu'il donne à la proposition, & qu'il n'y peut auoir d'engagement : si cela est, pourquoy donc faire de ces souhaits en l'air ? Mais Iesus Christ veut le contraire, il s'y veut engager, & engager sa propre vie ; & tous les iours encor dans le saint Sacrement, il

y engage & son corps & son sang. Et c'est bien parler de parler de la sorte, & il n'y a si petit escolier en Theologie qui ne sçache bien que ces engagements ne sont pas engagements de preiudice, mais effets & signes d'amour. Ce qui est au commencement de l'article n'est pas mieux digeré; que Iesus Christ ne souffre point de delay dans l'accomplissement de ses desseins. Il ne sera donc plus patient, & n'attendra plus les pecheurs à penitence, tout se fera en vn moment: voilà qui va bien viste; mais le mieux que i'y trouue, c'est que Nostre Seigneur n'en fera rien pour tous leurs beaux souhaits, il sera toujours ce qu'il est, c'est à dire, tout autre qu'ils ne veulent qu'il soit, patient, plein de bonté & de mise-

ricorde, au lieu qu'ils le rendent vn
Dieu de bronze, inexorable, & in-
sensible.



PAROLES DE LA FILLE.

I. PROPOSITION.

7. **P**LENITUDE. *Que l'effusion
des graces de Iesus Christ re-
tourne à luy mesme.*

O B I E C T I O N.

Il donne ce sainct Sacrement
pour nous donner ses graces, & ia-
mais Dieu ne se repent de ce qu'il
nous donne, & iamaïs ne retire ses
graces si nous ne les perdons; Que
veut-il donc dire, priant Dieu
qu'il retire tout à foy?

R E S P O N S E.

*A la verité ces objections sont bien
grossieres,*


grossieres , qui a-il de plus saint & de plus conforme à l'honneur que nous devons à Dieu , que de vouloir que l'effusion qu'il fait de ses graces sur les hommes ; remonte & retourne vers luy? Et comme elle dit peu apres, que la reception que les ames en font , soit un rejaillissement en luy par une entiere reference , c'est à dire , que nous rapportions & ramenions à luy par un fidel hommage les graces qu'il nous donne , sans les laisser escouler & se perdre. Qui peut ouïr sans pitié les obiections que ce pauvre homme fait contre ceste lumiere qu'il ne voit point , & qu'il entreprend toutefois d'obscurcir, en nous disant que Dieu ne se repend point de ce qu'il donne , & qu'il ne retire point ses graces si nous ne les perdons ?

E X A M E N.

Que Iesus Christ ait son com-

pte en toutes choses, voila des façons de parler bien diuines, & bien conuenables à Nostre Seigneur, & qui avec cela n'ont aucun sens ; car ce compte s'entend ou de celuy qu'il prend en luy mesme, & par luy mesme, quelque vsage ou mesusage que facent les ames de ses graces, ou de celuy qu'il cherche dans les ames. Si du premier, le souhait est tousiours inutile ; si du second, il est extrauagant, car c'est souhaitter qu'il n'y ait personne de damné, & non seulement de damné, mais qu'il n'y ait personne qui ne soit saint & tres-parfait. C'est là le compte que Nostre Seigneur cherche dedans les ames : *Hæc est voluntas Dei, sanctificatio vestra* ; Mais cherche sans faire violence au franc arbitre, c'est pour-

quoy il ne le trouue pas, & ne le trouuera iamais en la terre, & tous ces beaux souhaits ne luy feront pas trouuer. Les paroles suivantes n'ont pas vn meilleur sens, & ne se peuuent expliquer ; par exemple, pour conuertir vne ame Dieu luy donnera vne bonne pensée, ou vn desplaisir de ses fautes, ou vne crainte de l'enfer : faudra-t'il donc que ceste crainte de l'enfer rentre en Nostre Seigneur, ce regret, ou ceste pensée ? Car tout cela est grace, & effusion de grace. C'est vne grande pitié d'estre si amoureux de ses pensées, & plus encor de les vouloir defendre à quelque pris que ce puisse estre.



PAROLES DE LA FILLE.

II. PROPOSITION.

Qu'il ne donne rien qu'à soy
mesme, & pour soy mesmesme.

OBJECTION.

Erreur, tout l'Evangile dit le
contraire; *Veni ut vitam*, &c.

R E S P O N S E.


Il continuë dans son égarement,
apres auoir dit qu'il face remonter à soy
tout ce qu'il donne; elle conclud en di-
sant qu'il ne donne rien qu'à soy mesme,
& pour soy mesme, parce que si tous
ses dons reuiennent à luy, il ne donne-
ra rien qu'à luy & pour luy mesme,
comme il est manifeste par les simples
termes. Et cependant ce Censeur crie
que c'est une erreur, & que tout l'E-

*u*angile dit le contraire , parce qu'il dit:
 Veni vt vitam habeant; Comme si
 l'*E*uangile ne vouloit pas que la vie
 que *I*esus *C*hrist nous donne , soit rap-
 portée à luy, & reuienne toute à son
 hōneur & à son hommage, & qu'ainsi
 elle soit toute à luy, & pour luy.

E X A M E N.

Encore que tout ce que Dieu
 fait , & tout ce qu'il nous donne
 soit referé à luy mesme , comme à
 la derniere fin , il est faux neant-
 moins de dire qu'il ne face les cho-
 ses que pour luy mesme , car il les
 fait aussi pour nous ; c'est pour
 nous qu'il a fait incarner son Fils ,
 & il nous l'a donné ; & ce Fils s'est
 luy mesme donné à nous , *Nobis*
datus , nobis natus ; Si la proposition
 estoit affirmatiue , elle se pourroit
 soustenir, que Dieu referast toutes

choses à luy meſme , & que tout ce qu'il dōneroit retournast à ſa gloire , mais ce ſouhait ſeroit encor de la nature des autres , & auſſi ſuperflus , car Dieu le fait bien ſans que nous le ſouhaittions ; mais eſtant negatiue, elle eſt excluſiue , & par conſequent fauſſe ; car il n'y a aucune repugnance que Dieu face les choſes pour luy & pour nous , pour luy principalement , & pour nous moins principalement , encor que le fruit principal nous en reuienne , c'eſt à dire , principal en quelque maniere , ce qui n'eſt pas icy à expliquer. Si ces grands Docteurs qui ſe mocquēt de la Philoſophie & de la Theologie ſcolastique , les ſçauoient vn peu mieux qu'ils ne font , ils ne feroient pas tant de fautes.



PAROLES DE LA FILLE.

III. PROPOSITION.

Q*V'il ne souffre plus de dechet
dans l'incapacité des creatures.*

OBIECTION.

Cela est ridicule & impossible ;
tandis que la creature sera creatu-
re, elle sera incapable d'esgaler le
merite de Dieu ; & si cela estoit, il
ne faudroit plus se communiquer
à la Vierge Marie, & aux Saints
de Paradis : car estant finis, ils sont
dans l'incapacité, & Dieu y trou-
ue du dechet, & il est impossible
autrement.

RESPONSE.

*Qui veit iamaïs prendre plus de
trauers un discours, que ce Censeur*

prend celuy de la Fille, le combattant en homme qui n'entend pas seulement les simples termes ? elle desire que Iesus Christ resspandant ses graces sur les hommes, ne souffre plus ce dechet dans leur incapacité, c'est à dire, comme il appert par toutes les circonstances du discours, & par ce qu'elle a dit peu auparavant, que tout ce qu'il leur donne reuienne à luy, & qu'il le luy rapportent entierement sans qu'il y souffre plus de dechet, sans qu'il s'en perde rien par l'incapacité qu'ils ont de recevoir ses dons ; mais qu'il y trouue son compte, & qu'on les luy rende en la mesme mesure qu'il les a donnés, suiuant la parabole des talens, qui oblige à les faire croistre encor dauantage ; apres cela qui ne seruira de voir que ce Docteur rencontre si bien, & que pour toute objection il allegue que la creature est inca-

pable d'égaliser le mérite de Dieu ? Je passe sous silence ce qu'il dit que Dieu souffre du dechet dans la Vierge, & dans les Bien-heureux, dans lesquels il est glorieux & triomphant, estant impossible qu'il souffre du dechet dans la subordination parfaite de la creature, telle qu'elle se trouue dans le ciel, puis qu'il y est dans le rang & dans la souveraineté qui luy appartient, laquelle possédant plus dans les bien-heureux que dans nulle creature, & dans la sainte Vierge que dans nul bien-heureux. Je ne sçay si on doit souffrir que ce Censeur declare que Dieu trouue en eux du dechet, car ce qu'ils sont creatures & inégaux à Dieu, n'est pas en luy imperfection ny dechet, mais en eux, & vient de ce qu'ils sont ses suiets, & luy le souverain, ce qui ne sçauroit estre s'ils luy estoient égaux ; c'est pour-

quoy ceste inégalité est la mesure & le
sujet de sa grandeur.

EXAMEN.

Ce flux & ce reflux de grace est si
impertinent, qu'il ne merite pas
qu'on s'y amuse. Le Soleil respand
sa lumiere, & beaucoup de ceste
lumiere se trouue bien souuent in-
utile, perduë, & mesme domma-
geable; le Soleil pour cela en est-il
moins remply, & en souffre-t'il
quelque perte, si ceste lumiere qui
n'a pas esté vtile ou bien em-
ployée ne remonte & ne rentre en
luy mesme? Et Nostre Seigneur,
Soleil plus abundant en grace, en
fera-t'il plus pauvre? En fera-t'il
moins riche? Luy, *Diues in omnes*;
Si quelqu'un fait mauuais vsage de
ses graces, ou n'en fait pas l'vsage
tout entier? Peut-on auoir de plus


basses pensées pour Dieu? Ils en
 parlent comme lon feroit d'un
 marchand qui auroit presté ou
 donné de l'argent à quelqu'un pour
 en retirer du profit ; & si au lieu
 d'en profiter il le perd ou le ioüe,
 le marchand s'en trouue incom-
 modé & appauury. Mais ce n'est
 pas encor toute l'absurdité de la
 proposition, elle dit que la creatu-
 re ne peut porter que Dieu soit
 pleinement en elle, & c'est en leur
 langage y estre avec du dechet. Il
 s'ensuit donc de là qu'il n'y doit
 pas estre du tout puis qu'il n'y doit
 plus souffrir de dechet ; aussi est-ce
 là le vray sens de toute ceste belle
 doctrine, qui supposant vne chose
 tres-fausse en fait suiure mille au-
 tres faussetez. Il, presupposez que
 Dieu reçoit du preiudice & du

dommage de s'abbaisser dedans les creatures, de se communiquer à elles, & leur faire des graces, parce qu'elles ne sont pas dignes de sa grandeur; qu'elles ne reçoivent pas ses graces qu'avec du dechet; que les vnes en font mauuais vsage, & les meilleures mesmes n'en font pas ordinairement l'vsage tout entier, & selon toute l'estenduë de la grace; & par vn zele mal réglé, mais pourtant qui ne leur couste guere, ils veulent qu'à cause de cela Dieu se retire en soy mesme, qu'il laisse là les creatures dans leur indignité, dans leur incapacité, & dans leur inegalité; & voila tout l'esprit & toute la spiritualité de ce beau Chappelet. Pauures gens qui ne voyent pas que si d'un costé Dieu s'abbaisse au dessus de luy, & si

mesme il ne reçoit pas les effets de
ses graces qu'il voudroit dans les
ames, en cela mesme sa bonté y
reluit dauantage, & il aime autant
sa bonté que sa grandeur; & si
mesme il pouuoit preferer l'une à
l'autre, il la prefereroit; & c'est
peut estre ce qu'a voulu toucher
Dauid, disant de ses misericordes:

*Misericordiae eius super omnia opera
eius*; Et cela dedans son instinct
aussi bien que dedans ses œuvres.

Et ces reformateurs de deuotion
semblent ne vouloir tendre qu'à le
prier de sa bonté, de son amour,
de sa misericorde, & de luy en
vouloir interdire tous les effets &
tous les tesmoignages.



PAROLES DE LA FILLE.

I. PROPOSITION.

8. **E**MINENCE. *Qu'il face une separation de grandeur entre luy & la creature.*

OBJECTION.

N'est-elle pas faite? Et il est impossible que Dieu ne soit separé de la creature; que veut donc dire ce discours releué de paroles qui ne signifient rien?

RESPONSE.

Mais plustost que veut dire ce langage contre un discours où vous n'entendez rien? La separation essentielle de Dieu & de la nature est bien faite, & il est impossible qu'elle ne soit pas: mais la separation des grandeurs &

des droicts de Dieu & de la creature n'est pas faite, les hommes meslant tous les iours les droicts & les grandeurs de Dieu avec les leurs, & usurpant ces priuileges & ces preeminences par vne confusion qui ne sera demeslée qu'à la fin du monde, lors que tout sera sous les pieds de Iesus Christ, comme dit saint Paul, & qu'il entrera dans la pleine & entiere possession de ses droicts & de son Royaume, faisant cesser les usurpations qui s'en font incessamment par les creatures. Voila la separation de grandeur qu'elle desire que Iesus Christ face entre luy & la creature; laquelle n'entendât nullement, comme vous testemoignez par vos objections esloignées de toute apparence; vous deuez craindre la peine qui est preparée à ceux qui ne veulent point s'apere ad sobrietatem.


E X A M E N.

Quand on veut separer les biens de diuerses personnes, cōme dans l'Ecriture ceux d'Abraham d'auec ceux de Loth , il est indubitable qu'il faut presupposer que les vns & les autres en ont, & mesme qu'il y a quelque sorte d'égalité, ou au moins de proportion. Or il n'y en a point, & n'y en peut auoir entre les grandeurs de Dieu & celle de la creature; & si ces esprits estoient assez constans en leurs maximes, quelles grandeurs trouueroient-ils en des neants qui ne sont que péché? & n'y en ayant point, comment est-ce que Dieu separera les siennes d'auec les leurs? N'est-ce pas bien penser de Dieu que de le considerer en communauté de biens, de droiçts, & de grandeurs
auec

avec les hommes, & pour l'obliger le prier d'en faire la separation? Est-ce pour éviter le procez ou debat comme entre Lot & Abraham? Mais ils diront que ces grandeurs des creatures sont grandeurs vsurpées sur Dieu, ils diroient mieux imaginées, car ce qu'on vsurpe sur quelqu'un est reel, & les creatures ne sçauoient vsurper aucune réelle grandeur de Dieu: c'est donc tres-mal parler de parler comme la proposition, mesme selon leurs explications, lesquelles maintenant ils trouuent où ils peuuent, & comme ils peuuent; car il est aisé de voir qu'elle sonne toute autre chose, & qu'en tout ce liure l'unique dessein qui s'y voit, est de vouloir que Dieu se tienne dans soy mesme, sans

L

abaissement & communication avec les creatures, de peur de faire tort à sa grandeur, & cela seul se dit en diuerfes paroles.



PAROLES DE LA FILLE.

II. PROPOSITION.

Q*U'il soit vn Dieu Dieu, c'est à dire, se tenant dans ses grandeurs diuines.*

OBIECTION.

Voila qui est bien hors de propos, parlant du saint Sacrement qui est de communion & de communication, desirer qu'il ne se communique pas. 2. Desirer que Dieu soit Dieu; & peut-il estre autrement? il n'est pas en sa puissance qu'il ne le soit. 3. En parlant

icy à Iesus Christ comme à vn homme, & vne humanité dans le Sacrement; est-ce icy où il faille dire cela? Et quoy que Dieu soit Dieu, ce Sacrement n'est pas fait afin que Dieu soit Dieu, mais afin qu'il se communique à l'homme, & qu'il s'incorpore à Dieu. Estre bien aisé que Dieu soit Dieu, cela est bon, mais desirer qu'il soit ce que nécessairement il est, & ne peut estre autrement; quel grand mystere en cela? Si vous disiez qu'il fust cognu & adoré, cela seroit bon.

R E S P O N S E.

Je suis las de vous reprocher vostre presumption, il faut simplement vous instruire; elle ne dit pas qu'elle veut que Dieu soit Dieu, mais que Iesus Christ soit un Dieu, expliquant en

suite ces paroles par celle qu'elle adiou-
 te ; Dieu , c'est à dire , se tenant dans
 ses grandeurs diuines. Ce qui deuoit
 vous faire entendre, qu'en disant qu'elle
 souhaite que Iesus Christ soit un
 Dieu , elle souhaite qu'il se tienne dans
 ses grandeurs diuines , sans souffrir
 qu'on les usurpe sur luy , comme elle
 a dict peu auparauant. Ainsi elle
 renuerse tout ce que vous begayez con-
 tre elle , & faict paroistre vos ima-
 ginations ridicules ; car c'est une gran-
 de extrauagance d'inferer qu'elle veut
 que Iesus Christ au saint Sacre-
 ment ne se communique pas , au con-
 traire il ne separe iamais mieux ses
 grandeurs de la creature , il ne reuiert
 iamais mieux dans ses droicts , & ne
 fait mieux rentrer la creature dans sa
 bassesse que quand il se communique à
 elle ; & plus il se communique , plus il

le fait , parce que la grace fait quitter à la creature toutes les iniustes pretentions qu'elle auoit sur luy , le remet en paisible possession de ce qui luy appartient , & fait auoüer à l'ame son indignité , & son neant. C'est pourquoy l'Apostre appelle souuent la grace de Iesus Christ , sa gloire , pource que par elle il est exalté & glorifié dans les ames , & reçoit le vray hommage qui luy est deü en qualité de Dieu : Mais le François que vous n'entendez point vous a trompé ; vous auez creu que disant qu'il se tienne dans ses grandeurs diuines , elle a voulu dire qu'il ne vienne & ne se communique point à nous ; au lieu qu'elle veut dire qu'il se maintienne dans les grandeurs & les droicts qui luy appartiennent comme à un Dieu , & n'endure point que les creatures les vsurpent. Vous vous mescon-

tez aussi de beaucoup quand vous la
voulez empescher de souhaitter que Je-
sus Christ soit un Dieu dans le saint
Sacrement, en y tenant son rang & ses
preeminences diuines, & que vous pre-
tendez qu'elle ne doit parler à luy dans
ce saint Sacrement que comme à un
homme, & qui plus est à une huma-
nité. Chose estrange, que vous osiez
ainsi rabbaïsser le Fils de Dieu dans
un Sacrement si diuin, & ne veuilliez
pas seulement qu'on le considere comme
un homme, mais comme une humanité!
Je n'entreray pas icy dans l'explication
d'un tres-haut mystere que vous n'en-
tendriez pas, quoy qu'il soit dans la tra-
dition de nos Peres, & de l'Escripture
sainte, & enfermé dans ce Sacrement,
& qu'il serue de fondement à tout le
discours de la Fille: Je me contenteray
de vous dire que vous choquez la do-

étrine la plus commune & ordinaire de la Theologie , qui enseigne que Iesus Christ est dans ce Sacrement avec toutes ses grandeurs & toute sa maiesté , glorieux & triôphant, & que sa Divinité n'y est pas moins cōprise que son humanité, & qu'il ne le regarde pas moins comme Dieu que comme homme. Cela estant , comment pouuez-vous reprendre ceste Fille de le considerer comme il est ? Car quant à ce que vous dites que ce Sacrement n'est pas fait afin que Dieu soit Dieu , vous rentrez dans vos illusions , puis qu'encor qu'il ne soit pas fait afin que Dieu soit Dieu , il est pourtant faict afin que Iesus Christ y soit un Dieu , c'est à dire , se tenant dans ses grandeurs diuines , comme dit la Fille dans le discours que vous attaquez , & que vous ne pouuez pas seulement rapporter avec fidelité. P'obmets

d'autres impertinences , comme quand vous dites que l'homme s'incorpore en Dieu , qui est une maniere de parler incognuë dans l'Ecriture sainte & dans l'Eglise , parce que quand il s'agit de l'incorporation des hommes , on dit toujours qu'elle se fait dans Iesus Christ, & non en Dieu simplement ; car Dieu considéré en soy n'ayant point de corps , nous ne sommes pas incorporer en luy , mais en Iesus Christ , qui ne signifie pas seulement un Dieu , mais un homme Dieu , dans le corps duquel se fait nostre incorporation lors que nous deuenons ses membres.

EXAMEN.

Il faut de perpetuels paradoxes, & de perpetuels contre-sens pour donner quelque sens à toutes ces propositions. Quand les infideles & heretiques ont impugné le my-


stere de l'Incarnation, & celuy de l'Eucharistiē, ç'a esté principalemēt objectant qu'il estoit indigne de Dieu d'entrer en de si grādsabbaissemens, auilissement, & aneantissement, cōme parle S. Paul, & iamaïs l'Eglise ne s'est auisée de respondre que plus il s'abbaisse & se comm^uni-que, plus il demeure en ses grandeurs; plus il vient en nous, plus il demeure en luy & en ses droicts diuins, paradoxes, oppositions, & contrarietez. Elle a bien respondu, qu'il a esté digne de sa bonté de s'abbaisser ainsi, de se communiquer, & comme de sortir de soy-mesme pour s'vnir à nostre nature. Quel des Pères a iamaïs dit, ny l'Escriture mesme, que Nostre Seigneur est entré en sa Diuinité, quād il s'est incarné? Il abiē dit luy

mesme qu'il en estoit sorty : *Ega-
 xini à Patre* ; Et quand il y re-
 tourne par son Ascension , il dit
 bien qu'il laisse le monde ; quand il
 vient il ne dit pas qu'il s'en va , &
 quand il s'en va il ne dit pas qu'il
 vient ; mais a ces nouueaux Spiri-
 tuels le blanc est noir , le noir est
 blanc , la sortie est vne entrée , l'en-
 trée est vne sortie , toutes choses
 sont toutes choses , Iesus Christ
 s'esleue en sa Diuinité quand il s'ab-
 baisse dans le saint Sacrement ; il
 rentre en ses grandeurs diuines
 quand il s'vnt au neant de la crea-
 ture ; est-ce pas se mocquer du
 monde , ou plustost se faire moc-
 quer d'eux que de parler ainsi ?
 Quand par quelques inductions &
 meditations on trouueroit quel-
 qu'vnes de ces pensées , les faut-il

exprimer ainsi , & palrer tout à contre-sens? Ainsi de dire que c'est dans le saint Sacrement que Iesus Christ est vn Dieu , & vn Dieu Dieu , se tenant dans ses grandeurs diuines , n'est-ce pas bien extrauaguer ? Il est vray qu'il demeure Dieu dans le saint Sacrement , & aussi grand qu'il est dedans le ciel : mais iamais personne bien censé ne l'a considéré dans le Sacrement comme dedans le Sacrement , pour y trouuer ses diuines grandeurs , & les grandeurs de sa Diuinité ; au contraire , vn des plus grands efforts que la Foy puisse faire , c'est de le croire Dieu , & de le croire dás le saint Sacrement. Les Peres dans l'ancien Testament souhaittoient que le Fils de Dieu deuint vn Dieu homme ; & les Saints du nouueau

ont loüé Dieu de ce qu'il l'estoit. Ces nouveaux Saincts, par vn contraire esprit, souhaitent qu'il reuienne vn Dieu Dieu, vn Dieu Dieu qui est opposé à vn Dieu homme; & il est vray que dedans leurs maximes c'est vn tort & vn preiudice au Fils de Dieu d'estre homme, & de se raualer ainsi, & que ne voulant que sa pure gloire & la seule grandeur de sa Diuinité, ils ont quelque obligation, pour suiure leurs maximes, de souhaiter l'aneantissement de l'vnion hypostatique, afin que Dieu demeure seulement en soy mesme, en sa seule Diuinité, & la nature humaine en son neant, en son peché, en son indignité. Mais choisir le saint Sacrement pour souhaiter que Iesus Christ y soit vn Dieu

Dieu, & se tenant dans ses grandeurs diuines, il est bien à propos & bien approprié au Sacrement, qui feroit plustost le contraire si le contraire pouuoit estre, car ce Sacrement, par la force du Sacramēt, & comme on exprime en Theologie, *Vi verborum*, non seulement cache, voile, & abbaisse la vie & la Diuinité de Nostre Seigneur au delà de toute imagination humaine, mais luy osteroit mesme la vie, & la separeroit de la Diuinité, si ce n'est qu'il est immortel, qu'il ne peut plus mourir, & que l'ynion hypostatique est indissoluble: *Quod Verbum semel assumpsit, numquam dimisit*; Et c'est pourquoy plusieurs Theologiens establisent l'essence du Sacrifice en la Consecration, à cause de toutes ces destructions.



PAROLES DE LA FILLE.

I. PROPOSITION.

9. **P**OSSESSION. Tout doit estre possédé de Iesus Christ.

O B I E C T I O N.

Cela est tres-faux , l'Evangile dit le contraire & les Theologiens, comment doit-il estre possédé des reprouvez ?

R E S P O N S E.


La passion vous emporte , & vous fait prendre à rebours ce que vous voyez : vous voulez refuter ceste proposition , tout doit estre possédé de Iesus Christ , & vous supposez qu'elle dit le contraire , à sçavoir , toutes choses doivent posséder Iesus Christ , alleguant qu'il ne peut estre possédé des reprouvez ;

qui est vne opposition impertinente au regard des paroles de la Fille, & n'est qu'un effet de vostre égarement ; car quant à ce qu'elle dit, que tout doit estre possédé de Iesus Christ, cela est si vray, si notoire, & si expressément enseigné dans l'Escripture, que vous n'oserez iamais le contester, si vous n'auçz dessein de vous perdre.

E X A M E N.

Il est certain que les demons & les damnez ny ne possèdent Iesus Christ, ny ne sont possédez de Iesus Christ, & iamais personne du monde, parlant du pouuoir & empire qu'il a sur eux, ne l'appella vne possession : Et quand on dit que Iesus Christ possède vne ame, ou qu'une ame possède Iesus Christ, on n'entendit iamais qu'une possession de grace ou de gloire, &

tout l'article mesme ne parle & ne se peut entendre que de possession de grace. Mais l'orgueil ne peut auoüer defaillir.



PAROLES DE LA FILLE.

II. PROPOSITION.

Rien n'est digne d'estre possédé de *Iesus Christ.*

OBIECTION.

La Vierge Marie est digne, selon l'Eglise & tous les Docteurs, *Vt dignum filij tui habitaculum.* 2. L'ame qui est en grace, & cela au dire de tous les Saints.

R E S P O N S E.

Je ne sçay qui sont tous ces, &c. mais ie sçay bien que vous vous trompez doublement, premierement en ce que

que vous mettez la sainte Vierge au rang des autres creatures, & la comprenez dans des propositions generales qui les regardent, au lieu qu'elle en est quasi tousiours exceptée avec son Fils, constituant un ordre à part comme luy, esleué au dessus de tous les hommes & de tous les Anges. Secondement, parce que la Vierge mesme n'eust pas esté si digne, si elle ne l'eust esté faite par la misericorde de Dieu, comme prouue le propre texte que vous alleguez: Vt dignum filij tui habitaculum effici mereretur, Spiritu sancto cooperante præparasti; Qui monstre que d'elle mesme elle n'estoit pas digne, puis qu'il a fallu qu'elle ait esté preparée par le saint Esprit pour le deuenir. Ce qui est vray à plus forte raison des ames qui sont au dessous d'elle, car on ne regarde pas icy ce qu'elles sont par la gra-

ce, & par l'esprit de Iesus Christ, parce que ceste dignité est à Iesus Christ & non à elles mesmes, & par consequent ne doit pas estre considerée quand on les compare & les oppose à Iesus Christ.

E X A M E N.

Ceste proposition monstre bien clairement que la precedente s'entend d'une possession de grace, de laquelle ny les demōs, ny les damnez ne doiuent estre possedez de Iesus Christ; & ainsi il est faux que tout doive estre possedé de luy. Il est encor faux que rien du tout n'en soit digne, & ne luy en des-please, cela enveloppe la Vierge, & tous les Anges & les Saincts, car elle est quelque chose, & si elle en est digne; il est faux que rien n'en soit digne; elle en est digne, & tous

les Saints le sont; car auoir ceste dignité n'est pas auoir égalité à Dieu; & ie dis d'auantage, que la dignité par laquelle ils en sont dignes, est à eux & en eux, & d'autant mieux à eux, que c'est Dieu qui leur donne, comme ayant eu pouoir & le vouloir de leur donner; & s'il falloit, afin qu'une chose fust à nous, que Dieu ne nous l'eust pas donnée, nous n'aurions rien du tout, non pas mesme ny l'estre ny la vie; c'est bien eux qui auroient bon besoin de *Sapere, & sapere ad sobrietatem.*



PAROLES DE LA FILLE.

III. PROPOSITION.

Decretum
Gelafij, er-
ror Pelagij.

Que les ames n'ayent point de
veüe si Iesus Christ les veut pos-
seder ou non, estant assez qu'il se posse-
de soy mesme.

OBJECTION.

Il faut donc effacer tout l'Euan-
gile & la Bible, outre que l'ame qui
n'est créée que pour voir Dieu,
comment peut elle quitter ce de-
sir? 2. Daudid, saint Paul, tous les
Saints disent le contraire: *Quis nos
separabit à charitate?*

RESPONSE.

Il paroist bien que vostre vie se passe
en d'autres choses qu'en la meditation
des points de Theologie & de pieté, puis

que vous n'en comprenez pas les premiers principes. On ne dit pas que les ames ne doiuent point desirer d'estre possédées de Iesus Christ, mais qu'elles ne doiuent point auoir de uenës sil luy plaist de les posseder ou non, c'est à dire, que le seruant fidèlement elles ne doiuent pas se mettre en peine de sçauoir sil les possede ou non, mais remettre cela à sa misericorde, & se resoudre à le seruir pour luy mesme, & sans égard à leur interest, recognoissant que la seule possession qu'il a de luy, suffit pour le rendre heureux & content, sans qu'il ait besoin de posseder autre chose.

Faut-il effacer toute la Bible pour croire cela? Ou plustost les objections & les vains efforts que vous faites contre des veritez si eminentes : & faut-il croire que Sainct Paul y repugne, lors qu'il dit : Quis nos separabit à cha-

ritate Christi ? puis qu'il n'y a plus haut point de charité que celuy qui est icy proposé par ceste Fille. Ie ne sçay ce que veut dire ce que vous avez mis à la marge : Decretum Gelasij, error Pelagij ; Mais il est certain que vous tomberez plus facilement dans l'erreur de Pelage en combatant ceste verité, que la Fille en l'adorant, puis qu'elle met Iesus Christ au plus haut degré de grandeur, & la creature au dernier degré de bassesse où elle puisse estre mise, au lieu que l'erreur de Pelagius rabbaissoit extremement Dieu, & releuoit excessiuement la creature.

EXAMEN.

Que l'Espouse au Cantique souf-
pire de langueur, qu'elle en face
entendre les plaintes & les gemif-
semens aux filles de Ierusalem,
pour les esmouuoir à pitié & à

compassion, & que ses inquietudes luy ostant le repos la portent au trauers des perils, des iniures, & des affrons sur la montagne de la mirrhe, pour y trouuer le Dieu qu'elle a perdu, ou seulement qui s'est vn peu absenté d'elle. Ces ames plus fideles dans vne bienheureuse indifferéce verront Dieu s'esloigner, mais le verront prest à les condamner, & à les damner eternellement, sans seulement en estre esmeies, parce que Dieu est Dieu, & qu'il se possede luy mesme, & cela leur suffit; & ainsi plus de soucy pour leur salut, & ce qui en peut suiure.



PAROLES DE LA FILLE.

I. PROPOSITION.

10. **R**EGNE: *Que Iesus Christ*
aneantisse toutes puissances.

I. OBIECTION.

C'est le contre-sens de la Pate-
 nostre, & de, *Adueniat regnum tuum.*

2. Luy qui est venu pour sauuer
 tout le monde, aneantira-t'il ? &c.
 Quelles puissances entédez-vous ?

R E S P O N S E.

*Ce Censeur met la charette deuant
 les bœufs, la derniere proposition qu'il
 fait deuoit estre la premiere, car apres
 auoir auancé des argumens contre les
 paroles de la Fille, il demande comment
 on les entend ; au lieu qu'il falloit sça-
 uoir comment elles se doiuent entendre,*

plustost que d'entreprendre de les combattre temerairement, mais elles n'ont point besoin d'explication puis qu'elles sont si claires & si certaines, que ce sont les propres paroles de S. Paul, qui dit : que I. Christ aneantira toute principauté, toute puissance, & toute vertu. Ce qui suffit pour monstrier l'aveuglement de cet homme, & avec quel iugement il dit que c'est le contre-sens de la Patenostre, comme si saint Paul n'auoit pas entendu l'Oraison Dominicale aussi bien que luy, & qu'il eust pris à contre-sens les paroles de son Maître; mais il n'entend ny l'un ny l'autre: & quoy qu'il suffit de l'enuoyer à l'Eschole, & aux Commētateurs de saint Paul, toutesfois nous luy dirons briuelement, que cet aneantissement de toute puissance ne s'entend que de toute puissance qui n'est pas sousmise à Iesus


Christ, & empesche son regne parfait;
 & non des puissances de nos ames qui
 luy seront parfaitement sousmises, &
 serviront de sujet à sa Royauté, puis
 quil regnera absolument & pour ia-
 mais dans elles. Tellement que tant s'en
 faut que ce desir repugne aux paroles de
 l'Oraison Dominicale, Que ton
 Royaume nous aduiène, qu'au con-
 traire il en demande l'accomplissement,
 pource que le Royaume de Dieu ne sera
 pas parfaict & accomply que lors que
 toute puissance sera aneantie pour don-
 ner lieu à la sienne.

EXAMEN.

Quand S. Paul dit que I. Christ
 euacuëra les puissances, les vertus,
 & les principautez, il l'entend au
 iour du iugement, pour les demons
 qui ont gardé ces mesmes noms :
 on peut bien dire aussi que par sa

mort il a ruiné & affoibly ces mes-
 mes puissances d'Enfer, suivant ce
 que luy mesme dit : *Nunc princeps*
huius mundi ejcietur foras. Mais la
 proposition est bien plus rude &
 estenduë, car, sans en rien rabbat-
 tre, elle veut vn entier aneantisse-
 ment, & sans rien excepter de tou-
 tes sortes de puissances : car qui dit
 tout n'excepte rien, ny les Roys,
 ny les Papes ; c'est peut estre pour-
 quoy ce Theologien leur deman-
 de, quelles puiſſances ; & quand
 mesme elle l'auroit restraint aux
 demons & aux pecheurs, faut-il
 pour cela demander que Nostre
 Seigneur les aneantisse, & que
 sans rien attendre il face venir
 le iour du iugement ; ne seroit-il
 pas plus conuenable à des ames
 religieuses de le prier d'auoir en-

cor vn peu de patience , & de donner encor quelque temps aux pecheurs pour se conuertir ? Mais tout precipitation , violence , & rigueur ; voila tout l'esprit de ce Chappelet.



PAROLES DE LA FILLE.

II. PROPOSITION.

Qu'il face viure son nom de sa vie, sans qu'il soit besoin que les ames consentent à son regne.

OBIECTION.

A quel propos donc dire, *Adueniat regnum tuum* ? Iesus Christ auroit donc grand tort de nous faire dire cela tous les iours, si cela n'est pas bon, & s'il vaut mieux ne le pas dire, & ne pas consentir à

son regne? 2. Que veut dire qu'il face viure son nom de sa vie? Les filles sçauent-elles bien ce qu'elles disent en disant ces paroles? 3. A tout rompre cela seroit tolerable deuant l'Incarnation, mais apres cela est intolerable, & sur tout en ce sainct Sacrement de communication diuine.

R E S P O N S E.

Il n'entend ny la Fille ny luy mesme, il combat iniustement ce qu'il confesse ne comprendre point, il se contredit & destruit luy mesme ses raisons. La Fille ne dit point qu'il n'est pas bon de prier que le Royaume de Dieu aduienne, ny qu'il vaut mieux ne le pas dire, ny qu'il ne faut pas consentir à son regne. Elle ne dit pas aussi que Iesus Christ face viure son nom de sa vie, mais qu'il face viure son nom de la vie

qu'il a de luy mesme, qui sont des paroles qu'un Theologien ne deuroit pas ignorer, quoy qu'il n'y ait nul inconuenient que les filles ne les entendēt point, parce qu'elles n'ont pas esté escrites pour elles, mais seulement pour celle à qui Dieu a bien peu faire comprendre & cela & des choses plus releuées. Le discours donc de ceste Fille est facile, qui est que Dieu face viure son nom, c'est à dire, reluire sa majesté de la vie & de la splendeur que ce nom & ceste majesté a d'elle mesme, sans qu'il soit besoin que les creatures y consentent, parce que sans leur consentement elle seroit tousiours illustre & glorieuse; elle veut qu'il établisse son regne sur nous dans le saint Sacrement, en vne maniere toute diuine & independante des creatures, par ceste grandeur & ceste puissance infinie qu'il a de

luy mesme de regner absolument sur les
 ames & sur toutes choses, quand mesme
 elles voudroient sy opposer, car il ne
 laisse pas de regner sur les damnez &
 sur les demons, encor qu'en vain ils y
 resistent. Elle dit de son regne ce qu'il
 disoit luy mesme de toute sa gloire, lors
 qu'il prioit son Pere de le glorifier de
 la gloire qu'il auoit dans luy deuant la Ioan. 17.
 constitution du monde, car elle veut
 que son regne dans le saint Sacrement
 procede de la puissance & de la ma-
 iesté eternelle qu'il a dans luy mesme,
 & non de l'obeissance & de l'hommage
 des creatures, qui est l'effet & non la
 cause de son regne. Ainsi le Censeur
 s'égare beaucoup, s'imaginant que la
 Fille destruit le regne de Iesus Christ
 sur nous, lors qu'elle l'establit sur un
 fondement si diuin, & le fait si grand
 & si inuincible, qu'il viuroit & fleuri-

roit sur nous par luy mesme, nonobstāt
 nos infidelitez & rebellions. Que s'il
 auoüe que le discours de la Fille eust esté
 tolerable deuant l'Incarnation, il faut
 qu'il auoüe qu'il ne l'est pas moins à
 present, puis que comme la grace & la
 iustice de Dieu ont esté de mesme nature
 dans les bons & les meschans deuant
 & apres l'Incarnation, & ainsi son
 regne qui consiste en la grace, comme il
 dit dans l'Euangile, & en la iustice,
 comme il dit dans le Pseaume, est le
 mesme deuant & apres; d'où s'ensuit
 qu'il ne s'entend pas, & ruine luy mes-
 me son raisonnement.

Luc. 17.

Psal. 1.


E X A M E N.

Sainct Paul dit que Nostre Sei-
 gneur, quoy qu'il fust en la forme
 de Dieu, sans larcin ny vsurpation,
 a neantmoins voulu s'aneantir soy
 mesme, & s'est rendu obeïssant
 iusques

iufques à la mort, & à la mort de la Croix : qu'auffi , à caufe de cela , Dieu luy a donné vn nom qui furpaffe tous les autres noms. Voila donc ce nom efleué fur les autres noms, ce nom de gloire & de puiffance , ce nom auquel le ciel, la terre , & les enfers flechiffent les genoux, qui naift & reçoit vie de la mort, de l'humilité & abbaiffemēt de Nofre Seigneur ; & ces nouveaux Spirituels peu conformes à fon efprit , veulent que ce nom prenne vie de fa vie, de fes grandeurs , & de fes efleuemens. Qu'ils changent donc l'efprit de Iefus Chrift, qui eft vn efprit d'humilité, au leur qui ne l'eft pas ; ce qui fuit de fon regne, eft bien auffi malentendu, comme il n'y a point d'apparence qu'ils le vueillent enten-

dre de son regne eternel, où il regne avec son Pere en l'vnité du S. Esprit, nous ne nous y arresterons pas. Ils parlent d'un autre regne qu'il doit auoir dans le sainct Sacrement, lequel le Defenseur luy mesme recognoist deuoir estre vn regne de grace ou de iustice; si c'est vn regne de grace, il est impossible qu'il soit, & s'establisce sans nostre consentement, ou il faut que Dieu chage tout l'ordre qu'il a mis dans la grace, & qu'il face vne autre grace & d'autres Sacremens. Et à la verité c'est l'intention qui paroist en tout ce benit Chappelet, que Dieu face vn nouveau ciel, & vne nouvelle terre en la grace, qu'il en change l'œconomie, & se change luy mesme. Peut-estre aussi entendent-ils vn regne de iustice, com-

me ils vont demander qu'il en tire des effets de iustice, bien que ce soit vn Sacrement d'amour; si cela est, nous les prions de ne le demander que pour eux, car nostre intention n'est pas qu'il regne dessus nous, comme sur les damnez, par force & par iustice, mais par grace & par amour. C'est le regne qu'il cherche en nous, & pour lequel il veut nostre consentement.



PAROLES DE LA FILLE.

I. PROPOSITION.

II. **I**NACCESSIBILITE'. *Que Iesus Christ demeure dans soy-mesme, laissant la creature.*

OBIECTION.

Vrayemēt c'est tout au rebours de

ce que Iesus Christ desire, il nous menace de mort si nous ne le mangeons, & si nous n'en approchons; & voicy vne deuotion qui met la perfection au contraire de ce que Iesus Christ pretend. 2. Qui a iamais oüy dire que Dieu se glorifie d'estre inaccessible, puis qu'il commande, sous peine de mort eternelle, de le chercher, se ioindre à luy, & sur tout Iesus Christ qui vient pour chercher les pecheurs, & qui s'en glorifie?

R E S P O N S E.

Il tronque les paroles de la Fille, qui ne dit qu'elle veut que Iesus Christ laisse absolument la creature, mais adionte qu'il la laisse dans l'incapacité de l'approcher, parce que comme de sa nature il est inaccessible à la creature, ainsi de sa nature il laisse la creature dans l'in-

capacité de l'approcher, en sorte que par son propre estat elle est tousiours incapable de venir à luy : car elle considere Iesus Christ dans sa grandeur infinie & naturelle, & la creature dans la bassesse & l'incapacité qu'elle a de soy, afin de faire mieux la comparaison entre eux, en leur attribuant ce qu'ils ont de propre, & les regardant chacun dans son ordre. En ceste maniere elle glorifie Iesus Christ, voulant qu'il ait dans le saint Sacrement la mesme excellence qu'il a dans la Diuinité, de demeurer dans luy mesme, & d'estre si esleué par sa nature, qu'il laisse la creature infiniment au dessous de luy dans l'incapacité de l'approcher. Elle dit de luy dās l'Eucharistie ce que tous les Saints diront de luy mesme dans le ciel ; L'Agneau est digne de reccueillir vertu, &

[Apoc. 3.]

honneur, & gloire, & benediction
 voulant que toutes les qualitez & per-
 fections diuines luy appartiennent dans
 ce sainct Sacrement, & quil y soit
 aussi grand que dans son Pere; ainsi
 l'inaccessibilité qu'elle luy donne, &
 l'incapacité de l'approcher qu'elle laisse
 à la creature, n'estant prise que de leur
 propre condition, comparées ensemble
 elles n'empeschent point la communica-
 tion mutuelle, & l'accès que les ames
 ont à luy par sa condescendence, &
 par la grace; & par consequent elle ne
 met pas la perfection de sa deuotion en
 une chose contraire à ce que Iesus Christ
 pretend; mais en celle quil veut estre
 establee & presuppосée deuant toute au-
 tre; qui est que receuant ses faueurs &
 l'honneur de ses communications, nous
 reconnoissons premierement que nous
 en sommes infinimēt esloignez par nous

mesmes, & qu'il est infiniment rehaussé
 par dessus nous, afin de fonder sur ces
 raisons une parfaite recognoissance.
 Car pour ce que le Censeur adiouste
 qu'on n'a iamais oüy dire que Dieu se
 glorifie d'estre inaccessible, c'est une im-
 pieté qui luy raut l'honneur que son in-
 accessibilité luy donne, & nie que ce soit
 en luy une perfection & une excellence
 d'estre inaccessible; car si c'est une excel-
 lence, il en doit donc estre glorifié; &
 si il n'en doit pas estre glorifié, ce n'est
 donc pas une excellence, mais une chose
 indifférente. Sainct Paul combat ou-
 uertement ce blaspheme, lors que re-
 présentant la maïesté de Dieu pour nous
 la rendre venerable, il dit: Qu'il ha-
 bite une lumiere inaccessible, &
 que nul homme ne l'a iamais veu,
 ny ne le peut voir. Je laisse plusieurs
 passages de l'Ecriture, qui monstrent la

hardiesse de celuy qui ose dire que Dieu ne s'est iamais glorifié d'une chose qu'il a publiée si souvent & si magnifiquement par ses Oracles ; que s'il declare qu'il veut venir à nous , & que nous allions à luy , c'est une grace & une misericorde qui ne peut faire oublier qu'aux ingrats ce qu'il est , & ce que nous sommes par nous mesmes.

EXAMEN.

Le seul tiltre de ce chapitre combat & destruit le sainct Sacrement, & ne se peut defendre que par des esprits qui veulent tout oser & tout hazarder, plustost qu'auoüer vne faute. Inaccessibilité à Iesus Christ au sainct Sacrement, & il n'est au sainct Sacrement que pour estre accessible ; tellement que luy demander qu'il soit inaccessible au sainct Sacrement, c'est demander

qu'il n'y soit pas, c'est demander qu'on ne l'y prenne pas, où au lieu que les Huguenots veulent qu'il n'y soit pas & qu'on l'y prenne, ils veulent qu'il y soit & qu'on ne le prenne pas, mais encor qu'on ne le puisse prendre ny seulement en approcher, car inaccessibilité dit tout cela. Lors qu'il sembloit qu'il fust moins accessible, les Peres de l'ancien Testament ne faisoient autre chose que le prier de se rendre accessible: *Veni, Domine, & noli tardare* ~~ut~~ *utinam disrumperes cœlos, & descenderes*; Et maintenant qu'il s'est fait accessible par l'Incarnation, & au saint Sacrement tellement accessible, qu'il a voulu non seulement que les bons; mais encor que les meschans & les Judas l'y prissent. Ceux-cy pour renuer-

fer ce qu'il a fait, & tout l'ordre
 qu'il a mis dans la grace & dans les
 Sacremens, veulent qu'il soit in-
 accessible au saint Sacrement, au-
 tant aux bons qu'aux mauuais. Il
 est vray que Dieu habite vne lu-
 miere inaccessible d'où personne
 ne sçauroit approcher par sa pro-
 pre puissance, mais pour en mieux
 sortir à nostre égard, c'est à dire,
 pour se rendre plus accessible, il
 s'est incarné & s'est fait homme ;
 & pour le deuenir encor dauanta-
 ge & demeurer avec nous, mesme
 apres estre monté au ciel, il a esta-
 bly ce Sacrement d'amour, & on
 luy demande qu'il soit inaccessi-
 ble, & inaccessible au saint Sa-
 crement ; qu'on luy demande donc
 qu'il destruisse entierement & ce
 mystere & celuy de l'Incarnation.

On luy demande encor qu'il laisse la creature dans l'incapacité qu'elle a de l'approcher, c'est luy faire vne belle demande, & bien digne d'une ame religieuse, car c'est luy demander qu'il la laisse dans le peché, & ne luy face aucune grace, car la grace luy oste ceste incapacité; ont-ils tât de plaisir à estre dans le peché, à estre rebutez & separez de Dieu pour ne souhaitter iamais autre chose? Et le Defenseur se mocque-t'il, ou s'il parle à bon escient, quand il dit que l'incapacité qu'a la creature pour approcher de Dieu, n'empesche pas les communications que Dieu veut auoir avec elle? c'est comme qui diroit que les tenebres n'empeschent pas que le Soleil n'esclaire, il est vray, mais il esclaire en les ostant; & Dieu se

communiqué à nous en nous ôstant
l'incapacité que nous auions d'ap-
procher de luy.



PAROLES DE LA FILLE.

II. PROPOSITION.

Q*ue tout ce que Iesus Christ est,
n'ait point de rapport à nous.*

O B I E C T I O N.

Il est Sauueur, la source des gra-
ces, tout nostre espoir, la rançon
de nos fautes : si tout cela n'a point
de rapport à nous, & où en serions-
nous?

R E S P O N S E.


*Tout cela se rapporte à nous, mais ce
sont rapports de condescendence & de
rabbaïssemēs volontaires, dont la mer-
ueille ne paroist iamais si bien que quād*

on leue les yeux vers la grandeur & l'eminence de celuy qui s'est tant rabbaissé, & qu'on les baisse vers l'indignité & le neant de ceux qu'il a esleuez à un point de bon-heur, qui surpassent tant leur condition & leurs forces.

E X A M E N.

Ce souhait est aussi extrauagant qu'impossible; Dieu ne scauroit qu'il n'ait rapport à nous, sans nous ancantir tout à fait; il y a necessairement rapport du Createur à la creature, mais de souhaitter cela à Nostre Seign. & encor au sainct Sacrement, c'est ce qui va au delà de toute extrauagance. Il est venu au monde pour auoir plus de rapport à nous: *Se nascens dedit socium, conuescens in edulium, se moriens in pretium, se regnans dat in præmium*: Il est nostre pere, & nous les en-

fans , il est nostre chef & nostre tout , nous ses membres & ses parties , & au fainct Sacrement il est la vie de nostre ame , & nostre pain de vie , tout cela n'a-t'il point de rapport à nous ? & sous ombre qu'il a voulu auoir tous ses rapports à nous par amour & bonté , il les luy faut oster , où y puis qu'on luy veut oster son amour , sa bonté , & sa misericorde.



PAROLES DE LA FILLE.

III. PROPOSITION.

Q*ue les ames renoncent à la rencontre de Dieu.*

OBIECTION.

Cela fait fremir. 2. Et où iront-elles donc si elles ne vont à Dieu ?

3. Tout le bon heur est en ceste rencontre; & pourquoy s'est-il fait homme?

R E S P O N S E.

On ne nie pas que leur bon-heur soit en ceste rencontre, ny qu'elles ne la doiuent rechercher; mais on dit qu'elles doiuent reconnoistre que d'elles mesmes elles n'ont nul droit ny puissance de la trouuer, à cause de la distance infinie qu'il y a entre la nature de Dieu & la leur; ce qui ne fait point fremir les ames humbles & recognoissantes, si ce n'est peut estre de ce que Dieu s'est tant rabbaissé vers elles.

E X A M E N.

Que son inaccessibilité l'empesche de sortir de soy-mesme, ce n'est pas bien parler, il faudroit dire qu'elle nous empeschast d'aller à luy. L'inaccessibilité d'une

montagnè empesche bien que l'on
 n'y monte, mais on ne dit pas qu'elle
 l'empesche de descendre: mais
 c'est peu au pris de vouloir
 qu'on renonce à la rencontre de
 Dieu; cela est si impie que ie m'é-
 tonne comme il est peu entrer en
 l'esprit d'un Chrestien, & encor
 dauantage de ce qu'on l'autorise
 & qu'on le veut defendre; c'est ce
 que font tous les demons qui ne
 peuuent souffrir la presence de
 Dieu, & tous les plus impies sou-
 scriront bien à ce beau point de
 spiritualité. Dans l'ancien Testa-
 ment on craignoit bien ceste ren-
 contre, mais encor c'estoit la ren-
 contre & presence visible, parce
 qu'on craignoit de mourir aussi-
 tost, à cause de ce que Dieu dit en
 l'Exode: *Non videbit me homo & vi-*

uet; Mais encor sur ces parolles S.
Augustin s'escrie: *Eia, Domine, mo-
riar, ut te videam; videam, ut hic
moriar*: Sainct Augustin est bien
trompé en ses souhaits, & aux es-
lancemens de son esprit à Dieu,
ou ceux-cy le sont bien.



PAROLES DE LA FILLE.

IV. PROPOSITION.

Qu'elles consentent qu'il demeu-
re dans son inaccessibilité.

OBIECTION.

O la grande temerité! car que
deuiendrons-nous si Dieu est in-
accessible & Iesus Christ? 2. Il se
glorifie au contraire dans la Bible:
*Ego qui loquebar, ecce adsum. Venite
ad me omnes, &c.*

R E S P O N S E .

Ce ne seroit pas temerité, mais impiété de vouloir oster à Iesus Christ son inaccessibilité, & ne pas consentir qu'elle luy demeurast, & luy dans elle, puis que c'est un attribut inseparable de sa Diuinité, dans la possession duquel il demeure tousiours, quelque accessible qu'il se rende aux hommes par bonté & par indulgence. Ce que la Fille exprime fort bien quand elle dit : Que les ames consentent qu'il demeure dans son inaccessibilité, pour mōstrer qu'elle veut qu'elles recognoissēt qu'il a une inaccessibilité dās laquelle il demeure tousiours par son estre, en sorte qu'il ne leur doit nul accès, & qu'elles n'auroient nul sujet de se plaindre de luy, mais seulement de se rabbaïsser dans leur indignité, quand il ne voudroit pas qu'elles l'approchassent.

E X A M E N.

Que Dieu soit inaccessible de nature, c'est à dire, que personne ne puisse monter iusqu'à luy par sa propre puissance, comme nous auons desia dit, ce n'est pas vne chose nouuelle, ny dont lon ait iamais douté : mais maintenant il n'est pas inaccessible actuellement, puis que tous les Bien-heureux le voyent, le possèdent, & sont vnis à luy. Nostre Seigneur Iesus Chr. l'est encor moins, qui s'est venu rendre accessible iusques aux plus petits enfans : *Sinite hos paruulos venire ad me.* Et dans le S. Sacrement sainct Chrysostome dit qu'on l'ap-proche, qu'on le touché, & qu'on est fait vn avec luy : C'est pourquoy les Theologiens n'ont pas mis ceste inaccessibleité au rang

des attributs qu'ils traittent, mais si font bien ceux-cy, parce qu'ils font vne nouuelle Theologie. Que si Nostre Seigneur s'est fâché contre ceux qui vouloient empescher ces petits enfans d'aller à luy, que fera-t'il à ceux qui veulent obliger les ames à vouloir & à consentir qu'il soit inaccessible dans le saint Sacrement ? Tout consentement bien réglé d'un inferieur presuppose necessairement un vouloir, un desir, ou vne inclination du Supérieur ; & quand tout le contraire se récontre, ce consentement n'est pas consentement, mais dissentement. Or tant s'en faut que Nostre Seigneur vueille demeurer inaccessible à nostre égard, qu'il veut tout le contraire ; & au lieu de vouloir que nous y cōsentions, il nous

oblige à faire tous nos efforts pour paruenir à luy. Voila donc vn consentement bien imaginé , qui est vne pure contrarieté aux desseins & aux volonteze de Nostre Seign. Mais on ne voit autre chose en tout ce Chappelet.



PAROLES DE LA FILLE.

V. PROPOSITION.

Là il reçoit la gloire de n'estre accompagné que de son essence.

O B I E C T I O N.

Si on ne parloit que de la Diuinité, cela seroit tolerable, mais parlant de Iesus Christ , & de Iesus Christ dans le saint Sacrement, qui le rend accessible, & qui veut que sous peine de mort éternelle

lon s'en approche, quelle pensée est-ce cy qui renuerse les pensées de Dieu, sous couleur de deuotion raffinée? 2. Ce seroit heresie de dire que la personne de Iesus Christ tire sa gloire de n'estre accompagnée que de son essence seule, car est-elle pas accompagnée des diuines personnes du Pere & du S. Esprit? & les filles sont-elles capables de sçauoir ce qu'elles disent en ces mots qui estourdissent leurs foibles esprits?

R E S P O N S E.

C'est l'esprit de ce Theologien qu'ils estourdissent, & non celuy des filles qui n'en ont presque point oüy parler; ny celuy de la Fille qui les a escrites avec tant de solidité & de lumiere de Dieu, que ce Censeur en est esbloüy, & ne peut les combattre que par des here-

sies , qui renversent non seulement les pensées de Iesus Christ , mais le sens commun des fideles ; car quelle hardiesse est-ce à luy de dire que si on parloit de la Diuinité, on pourroit bien luy attribuer l'inaccessibilité , comme si Iesus Christ n'auoit point la Diuinité , & qu'il ne fust pas vn Dieu possédant tous les attributs & les excellences diuines ; n'est-ce pas vne heresie & vn Nestorianisme formel , qui nous veut faire conceuoir Iesus Christ separé de la Diuinité comme vn pur homme ? Car ce qu'il s'est voulu rendre accessible dans le S. Sacrement , n'est qu'un effet de son amour & de sa clemence, qui ne destruit pas la propre condition de son estre , par lequel il est infiniment esloigné de nous ; & puis que tout son estre , ses deux natures , sa subsistance sont également dans le saint Sacrement , que son hu-

manité n'y entre pas plus directement que sa Diuinité, le seul corps & le sang y estant, Vi verborum, comme parle l'Eschole, c'est à dire, par la signification expresse & formelle des paroles, & tout le reste, toute sa Diuinité, & toute son humanité par une suite & une conjunction nécessaire, qui ne voit que c'est vn crime de l'y considerer comme homme, & non pas comme Dieu reuestu de toutes les qualitez diuines? Qui ne voit que c'est l'y vouloir faire mourir d'une mort plus horrible que celle de la Croix, puis qu'en la Croix son ame fust bien separée du corps, mais l'ame & le corps demeurent vnis à la Diuinité, de laquelle toutefois on les veut separer dans le S. Sacrement. C'est donc vne erreur fort grossiere, qui destruit non seulement les pensées, mais aussi les excellences de Je-

Iesus Christ, lequel reside dans le saint
 Sacrement comme un Dieu, triomphant
 & remply de ceste gloire qu'il a eue dans
 le Pere deuant la constitution du mon-
 de, laquelle il luy demandoit deuant sa
 mort, pour nous monstrier par auance
 la maniere & l'eminence en laquelle
 nous le deuions considerer apres sa re-
 surrection; & c'est en cela que consiste
 la plus grande merueille & la dignité
 infinie de ce Sacrement, de renfermer
 un Dieu aussi grand & glorieux que
 son Pere; & c'est en cela mesme qu'il
 constitué le principal objet de l'adora-
 tion que nous luy deuons. La seconde
 erreur de cet homme est d'asseurer que
 c'est heresie de dire que la personne de
 Iesus Christ, dans son inaccessibilité,
 n'est accompagnée que de son essence
 seule, parce qu'elle est accompagnée des
 personnes diuines, comme si les person-

nes diuines auoient vne autre essence
 que celle de Iesus Christ, & empes-
 choient que dans son inaccessibilité di-
 uine il soit accompagné de son essence
 seule, & non d'autre. Outre que l'escrit
 ne dit pas que la personne de Iesus Chr.
 n'est accompagnée que de son essence
 seule, mais que Dieu dans le lieu inac-
 cessible de sa Diuinité, reçoit la gloire
 de n'estre accompagné que de son essence
 seule. Or toutes les personnes diuines
 n'estant qu'un Dieu, elles sont toutes
 comprises dans ceste proposition, & par
 consequent le Censeur oppose mal à
 propos celle du Pere & du Sainct Es-
 prit, puis que la proposition les enferme
 & leur attribue aussi bien qu'à celle du
 Fils la gloire de n'estre accompagnées
 dans leur inaccessibilité d'autre essence
 que de la diuine, & d'estre infiniment
 separées des creatures.

E X A M E N.

Comme ce seroit vne heresie de parler de Iesus Christ comme d'un homme seulement qui ne seroit pas Dieu, c'en est vne aussi grande de parler de luy comme d'un Dieu qui ne seroit pas homme, car il est l'un & l'autre, *Theantropos*; ainsi, sans heresie, on ne peut dire qu'il n'ait qu'une essence & qu'une nature. Que ces Docteurs subtils regardét maintenant si c'est bien parler de dire au singulier, qu'il n'est accompagné que de son essence, puis qu'il en a deux, une diuine, & l'autre humaine, & que cela s'adresse à Iesus Christ, & non pas simplement à Dieu; il ne faut pour le voir que lire l'article qui s'adresse tout à luy, & à luy dans le sainct Sacrement, surquoy il leur

faut donner vn aduis en vne chose où ils manquent tousiours en tout ce Chappelet ; c'est que ce nom adorable de Iesus Christ, estant de soy vn nom d'homme, quand on dit simplement Iesus Christ, cela comprend tousiours la nature humaine, bien qu'il n'excluë pas la diuine, & cela encor plus au saint Sacrement, où la Diuinité n'y est que par concomitance, & *secundario*, comme on parle à l'Eschole : cependant ces nouueaux Theologiens nommant tousiours Iesus Christ, & au saint Sacrement, en excluent perpetuellement la nature humaine, ou qu'ils se taisent, ou qu'ils apprennent à parler.

PAROLES DE LA FILLE.

I. PROPOSITION.

1. **I**NCOMPREHENSIBILITE.
*Qu'il demeure en ses voyes, &
 les cognoisse luy seul.*

OBIECTION.

Pourquoy d'oc f'est-il fait homme? 2. Pourquoy f'est-il mis dans ce sainct Sacrement? 3. Pourquoy S. Paul prie-il que tout le monde puisse comprendre sa hauteur, sa profondeur, &c? 4. Quelle doctrine est-ce cy qui destruit l'Evangile, & renuerse les pensées de Iesus Christ?

R E S P O N S E.

Mais quels argumens sont-ce cy qui ne ressentent qu'ignorance des choses de

Dieu, & presumption à reprendre ce
 qu'on n'entend point? Il falloit premie-
 rement sçavoir ce que c'est que voye de
 Dieu, & considerer que l'Escripture
 sainte exprime par ce nom le secret &
 la profondeur des conseils de Dieu ca-
 chez à toute creature, ce que la Fille
 explique fort bien par les paroles sui-
 uantes, qu'il ne rende conte qu'à luy
 mesme des desseins qu'il prend sur ses
 creatures. Et plus bas, que les ames ai-
 ment le secret des conseils de Dieu, mon-
 trant qu'elle entend mieux le langage
 de Dieu & de l'Escripture que ce Theo-
 logien; & que par les voyes de Dieu,
 elle signifie la hauteſſe & la profon-
 deur de ses conseils, dans lesquels elle
 veut qu'il demeure, & qu'il n'en sorte
 point pour les descouvrir à ses creatures.
 Elle a appris ces pensées de saint Paul,
 qui décrit presque en mesmes termes

l'incomprehensibilité de Dieu, quand il s'escrie : O hauteſſe des richesses de la sapience & de la science de Dieu ! Que ſes iugemens ſont incomprehensibles, & ſes voyes inueſtigables ! Car qui a cognu le ſentiment du Seigneur ? & qui a eſté ſon conſeiller ? C'eſt quaſi le meſme langage que tient icy ceſte Fille, voulant que Ieſus Chriſt demeure dans ſes voyes, & les cognoiſſe luy ſeul, & par conſequent le Cenſeur ne les peut blaſmer, ſans vne erreur qui tombe ſur ſainct Paul, & ſur les veritez que Dieu meſme a prononcé par ſa bouche. Ainſi tous ces argumens ridicules tombent par terre, car ny Ieſus Chriſt ne ſ'eſt fait homme, ny ne ſ'eſt mis dans le ſainct Sacrement, ny n'a eſcrit l'Euan-gile, afin que les voyes de Dieu ne fuſſent point inueſtigables & incogneies à nos eſprits ; au contraire quand les

Apostres les ont voulu approfondir, & en ont desiré de luy la cognoissance, il leur a respondu que ce n'estoit pas à eux de les sçauoir, & n'a pas faict difficulté de dire qu'il ne les sçauoit pas luy mesme, pour nous apprendre qu'il n'est pas venu pour nous communiquer ses voyes, & les secrets conseils de son Pere. C'est pourquoy quand S. Paul prie que nous puissions comprendre la profondeur, la largeur, & la hauteur, il ne dit rien qui soit contraire à ceste verité, parce qu'il ne parle pas d'une cōprehension que nous puissions auoir en ceste vie, mais de celle qu'il nous donnera en l'autre, selon qu'il dit ailleurs:

Sequor si quo modo comprehendam. Il le declare par les paroles qu'il met en suite: Vt impleamini in omnem plenitudinem Dei; Ce qui assurement ne se fera que dans le ciel.

EXAMEN.

Eph. 3.

Philip. 3.


Qui a jamais oüy dire que Dieu
 ait esté obligé à rendre compte des
 desseins qu'il a sur ses creatures? &
 qui a jamais pretendu cela? à quel
 propos luy faire donc ceste de-
 mande hors de propos? Luy de-
 mander aussi qu'il demeure en ses
 voyes, est-il en danger d'en sortir?
 ne verrons-nous jamais que des
 souhaits sans fondement, & qui
 font pourtant tort à Dieu? car on
 diroit par ces souhaits que Dieu
 est en danger de n'estre plus Dieu,
 de n'estre plus puissant, de sortir
 de ses voyes, & qu'un de ces iours
 on luy donnera assignation à la
 chambre des Comptes; & on nous
 voudra faire passer toutes ces ba-
 gatelles qui parlent si indignement
 & bassement de Dieu, pour des spi-

ritualitez toutes diuines, & toutes transcendantes. Luy demander aussi qu'il cognoisse seul ses voyes, c'est vne temerité, ou bien vne ignorâce: vne temerité, parce qu'il faudroit que Dieu fist de continuel miracles pour nous faire faire ses volonte; comment garderions-nous ses commandemens? comment suiurions-nous ses conseils? comment marcherions-nous dans ses voyes sans les sçauoir & les cognoistre? Dauid qui vouloit non seulement y marcher, mais y courir, ne faisoit pas comme eux, il les vouloit sçauoir, & en demandoit la cognoissance à Dieu: *Vias tuas, Domine, demonstra mihi, & semitas tuas edoce me*; Mais il deuoit venir à leur eschole; Ignorance de ne sçauoir pas que Dieu veut que

nous apprehions les voyes, que
 Nostre Seigneur est venu pour
 nous les apprendre? *Notum feci eis
 nomen tuum, & notum faciam;* Que
 pour cela il s'appelle Lumiere &
 Verité: mais c'est luy mesme qui
 est la voye de Dieu, *Ego sum via,*
 Ne le sçaurons-nous point? Igno-
 rerons-nous Iesus Christ? Sainct
 Paul n'est pas de leur aduis, il le
 vouloit sçauoir, & ne se soucioit
 pas de sçauoir autre chose; & ie
 souhaitterois volontiers à nos Spi-
 rituels, au lieu de tant de beaux
 souhaits qu'ils font, qu'ils l'imitas-
 sent en cela, ils apprendroient des
 voyes de Dieu ce qu'il en faut sça-
 uoir, & ne feroient pas si frians de
 tant de perilleuses nouueautez; car
 ils sont bien plaisants de dire qu'ils
 ne les veulent pas cognoistre, ils ne

le veulent que trop, & ne le pensent que trop, & le pensent si bien, qu'ils croient tous les autres aveugles & ignorans aux voyes de Dieu. Pour nous persuader qu'il ne faut pas sçavoir les voyes de Dieu, ils alleguent le secret de la Predestination, & celuy du iour du iugement, mais c'est sans iugement. On sçait bien qu'il y a des secrets, comme ces deux-là, que Dieu ne veut pas que nous sçachions, parce qu'ils ne nous sont ny necessaires ny vtils; pour ceux-là saint Paul a bien dit, *Noli altum sapere*; mais il a dit aussi pour ceux que nous devons sçavoir, *Sed sapere ad sobrietatem*. Entre le trop & le trop peu est la raison & mediocrité; & ce seroit bien assez s'ils se tenoient eux memes en ceste mediocrité, & ne

voulussent trop sçauoir, trop escri-
re, & trop enseigner, nous ne se-
rions pas en la peine de les repren-
dre, & de les corriger.



PAROLES DE LA FILLE.

II. PROPOSITION.

Q*ue les ames renoncent à la ma-
nifestation des choses cachées.*

OBJECTION.

Iesus Christ dit que la vie heu-
reuse de ce monde consiste à co-
gnoistre le Fils de Dieu, qui nous
reuele les choses cachées qu'il a ap-
prises de son Pere; comment donc
peut-on renoncer à ce que le Fils
de Dieu est venu nous apprendre?

RESPONSE.

Il tronque les paroles de la Fille,

qui ne dit pas que les ames renoncent à la manifestation des choses cachées, mais qu'elles renoncent à la manifestation des secrets de Dieu, entant qu'ils doiuent demeurer dans la seule science de Dieu; d'où s'ensuit qu'elle veut simplement que les ames n'entreprennent point de sonder les secrets que le Pere a mis en sa puissance, comme a dit Iesus Christ aux Apostres, & qu'il ne veut point nous estre reuelez; & par consequent cet homme oppose sans raison que c'est renoncer à ce que le Fils de Dieu nous est venu apprédre; & beaucoup plus que Iesus Christ a dit que la vie heureuse de ce monde consiste à cognoistre le Fils de Dieu, puis que Iesus Christ ne dit pas qu'il nous est venu apprendre les secrets incomprehensibles de son Pere, ny qu'en la cognoissance de luy consiste la vie heureuse de ce mon-

de, mais la vie eternelle. Tellement que
 ce Theologien falsifie l'Euangile & les Ioan. 17.
 paroles de Iesus Christ, & veut attri-
 buer à ceste vie ce qui n'appartient qu'à
 l'autre, dans laquelle seule nous co-
 gnoistrions ces voyes de Dieu inuestiga-
 bles qu'il a voulu nous estre cachées, &
 demeurer dans sa seule cognoissance,
 tandis que nous viuons dans les obscu-
 ritez de ceste vie.

E X A M E N.

Que les ames se rendent à l'igno-
 rance, voila vne belle direction.
 Il y a difference entre l'ignorance
 & la non-cognoissance: nous pou-
 uons bien ne sçauoir pas plusieurs
 choses, sans que pour cela on nous
 puisse accuser d'ignorance, & nous
 appeller ignorans. L'ignorance
 vient du peché, & l'accompagne
 perpetuellement; Est-ce là pour s'y

devoir rendre, & pour la conseiller? Mais c'est encor pis de vouloir renoncer à la manifestation des choses cachées en Dieu, c'est renoncer à l'Evangile; car l'Evangile n'est & ne signifie autre chose que ceste manifestation. C'est renoncer à Iesus Christ qui nous les est venu manifester; c'est renoncer au Saint Esprit qui les a reuélées, suivant ceste promesse qu'en fit Notre Seigneur à ses Apostres : *Ille vos docebit omnia*. Et entre ces choses cachées en Dieu il n'y en a point de plus grandes, plus profondes, & plus cachées que le mystere de la Trinité, & celui de l'Incarnation, que l'Apostre appelle *Mysterium absconditum à sæculis*. Ne vouloir pas sçauoir ces deux mysteres, les vouloir ignorer, c'est vouloir n'e-

tre pas Chrestien, pour quelques secrets particuliers que Dieu ne veut pas que nous sçachions, d'en faire la Theze generale; & confondre ce qu'il faut sçauoir, & ce qu'il ne faut pas sçauoir, c'est mal philosopher.

PAROLES DE LA FILLE.

I. PROPOSITION.

13. **I**NDEPENDANCE. *Que Iesus Christ agisse en sorte, qu'encor que ce Sacrement soit un signe d'amour, il en tire, sil veut, un effet de iustice.*

OBJECTION.

N'est-ce pas accuser Dieu d'iniustice? Car surquoy fondera-il cela? Et sil'ame fait son deuoir en com-

muniant, comment est-ce que Dieu en tirera vn effet de iustice?

R E S P O N S E.

Comme si Dieu ne pouuoit pas tirer du saint Sacrement des effets de iustice sans iniustice, & comme s'il n'y auoit pas vne contradiction manifeste en ce discours: car sil en tire des effets de iustice, ces effets seront donc iustes; & c'est absurdité de repliquer que cela ne se peut faire sans iniustice. Dieu ne fut pas iniuste quand par la premiere communion il liura le corps de Iudas au demon; il ne l'est pas encor quand il entre dans ceux qui le mangent comme vangeur, & comme Iuge, selon saint Paul. A quel propos donc demander surquoy il fondera cela, puis que les pechez des hommes luy en donnent tant de suiet, si sa misericorde ne l'arreste? & à quel propos alleguer que si l'ame

1. Cor. II.

fait son deuoir en communiant, il n'en
 ſçauroit tirer des effets de iuſtice, puis
 que l'eſcrit ne dit pas qu'il tire des effets
 de iuſtice de ceux qui communient di-
 gnement, mais qu'il tire des effets de
 iuſtice de ce Sacrement, quoy que Sa-
 crement d'amour, & inſtitué pour ſi-
 gnifier aux hommes ſa charité infinie,
 & cela pour monſtrer que Ieſus Chriſt
 n'eſt pas aſſuietty à ſes inſtitutions, ny
 aux loix & aux fins qu'il ſeſt donné
 luy meſme: mais que par vne choſe qu'il
 a deſtinée à teſmoigner ſon amour, il
 peut, ſil veut, teſmoigner ſa colere &
 ſa iuſtice. Car comme nonobſtant qu'il ſe
 ſoit incarné pour ſauuer les hommes,
 l'Eſcriture dit qu'il a eſté mis pour la
 ruine & pour la reſurrection de plu-
 ſieurs; ainſiencor qu'il ſe ſoit mis dans
 le ſainct Sacrement pour departir aux
 hommes les effets de ſon amour infiny,

ceste Fille dit avec verité qu'il en peut
 tirer des effets de iustice : ce qui demeure
 vray quand il n'employeroit ce Sacre-
 ment d'amour à exercer sa iustice qu'en-
 uers les meschans , quoy qu'il le puisse
 faire enuers les bons mesmes qui ne le
 recoiuent pas avec une pleine fidelité ,
 ou qui le frequentant souuent se con-
 tentent de mener une vie commune, &
 qui ne respond point à la grande com-
 munication qu'ils ont avec luy ; car s'il
 demande plus de ceux qui ont plus re-
 ceu , il demande une vertu & une con-
 formité particuliere avec luy de ceux
 qui le recoiuent, & qu'il nourrit si sou-
 uent & si abondamment de son propre
 corps. Il faut par necessité que si ceste
 sainte viande ne leur profite à propor-
 tion de l'usage qu'ils en font , cela pro-
 uienne de leur defaut & de leurs mala-
 dies secretes, comme ceux qui mangent

beaucoup, & de bonnes viandes, sans
 en estre plus vigoureux & plus forts,
 doiuent auoir quelque langueur inte-
 rieur & quelque indisposition qui l'em-
 pesche. Ce qui fait que Dieu punit cet
 abus, non seulement par des peines
 particulieres, & propres à ceux qui les
 commettent, comme sont les relâche-
 mens insensibles., & les soustractions
 de ses graces, mais aussi par des peines
 generales, des guerres, des pestes, des
 heresies, n'y ayant rien de plus grande
 importance deuant luy que le mesusage
 de ses sacremens; ainsi Iesus Christ n'a
 que trop de suiet d'exercer sa iustice par
 la sainte Eucharistie, non seulement
 sur les meschans, mais aussi sur les bons,
 vangeant ces manquemens par le mes-
 me moyen par lequel il tesmoigne son
 amour & sa largesse, comme lon tient
 des Corinthiens dont parle S. Paul,

auxquels il donnoit d'une mesme & par
un mesme don la mort du corps & la
vie des ames.

E X A M E N.

Quel esprit inspire-t'on à des
Religieuses, de ne demander à
Dieu pour tout le monde que ri-
gueur, que iustice, que mespris,
oubly, & separation? Est-ce là l'es-
prit de l'Eglise? est-ce l'esprit de Je-
sus Christ qui s'est par charité don-
né luy mesme pour le monde? Mais
c'est par charité, me diront-ils, par
charité pour Iesus Christ, par zele
de son honneur, de sa grandeur, &
de sa gloire. Quiconque, dit saint
Iean, n'a point de charité pour ses
freres, n'en peut avoir pour Dieu;
& il sera bien mal-aisé de faire voir
en tout ce traité de deuotion vne
seule marque de la charité frater-

nelle, au contraire si Dieu exau-
 çoit ces prieres, ie ne sçay qui pour-
 roit éuiter la damnation, & ce zele
 mesme pour Dieu, dont ils se pi-
 quent tant, est tousiours contre
 Dieu, & contre ses desseins. Com-
 me en ceste proposition où ils
 veulent que Nostre Seigneur tire
 du saint Sacrement des effets de
 iustice, n'est-ce pas contre son des-
 sein, & contre la nature de ce Sa-
 crement, qui est vn Sacrement tout
 d'amour, comme ils le recognois-
 sent eux mesmes? il faut donc pour
 cela que Dieu le change, que ce ne
 soit plus le mesme Sacrement, &
 qu'il chage lu y mesme ses desseins
 & son ordre; que le miel deuienne
 de l'absynthe, & l'absynthe du
 miel: si Dieu se conformoit à leurs
 humeurs, il seroit bien changeant,

& ne pourroit plus dire, *Ego Deus,*
& non mutor. Car si Dieu fait iu-
 iustice & punit quelques-vns qui
 recoiuent ce diuin Sacrement avec
 indignité, il ne tire pas pour cela
 les punitions de ce Sacrement, &
 n'a pas besoin de les en tirer, &
 c'est vne plaisante vision de vou-
 loir qu'il le face. Sainct Augustin
 dit bien que ce Sacrement fut poi-
 son à Iudas, mais il s'explique au
 mesme lieu, & adiousté que ce
 ne fut pas qu'il prist vne mauuaise
 chose, mais qu'estant luy mesme
 mauuais, il prit mal vne chose tres-
 bonne. Il y a grande difference
 d'estre puny pour prendre mal le
 Sacrement, ou que le Sacrement
 contienne la punition; le premier
 est de la iustice de Dieu, le second
 ne fut iamais dans sa pensée, &
 n'y

n'y entrera pas pour ces belles prieres.



PAROLES DE LA FILLE.

II. PROPOSITION.

Qu'il n'ait point d'égard à ce que les ames meritent.

OBIECTION.

Voila vne heresie, c'est accuser Dieu d'iniustice; c'est l'opinion de Luther, qui dit que nul merite n'est considerable deuant Dieu.

R E S P O N S E.

Vous n'entendez ny ce que c'est que heresie, ny ce que c'est que l'opinion de Luther, qui n'a pas dit comme vous pretendez, Que nul merite n'est cōsiderable deuant Dieu, mais qu'il n'y a point du tout de merite; au lieu que cet escrit declare

Q

ouuertement qu'il y en a, voulant que
 Dieu n'ait pas égard à ce que les ames
 méritent. Car ainsi il monstre & que
 les ames méritent deuant Dieu, &
 qu'il ne doit pas auoir égard à leurs mé-
 rites, & par consequent ruine l'opinion
 de Luther, laquelle vous dites qu'il
 establit. Quant à ce que vous adiou-
 tez, que c'est accuser Dieu d'injustice,
 vous ne le diriez pas si vous eussiez
 considéré, sans preuention d'esprit, le
 dessein & la suite du discours, qui ne
 dit pas absolument que Dieu n'ait nul
 égard au mérite des ames, mais seule-
 ment en sorte qu'il n'y soit pas assujet-
 ty, & qu'il ne soit obligé de demeurer
 tousiours avec elles en ceste vie: car vous
 deuez sçauoir que quelques merites que
 nous ayons icy, ils sont tousiours dans la
 main de Dieu, & dépendent sans
 cesse de sa volonté & de sa miséricor-

de , parce qu'il peut permettre à tout moment que nous tombions & perdions tout ce que nous auons merit , sans qu'il y ait merite qui le puisse obliger   nous donner ceste perseuerance, ainsi que toute la Theologie & la Foy de l'Eglise l'enseigne contre les Pelagiens. Ce que considerant le Prophete apres auoir dit , In toto corde exquisiui te, il adio te, Ne repellas me   mandatis tuis ; pour monst er qu'il croyoit bien que Dieu pouuoit ne pas auoir  gard   ses merites ; & encor plus clairement qu'ad il dit, Ne prouicias me   facie tua, & Spiritum sanctum tuum ne auferas   me. Et saint Paul nous oblige   trauailler   nostre salut avec crainte & tremblement , pource que c'est Dieu qui opere toutes choses selon son bon plaisir. Ce que la Fille a fort bien imit , quand apres auoir dit , Que

Philip. 2.

Dieu n'ait pas égard à ce que les ames
 meritent, elle adioust, Mais qu'il face
 tout selon luy, representant par ces
 mots le sens & la force de ceux de S.
 Paul, & appellant faire tout selon luy;
 ce que saint Paul a dit, Operer tou-
 tes choses selon son bon plaisir. Il se
 peut donc dire avec verité, & confor-
 mement à la doctrine de l'Eglise & de
 l'Escripture, que Dieu en ceste vie n'a
 point d'égard à ce que les ames meritent,
 puis que, selon saint Paul, il opere
 toutes choses selon son bon plaisir, &
 ainsi laisse tomber quelquefois les plus
 grands Saints, & releue les plus grāds
 pecheurs, tesmoignant par experience
 qu'il fait tout selon luy, sans auoir
 égard ny aux bons ny aux mauuais me-
 rites, comme parlent les saints Peres:
 lequel sens estant celuy des paroles de la
 Fille, elles ne contiennent nulle heresie.

Mais le Censeur renouvellera celle qui est enſeuellie depuis tant de ſiecles, ſ'il continuë deſormais à les reprendre.

E X A M E N.

Si vous ne dites en ceſte propoſition, & en voſtre explication les meſmes paroles de Luther, vous en dites le meſme ſens, & tombez dans la meſme erreur, vous auez beau vous demener. Quel merite ſera-ce ſi Dieu n'y a point d'égard? il n'eſt merite qu'à cauſe que Dieu a voulu y auoir égard; & ſ'il eſt merite, Dieu manqueroit à toutes ſes promeſſes & à luy meſme ſ'il n'y auoit égard: Mais en cela vous dites bien pis que Luther, car Luther oſtant tout le merite, ne met point d'iniuſtice en Dieu, quand Dieu n'y a point d'égard, & ſi faites bien vous, voulant que les

ames meritent, & que Dieu n'y ait point d'égard, ce qui est vne iniustice manifeste, car en bonne iustice tout merite doit estre guerdonné; vous deuriez vous mesme auoir plus d'égard à ce que vous dites: Ce que vous alleguez de la Perseuerance, dont vous faites vostre grand bouclier, est tout à fait hors de propos, car elle ne tombe pas sous le merite; & ce que Dieu permet que quelques-vns qui sont en grace la perdent, & se damnent quelquefois, c'est qu'ils ont perdu leur merite en perdant la grace, & cela par leur faute, & non que Dieu n'ait eu égard à leur merite tandis qu'ils en ont eu. Ce que vous alleguez aussi de saint Paul, Que Dieu fait tout selon son bon plaisir, n'empesche pas qu'il

ne vueille auoir égard aux merites,
 car son bon plaisir est d'y auoir
 égard. Ainsi ce passage ne prouue
 pas ce que vous pretendez (que
 Dieu en ceste vie n'a point égard à
 ce que les ames meritent, tesmoi-
 gnant par experiéce qu'il fait tout
 selon luy, sans auoir égard ny aux
 bons ny aux mauuais merites;) si
 cela n'est conforme à l'heresie de
 Luther, & si ce n'est vne doctrine
 tres-perilleuse & tres-pernicieuse,
 i'auoüe que ie n'y entends rien.



PAROLES DE LA FILLE.

III. PROPOSITION.

Que les ames renoncent au pouvoir d'assujettir Dieu, en ce qu'estant en grace il leur a promis de se donner à elles.

OBIECTION.

De façon que Dieu a mal fait, à ce compte, de nous faire des promesses, puis qu'il vaut mieux y renoncer.

RESPONSE.

On ne dit pas qu'il faut renoncer aux promesses, mais à l'assujettissement qu'il semble qu'elles nous donnent. pouvoir d'imposer à Dieu, car quoy qu'il ait promis aux ames de se donner à elles estant en grace, & que tandis qu'el-

les y sont il ne s'en puisse separer, neantmoins il le peut faire par une autre voye, en permettant qu'elles tombent & perdent la grace, & cela sans iniustice quelconque, par la profondeur incomprehensible de ses iugemens. C'est ce que Dieu veut que nous considerions tousiours au milieu des promesses, des graces, & des faueurs qu'il nous fait en ceste vie, afin de ne nous point esleuer, mais nous tenir dans l'humilité, & dans la soumission necessaire pour les conseruer.


EXAMEN.

Quand on manque au commencement, il est aisé apres d'en tirer de mauuaises suittes; ces nouueaux Spirituels, qui presument estre les seuls qui parlent dignement de Dieu, en parlent si baslement qu'ils en font mal au cœur. Dire ainsi

crûement, & l'entendre de mesme, que les ames ont pouuoir d'assujettir Dieu, choque le sens, donnant pouuoir aux ames sur Dieu, & rendant Dieu assujetty aux ames; assujettissement, qui dans sa signification ordinaire dit inferiorité & dépendance; & pouuoir, qui dit superiorité. Ou il faut s'abstenir de semblables paroles, quand on parle de Dieu, ou si la sterilité des paroles que nous auons, & la limitation de nos esprits nous obligent quelquefois d'en vser, il ne faut pas au moins prendre leur sens dans leur bassesse, mais dans quelque sens adoucy, ou mesme esleué, & rendu ainsi moins indigne de la grandeur de Dieu; comme quand saint Ambroise dit, à l'auantage de la Penitence,

que les larmes lient le Tout-puissant, & vainquent l'invincible ; si eust eu leur esprit il eust conclu comme eux qu'il falloit renoncer à la penitence & aux larmes, de peur de faire vn si grand tort à Dieu que de le lier & le vaincre. Mais il sçauoit, & ils ne sçauent pas, que le plus grand plaisir & le plus grand seruice qu'on puisse faire à Dieu, c'est de le vaincre & le lier ainsi ; & ce pouuoir, pour vser de leur mot, que nous auons, ne disons pas d'assujettir Dieu, il est trop cru, principalement dans leur intelligences : mais ce pouuoir qu'ils veulent dire, n'est-ce pas le pouuoir de la grace, & par consequent le pouuoir de Dieu mesme ? Quel tort fera-t'il donc à Dieu ? ont-ils peur que Dieu se destruisse luy-mesme,

& qu'il employe le pouuoir de sa grace à se faire du mal, & c'est bien estimer & cognoistre le prix & la valeur de la grace, & des choses de Dieu, que d'y renoncer au premier vent de leurs imaginations.



PAROLES DE LA FILLE.

IV. PROPOSITION.

*Q*ue les ames ne fondent point leurs esperances sur ce qu'il a promis, mais demeurent dans une bien-heureuse incertitude.

OBIECTION.

C'est tout le contraire de ce que disent tous les Saints, ie ne sçache doctrine plus dangereuse & plus pleine de presumption que celle-cy. En vertu dequoy desirerez-

vous & espererez-vous en Dieu & au Paradis, si vous renoncez aux promesses de Dieu, aux graces, & aux merites ?

R E S P O N S E.

Il faut bien prendre les choses de trauers pour dire qu'elles sont dangereuses & pleines de presumption, veu qu'elles rabbaissent les ames à un tel point qu'elle les empesche de s'esleuer par les plus grands esleuemens & les plus grandes faueurs qu'elles puissent receuoir de Dieu en ce monde ; si cet Autheur cognoissoit la grandeur de Dieu, & sa bassesse : il ne parleroit pas avec si peu du raison, mais le peu d'intelligence qu'il en a, & la presumption qui le porte nonobstant cela à les examiner, luy font faire ces fautes, qui ruinent les fondemens de toute vertu Chrestienne, sans lesquels il est impossi-

ble qu'il soit humble. Il ne s'agist donc pas icy de renoncer aux promesses & aux graces de Dieu, mais à une trop grande confiance en ses promesses, comme si apres cela nous ne pouuions plus tomber en disgrâce, ce qui est signifié par ceste maniere de parler, Qu'il ne faut pas fonder ses esperances sur ce qu'il a promis de demeurer avec nous, c'est à dire, selon la propriété de nostre langage, qu'il n'y faut pas establir sa fortune & son bon heur, puis que nonobstant tout cela nous pouuons faire naufrage. Bref il paroist manifestement qu'on ne parle que d'une assurance qui exclut l'incertitude en laquelle nous deuons tousiours demeurer, prarce qu'à ceste assurance on oppose l'estat d'une bienheureuse incertitude qui honore l'indépendance de Dieu, pour monstrier que nonobstat ses promesses, on se doit tous-

jours tenir dans la dependance de sa misericorde, avec vne incertitude qui luy rend hommage, en recognoissant qu'il est tousiours independant de nous, & qu'il peut nous traiter comme il luy plaira sans iniustice.

EXAMEN.

C'est bien ceste doctrine, & le Defenseur avec elle, qui ruine & qui sappe les fondemens de toutes les vertus Chrestiennes. Vne des principales, & des Theologales, est l'Esperance, Esperance qui ne confond point, dit saint Paul, & qui n'est fondée que sur les promesses de Dieu, sans lequel fondement elle seroit presomptueuse, vaine, & inutile; & voicy ceste sainte vertu reiettée & traittée comme seroit vn vice, par la vanité & fausseté de leurs pensées. L'esperance

n'est pas opposée, comme ils croient à l'incertitude, mais au desespoir; si bien que pour demeurer dans leur bien-heureuse incertitude il n'est pas nécessaire de perdre l'esperance, elles peuuent bien vivre ensemble, & iamaïs l'esperance ne se trouue sans elle, c'est pourquoy saint Paul l'a bannie du ciel. Mais leur incertitude bien-heureuse seroit bien malheureuse si elle estoit sans esperance, comme ils veulent. Ce qu'il dit qu'on entend qu'il faut renoncer à vne trop grande confiance qu'on peut auoir aux promesses de Dieu, est ridicule, s'ils veulent dire cela, que ne le disent-ils? pour dire qu'il faut éviter les vices qui sont opposez à quelque vertu, faut-il dire qu'on doit renoncer à ceste vertu? pour dire qu'il

qu'il ne faut pas chercher Dieu avec peché & imperfection, faut-il dire qu'on doit renoncer à Dieu, à ses promesses, & à ses graces?



PAROLES DE LA FILLE.

I. PROPOSITION.

14. **I**NCOMMUNICABILITE.
Que Iesus Christ ne s'abbaisse point à des communications disproportionnées à son infinie bonté.

OBIECTION.

Voila pour entierement renverser les desseins infailibles de Dieu, en l'œconomie de l'Incarnation & du sainct Sacrement.

R E S P O N S E.

Cela est ridicule. Car on ne dit pas qu'il ne se rabbaïsse point à des com-


R

municatiōs disproportionnées à sa bonté, comme rapporte le Censeur, mais à des communications disproportionnées à son infinie capacité, c'est à dire, à des communications que les ames ne reçoivent point, mais laissent escouler, & qui par consequent ne trouvent en elles nulle proportion à l'infinie capacité & plénitude de Iesus Christ, lequel elle a à peine de voir rabbaissé en des communications si peu dignes de luy. Or ces communications inefficaces, & qui ne penetrent point dans nos cœurs, ne sont pas la fin principale de l'Incarnation & du saint Sacrement, ny dans les meschans, ny dans les bons, mais celles qui nous donnent la iustice, le salut, & la vie eternelle.

E X A M E N.

Si Iesus Christ ne se rabbaïsse point qu'en des communications

proportionnées à son infinie capacité, il n'aura point de communication avec nous, ny nous avec luy. Il n'en aura point avec les Saints de Paradis, il n'en aura pas mesme avec sa Mere; car elle & tous les Saints sont finis, & il est infiny; & du finy à l'infiny il n'y a point de proportion. Voila les labyrinthes où ils se precipitent, pour penser dire de beaux mots,



PAROLES DE LA FILLE.

II. PROPOSITION.

Q*ue les ames demeurent dans l'indignité qu'elles portent d'une si diuine communication.*

O B I E C T I O N.

Voila bien pour s'auancer à la

perfection ! Dieu exhorte qu'on se rende digne , *Vt ambuletis digne Deo , per omnia placentes , &c.* Et voicy , &c.

R E S P O N S E.

Il se trompe encor une fois ; on ne parle pas des communications qui avancent à la perfection , mais de celles qui en reculent ; car les graces de Dieu que nous rejettons , nous rendant plus indignes , nous esloignent davantage de la perfection ; ce que considerant , elle aimeroit mieux que Dieu laissast les ames dans l'indignité qu'elles portent de ses communications diuines , que de les espandre avec si peu de fruct , & se laisser rebutter si indignement de ses creatures.

E X A M E N.

Pour voir l'impieté de ceste proposition il ne faut que la lire , si en-

cor on la peut lire sans horreur,
 Que les ames demeurent dans l'indignité qu'elles portent d'une si diuine communication, c'est à dire, de la communication de Iesus Christ. On veut donc qu'elles ne sortent pas de leurs pechez, & demeurent tousiours, comme dit vn Apostre, *Vt sus in volutabroluti*: Car ce sont les pechez qui les rendent indignes de ses diuines communications, & pour cela luy mesme a estably le Sacrement de Penitence comme vn lauoir, & comme vne piscine pour les lauer & les faire sortir de ces indignitez, auât que de participer à sa cōmunion, & communication au diuin Sacrement de son corps & de son sang, dont il est icy question. Mais comme on discerne bien mieux les

choses à la veüe & approche de celles qui leur sont opposées, comme le blanc à l'approche du noir, & le noir à l'approche du blanc, ie veux mettre icy le contraire de cette proposition (ce qui se pourroit faire presque en toutes les autres) que les ames facent tout ce qu'elles pourront pour sortir de l'indignité qu'elles portent des communications de Nostre Seigneur, & ie m'asseure que ceux qui auront le iugement bien sain, diront que ie suis en cela plus conforme à luy mesme, quand il nous dit, *Estote sancti, estote perfecti*; Et en tant d'autres lieux où il nous y conuie, & nous en donne les moyens pour nous faire deuenir dignes, non seulement de ses communications, mais de ses vnions. Mais, dit

le Defenseur , on ne parle pas des communications qui auancement à la perfection , mais de celles qui en reculent ; peut-on lire cela avec moins d'horreur ? Donc il y a des graces & des communications de Dieu qui nous rendent plus indignes de luy , & nous reculent de la perfection ; Oüy, dit-il, par exemple , les graces de Dieu que nous rejettons, nous rendant plus indignes , nous esloignent dauantage de la perfection , outre que cet exemple & ceste preuue n'ont aucun rapport à la proposition qu'il defend , ainsi qu'il est aisé à voir par la simple lecture de la proposition, & de la precedēte , dont cellecy est vne suite. Il est encor faux que les graces de Dieu que nous rejettons, nous rendent indignes , &

nous reculent de la perfection. Il peut bien arriuer que les ames, par leur faute, reiettant & abusant des graces & des communications de Dieu, en deuiennent indignes, moins auancées, & moins parfaites: mais c'est alors, non la grace, ains le reiettement de la grace qui leur donne ceste indignité; & de dire que c'est la grace, c'est dire que c'est Dieu, & le faire auteur du peché, puis que lon ne perd point de grace ny de perfection que par le peché; qu'ils voyent à quelles absurditez les emporte ceste belle doctrine, & si, à meilleur tiltre qu'eux, on ne leur peut pas dire, *Quæcumque ignorant, blasphemant.*

PAROLES DE LA FILLE.

III. PROPOSITION.

Q*ue les ames laissent leur estre à Dieu.*

OBIECTION.

Il est impossible que l'ame quitte son estre; & puis que veut-il dire? car l'estre de l'ame est-il pas à Dieu? Faudra-il donc demeurer dás l'inaction, disant que l'estre est à Dieu, & que nous n'avons plus ny estre, ny pouuoir?

RESPONSE.


C'est une honte qu'il ose si souvent reprendre ce qu'il confesse n'entendre point, & qu'il n'entende pas des paroles si claires; car qui a-il de plus facile à entendre que ce que la Fille dit, Que

les ames laissent leur estre à Dieu pour l'honorer, c'est à dire, qu'elles le mettent entre ses mains, & l'abandonnent à sa puissance, afin qu'il en face ce qu'il luy plaira? Que peut-on dire plus simplement & plus clairement? Et qui ne se rira d'oïr dire à ce Theologien qui se mesle de iuger des choses si diuines, que cela est impossible, & qu'ainsi il faudra demeurer dans l'inaction?

EXAMEN.

Ceste proposition, dans le sens qu'elle est dite, n'est pas meilleure que les precedentes, Que les ames laissent leur estre à Dieu, non pas pour recevoir participation du sien, mais pour honorer l'excelence de son incommunicabilité. Comment pouuons-nous honorer Dieu, ny rien qui soit de Dieu, sans aucune participation & com-

munication de Dieu? nous qui ne
ſçaurions auoir, dit ſainct Paul,
vne bonne penſée de nous, com-
me de nous; nous pouuons bien
honorer la nature incommuni-
cable de Dieu, mais pour cela meſ-
me il nous faut communication de
Dieu. Et de ſeparer noſtre eſtre de
route communication de Dieu, &
luy donner, ou luy laiſſer, c'eſt luy
faire vn fort beau preſent, & bien
digne de l'honorer. Car cet eſtre,
ſans celte communication, n'eſt
que malediction & peché.



PAROLES DE LA FILLE.

IV. PROPOSITION.

Q*ue les ames s'estiment heureusement partagées de n'auoir aucune part aux dons de Dieu, pour la ioye qu'ils soyent si grands que nous n'en soyons pas capables.*

OBJECTION.

Voila qui ressent l'impieté, s'estimer heureux de n'auoir aucune part aux dons de Dieu, est-ce vertu de ne vouloir point auoir de vertu ny de grace? 2. Dieu ne se communique point immédiatement, mais par ses graces; que fera donc vne ame qui n'aura ny Dieu, ny ses graces?

R E S P O N S E.

Toutes ces obiections ne prouiennent que de la foiblesse d'un homme, qui, outre son incapacité, a examiné cecy à la volée, ayant l'esprit embarrassé ailleurs. La pensée de la Fille est excellente & diuine, De vouloir que les ames ladiſſent leur eſtre entre les mains de Dieu, non pour receuoir communication du ſien, & pour leur intérêt, ny auſſi pour n'en receuoir pas; mais ſe tenant au milieu, ſans former autre deſſein que d'honnorer ſon incommunicabilité, & avec intention, quand il ne leur communiqueroit rien, de ſ'eſtimer heuſeuſes de voir ſes richesses ſi grandes, qu'elles ne ſoient pas dignes d'y auoir part, & ſe reſioüir de ſon bonheur comme ſi c'eſtoit le leur propre. Cela reſſet l'impicté à ce Cenſeur, mais il reſſent vn degré de la plus pure &

eminente charité, à ceux qui ont goûté plus que luy les effets de l'esprit de Dieu, & les lumieres de la science des Saints.

E X A M E N.

Les Saints n'eurent iamais ce degré de la plus pure & eminente charité, (qui n'est qu'une pure & foible imaginatiõ de leurs esprits) que de s'estimer heureux de n'avoir aucune part aux dõs de Dieu. Les seuls demons, par la haine qu'ils ont de Dieu, trouuent tout leur bon-heur en cela: mais ceux qui aiment Dieu, constituent leur felicité souveraine en ses dons. Disons-leur ce que Nostre Seigneur disoit à la Samaritaine: *Si scires donum Dei*; Si vous cognoissiez les dons de Dieu, vous ne vous estimeriez pas bien-heureux de n'y

auoir aucune part; il faut auoir ou la haine de Dieu, ou part aux dons de Dieu. Ceste pensée de leur grandeur (à cause qu'ils sont si grands) est indigne de leur grandeur, & injurieuse à leur grandeur. Les dons de Dieu, c'est à dire, ses graces, s'agrandissent à mesure que nous les receuons bien, *Abyssus abyssum inuocat*; Vne grace receuë en fait naistre vne plus grande. Sainct Augustin considerant Dieu en ses dons, en ses graces, & communications, disoit: Qu'il valoit autant que nous valons, *Tantum valet quantum tu; te da, & illum habebis.*



PAROLES DE LA FILLE.

I. PROPOSITION.

15. **L**IMITATION. *Qu'il n'importe à Iesus Christ ce qui arriue de tout ce qui est finy; qu'il ruine tout ce qui limite ses desseins.*

OBIECTION.

Cecy est horrible, il a versé tout son sang pour vne ame, & on dit, Qu'il arriue tout ce qui voudra de tout ce qui est finy, que Nostre Dame & tous les Saincts qui sont finis, soient damnez, & que tout cela n'importe à Iesus Christ.

R E S P O N S E.

*A la verité les extrauagances de cet homme sont grandes; la Fille veut que Iesus Christ agisse dans l'estendue
diuine,*

diuine, sans s'arrester à ce qui estant
 finy, limite ses desseins, qu'il ne souf-
 fre point que la creature luy apporte
 d'empeschement, comme il a souffert &
 le souffre en plusieurs occasions impor-
 tantes, où il quitte ses premiers desseins
 pour entrer dans ceux que la creature
 l'oblige de prendre. Ainsi il vouloit que
 l'estat & innocence fust perpetuel, &
 la creature a borné ce dessein à peu de
 temps. Il vouloit que les Anges fussent
 tousiours heureux, & ils ont borné ceste
 volonté à un seul moment. Il vouloit
 que les Iuifs le seruissent sans tant de
 sacrifices sanglans, & ils l'ont contraint
 de leur en donner, en sorte qu'il sen
 plaint souuent par les Prophetes, &
 proteste que ce n'est pas luy qui les a de-
 mandez. Bref, ils ont presque tousiours
 estouffé ses desseins, & ont les a em-
 pchez vne infinité de fois, & les em-

pesche encore tous les iours ; ce qui fait
 que ceste Fille se sent pressée par le zele
 qu'elle a pour luy, & pour sa gloire,
 de desirer qu'il se face valoir, & ne
 permettre plus que ses creatures le bor-
 nent, & luy facent resistance. Quelle
 apparëce donc d'alleguer icy les Saints
 & la Vierge, comme s'ils limitoient les
 desseins de Dieu, au lieu que ses desseins
 sont plainement accomplis en eux, &
 qu'il y opere & regne dans toute l'esten-
 due qu'il desire ; il ne s'agit que des cho-
 ses finies, qui bornent & empeschent
 ses volontez par l'opposiion qu'elles y
 ont ; d'où s'ensuit qu'on ne parle pas des
 ames & des creatures en l'estat qu'il les
 a mises, mais en l'estat où elles se sont
 mises par le peché ; car ce n'est pas la
 l'imitation naturelle des creatures, qui
 borne & arreste les desseins de Dieu,
 puis qu'elle est elle mesme dans le dessein

de Dieu : mais la limitation qui leur est suruenüe par le peché, par lequel elles sont doublement finies & limitées, & plus par luy que par la nature, puis que la limitation qu'elles ont de la nature, ne repugne pas tant à l'illimitation & à l'immensité originelle & souveraine qui est en Dieu, comme en celle du peché; c'est pourquoy quand on desire que toutes choses finies qui limitent les desseins de Dieu soient ruinées, on entend que ce qui limite ses desseins en elle soit ruiné, c'est à dire, l'imperfection & la limitation du peché. En la mesme manière saint Paul dit que le ventre sera ruiné, c'est à dire, la bassesse, & la fonction animale du ventre : Et que le diable sera détruit, c'est à dire, la puissance & le regne du diable. C'est le langage de l'Escriture & de l'Eglise, fort fréquent, lequel ceste Fille, nourrie dans

l'eschole du Sainct Esprit, entend & pratique mieux que ce Theologien, qui semble n'y estre iamais entré.


EXAMEN.

Le Defenseur a beau suer, il ne sçauroit garantir ceste proposition d'impieté, elle a deux parties distinctes; La premiere est, qu'il n'importe à Iesus Christ ce qui arriue de tout ce qui est finy. Quoy qu'il die, il est vray que la Vierge, les Anges, & les Saincts sont finis, mais comme ils sont dans vn estat stable & permanent, ie veux avec luy ne les comprendre pas en ceste proposition, mais vueille-t'il ou non, elle comprend toutes les ames qui sont sur la terre. Hé donc il n'importera à Iesus Christ si elles se sauuent ou non? Et comme ailleurs il veut que Iesus Christ

ne face rien que pour son seul interest, & par ce souhait il n'en aura point dans les ames, puis qu'il ne luy doit importer qu'elles deuiennent; il ne faudra donc plus qu'il en ait aucun soin, ny qu'il leur donne aucune grace, puis qu'il ne luy importe ce qu'elles deuiennent, & qu'il ne doit rien faire que pour luy, & ce qui luy importe. La seconde partie est, qu'il ruine tout ce qui limite ses desseins. Celle-cy encherit sur l'autre. En la premiere il constituë Iesus Christ comme n'agissant pas pour les ames, & seulement sans soin, sans amour, & sans prouidence pour elles. En celle-cy on ne se contente pas qu'il soit sans agir; on luy demande qu'il agisse, mais agisse pour ruiner & pour perdre tout; car il est bien

certain qu'il n'y a point d'ames au monde, pour esleuées qu'elles soiēt dans la grace, qui dans la grace mesme ne limitent les desseins de Nostre Seigneur. Il y en a bien peu, & peu souuent qui reçoient la grace dans toute son estenduë, & il y a grande apparence qu'il n'y en a iamais eu que la Vierge. Il faudra donc qu'il ruine tout le reste, mais pour les pecheurs mesmes, quel souhait est-ce là que Nostre Seigneur les ruine tous? car pour eux ils ne douteront pas qu'ils ne limitent ses desseins, & mesme par empeschement, resistance, & opposition; donc tous les pauures pecheurs seront perdus aussi tost. Si cela eust esté, que seroient deuenus saint Pierre, saint Paul, la Magdelaine, & tant d'autres Saints pe-

nitens qui remplissent le ciel, mais
tous sans en exempter vn. Car,
*Omnes peccauerunt, & egent gloria
Dei.*



PAROLES DE LA FILLE.

II. PROPOSITION.

O Ve les ames ne se tiennent pas
dans leurs pensées, mais se pre-
cipitent dans la vastitude des desseins
de Dieu, renonçant à toutes fins fi-
nies.

OBIECTION.

Que veut dire renoncer à routes
fins finies? Iesus Christ mesme n'y
a pas renoncé; combien de choses
a-il aimé & poursuivy qui estoient
finies?

RESPONSE.

Avec quel iugement peut dire cet homme que Iesus Christ n'a pas renoncé à toutes fins finies, puis qu'il auoie ne ſçauoir ce que c'eſt? Mais avec quelle hardieſſe peut-il parler ainſi de Iesus Christ, & dire qu'il a eu des fins finies, c'eſt à dire, que les choſes finies, & les creatures, ont eſté ſa fin, luy qui publie hautement, qu'il eſt le principe & la fin de toutes choſes. Ce blaſpheme eſt inſupportable, de dire que les creatures ont eſté la fin de Iesus Christ, c'eſt ruiner non ſeulement ſa Diuinité en la bornant, & luy donnant pour fin ce qui eſt finy; mais auſſi ſon humanité, en ſouſtenant qu'elle a eſtably ſa fin dans les creatures, car encor que Iesus Christ en ait aimé quelques vnes, elles n'ont pourtant pas eſté ſa fin, puis qu'il ne les a pas aimées pour elles meſmes,

Apoc. i.

mais pour Dieu, qui seul estoit la fin de son amour, autrement les creatures seroient la fin de Dieu mesme, puis qu'il les a aimées toutes, & les trouue fort bonnes, comme dit l'Escripture. Ainsi Genes. 1. nostre Censeur, pour une faute qu'il veut reprendre, en commet plusieurs tres-grandes & inexcusables. Ce qu'il n'a peu éviter en reprenant une proposition aussi claire qu'excellente, par laquelle l'on desire que les ames renoncent à leurs pensées, & à toutes fins moindres que Dieu, rapportant tout à luy, luy soumettant tout, & s'abandonnant, & precipitant dans l'immensité de ses desseins, afin qu'il les accomplisse sur elles sans empeschement.

EXAMEN.

Ne nous precipitons pas dans leurs vastitudes, où en effet nous trouuerions beaucoup de vastitu-

des & d'espaces imaginaires, dans lesquels il y a plus à s'égarer qu'à y faire rien de solide. Venons à leurs fins finies, où ils s'égarent desia assez pour avoir besoin qu'on les redresse; nous auons desia remarqué qu'à faute des principes de la Philosophie, ils ne trouuent point de fin dans leurs fins, les confondant toutes dans la dernière & générale fin de toutes choses, qui est Dieu. Ainsi, selon leurs beaux esprits, si on demande à vn Maçon pour quelle fin il fait vne maison, il faudra qu'il responde, que c'est pour Dieu: à vn Medecin pourquoy il ordonne vne saignée à vn malade, ce sera encor pour Dieu; voila pour deuenir bien sçauant des fins & des objets de toutes choses. Chaque art, chaque science, mais

chaque chose, & chaque action a sa fin particuliere & finie, & mesme, en bonne ratiocination, toutes ces fins particulieres s'appellent les fins principales de chaque chose; ainsi si lon demande la fin principale de la Medecine, on dira que c'est la guarison, & la santé du corps humain; la fin de la Physique, de cognoistre les choses naturelles; & toutes ces fins particulieres sont bonnes quand elles sont subordonnées, & referées à la dernière fin, qui est Dieu; mauuaises quand elles ne le sont pas ou actuellement, ou virtuellement. Ainsi Nostre Seigneur a eu des fins particulieres & finies, non seulement au total de sa vie, & de son Incarnation, mais encor pour ses actiōs en particulier. Si lon demande à

quelle fin il alla au puits de Samarie, ie respondray fort bien si ie dis que ce fut pour sauuer & pour conuertir la Samaritaine. Et si lon demande à l'Eglise pour quelle fin il s'est incarné & s'est fait homme, elle ne fera pas si delicate qu'eux, & respondra, *Propternos homines, & propter nostram salutem*. Et ces fins sont des fins finies, qui ne laissent pas d'estre fins, encores qu'elles se referent à Dieu, qui est la fin dernière, comme il ne laisse pas d'y auoir plusieurs causes particulieres, bien que Dieu soit la generale. Mais si le Defenseur eust eu bõne memoire, ou qu'il fust moins hors de luy mesme, pour vouloir tout defendre à tort & à trauers, il se fust souuenu qu'il nous venoit de dire, que Iesus Christ s'est donné

des loix & des fins à luy mesme,
ausquelles il ne veut pas qu'il soit
assujetty. Si Iesus Christ a eu des
fins auxquelles neantmoins il n'ait
pas esté obligé de s'assujettir, ces
fins ont donc esté autre chose que
Dieu, & ont esté finies; & s'il en a
eu de finies, nous en pouuons
auoir. Ce n'est donc pas bien dit,
Qu'il faut renoncer à toutes fins
finies, si lon n'y adioust, Qui ne
se referent à Dieu. Mais adjoutant
cela, on parleroit comme les autres
parlent, & on veut parler autre-
ment, & dire mots nouveaux.

PAROLES DE LA FILLE.

III. PROPOSITION.

Que Iesus Christ enferme tout en soy.

OBIECTION.

Cela est impossible. 2. Quel sens fait cela? 3. Comment peut-il renfermer les reprouvez en soy? & les iustes mesmes comment est-ce qu'il les renferme en soy?

R E S P O N S E.

Voila de grands excès contre une proposition si sainte, & si commune dans le langage des Chrestiens, quoy que ce grand Theologien confesse, encor qu'il ne l'entend pas, cependant saint Paul a parlé ainsi, lors qu'il a dit, Que de toute eternité le dessein du Pere a

esté de recueillir toutes choses dans Iesus
 Christ, tant celles du Ciel que de la
 terre. Les saints Peres l'ont ainsi en-
 tendu, & nommément saint Chry-
 sostome. Ainsi a parlé le mesme S. Paul
 quand il a dit ailleurs, qu'il est par-
 dessus tous, & que toutes choses subsi-
 stent en luy, & que le Pere a voulu
 qu'en luy habite toute plenitude. Ainsi
 a parlé saint Iean dans l'Apocalypse,
 quand il a dit, Qu'il est le commence-
 ment & la fin, c'est à dire, qu'il enfer-
 me en soy toutes choses, puis qu'il les
 borne des deux costez. Ainsi l'a enten-
 du saint Hierosme, & les autres
 Saints communément. Que veut donc
 dire ce Theologien, de n'entendre pas
 une façon de parler si celebre, & si or-
 dinaire parmy les Chrestiens, & de la
 condamner comme impossible? Et com-
 me ose-il dire que Iesus Chr. n'enferme

Ephes. i.

Collos.

Ibid.

pas en soy les iustes mesmes, puis que, selon toute l'Escripture, & les saincts Peres, ils sont les membres de son corps, unis à luy plus estroitement que ceux du corps humain, puis que ceux-cy ne le sont que par l'ame humaine, de qui la vertu d'unir est finie; au lieu que les membres du corps de Iesus Christ, sont conjoincts par l'esprit mesme de Iesus Christ, qui a une force d'unir, sans comparaison, plus grande & infinie, & qui est l'unité mesme, & le lien des personnes de la sainte Trinité. D'ailleurs que deuiendront tant de passages de l'Escripture, qui disent que nous sommes reuestus de Iesus Christ, que nous sommes dans luy, que nous viuons dans luy, que nous deuons tousiours demeurer dans luy, & que mesme toute l'Eglise est un Iesus Christ, si on ne peut pas dire que les iustes sont enfermez dans

Gal. 3.

Rom. 8. v. 1.

Ephes. 2.

Ioan. 15.

Gal. 3. v. 18.


dans luy. Mais que dira-on à ce que S. 1. Cor. 12.
 Paul a parlé ainsi, quand il a dit que Ephes. 2.
 Iesus Christ cache & renferme en soy v. 15.
 les deux peuples? Finalement comment Coloss. 2.
 sera-il infiny & immense, & comment
 toute la plénitude de la Diuinité habi-
 tera-elle en luy corporellement, comme
 dit saint Paul, s'il n'enferme pas en
 soy non seulement les reprouuez, mais
 non pas mesme les esleus? Il ne se peut
 rien adiouster à cet excès. Ce sont les
 vœux continuels des Saints d'estre
 dans luy, & se perdre mesme dans luy.
 Et quoy que les reprouuez soient infi-
 niment separez de luy par le peché, ils
 sont toutesfois inseparablement enfer-
 mez dans luy par leur nature, & par
 tout le vray estre qu'ils ont, puis qu'il
 est Dieu, & que saint Paul parlant
 aux Payens remplis de pechés, leur di-
 soit: Que nous viuons, que nous mou- Act. 17.

uons, & que nous subsistons dans
luy.

E X A M E N.

Il est vray que Dieu, comme
Dieu, enferme tout en soy; encor
faut-il sçauoir qu'on ne peut vser
en cela de ce mot, enfermer, que
par métaphore, & improprement;
mais comme cela est nécessaire-
ment, & ne peut qu'il ne soit, il est
ridicule de le souhaitter. Or nous
auons desia fait voir que quand on
parle de Iesus Christ, il en faut par-
ler d'une autre façon que quand
on parle simplement de Dieu, au-
trement les Vbiquitaires gagne-
roient leur procez, & se sauueroiẽt
aisément par les gloses de nostre
Defenseur, & tous les passages qu'il
prend beaucoup de peine d'alle-
guer, ne s'entendent pas de la sorte,

mais s'entendent d'une sorte de grace & de puissance acquise par le moyen de l'Incarnation , & de la Redemption , qui le rendét le chef de l'Eglise, & en la grace & en la gloire ; mais de vouloir qu'il le soit tout de mesme de tout , & sans distinction y mettre les damnez & les demons , c'est faire une estrange union ; au lieu que Nostre Seigneur les separe tousiours. Il dit aux vns, pour les vnir à soy, *Venite benedicti* ; & aux autres , pour les en separer, *Ite maledicti* ; est-ce là les enfermer en soy ? c'est plustost les en faire sortir.



PAROLES DE LA FILLE.

I. PROPOSITION.

16. **I**N APPLICATION. *Que Iesus Christ ne donne point dans luy d'estre aux neants.*

O B I E C T I O N.

Je ne sçay s'il y a vn Theologien dans Paris qui puisse donner vn bon sens à ces paroles, & quand cela seroit, des filles en sont elles capables?

R E S P O N S E.

Il oppose tousiours ses ignorances pour raisons, il n'est pas question de sçauoir si des filles entendent ces paroles, qui n'ont point esté dites pour elles, mais si celle qui les a escrites les a entendues, & non pas mesme si elle les a entendues;

mais si Dieu, qui les a dites par elle, y a enfermé un bon sens, & s'il peut estre apperceu par des Theologiens qui les considerent avec moins de passion que luy. Mais quelle difficulté y a-il, puis que la Fille s'explique assez clairement par toute la suite de son discours, & mesme par les paroles precedentes, où elle dit que Iesus Christ s'occupe de luy mesme, & qu'il ne donne point dans luy d'estre au neant, montrât qu'elle parle de l'estre que les choses ont dans l'esprit qui s'occupe en elles, & qu'elle veut que Iesus Christ ne donne point d'entrée en son esprit aux creatures pour s'y occuper, n'est-ce pas une maniere de parler fort commune, & conforme aux maximes des Philosophes mesmes, qui disent que l'entendement attire à soy, & fait subsister dans soy les objets où il s'occupe; au lieu que

la volonté sort d'elle mesme pour subsister dans ce qu'elle aime? Ainsi ce langage est très-facile, non seulement aux Theologiens, mais aussi aux Philosophes qui entendent les premiers principes de leur mestier, quoy qu'il soit inconnu à ceux qui ne sçavent ny l'un ny l'autre, & passent leur vie en d'autres occupations.

E X A M E N.

En la derniere proposition on demandoit que Iesus Christ enfermast tout en soy, & en celle-cy, qu'il ne donne point en luy d'estre aux neants, & ces neants sont les creatures. Voila qui s'accorde merveilleusement bien, tout sera en Iesus Christ, & rien n'y sera; il enfermera tout en soy, mais ce tout ne sera rien du tout: car ce qui n'a point d'estre n'est rien, & si les cho-

ses sont en Iesus Christ sans aucun
 estre, elles n'y seront rien, si elles ne
 sont rien, elles ne seront pas en luy,
 ainsi elles y seront & n'y seront
 pas; ou elles y seront par l'estre
 qu'elles ont d'elles mesmes, & non
 par aucun estre que Iesus Christ
 leur donnera. Or cet estre qu'elles
 ont d'elles mesmes, par la doctrine
 mesme du Defenseur, n'est autre
 chose que peché. Ainsi si Iesus
 Christ ne leur donne point d'estre
 en luy, ou elles y seront par le pe-
 ché, & dans l'estre du peché, ou
 elles n'y seront point du tout; & si
 elles n'y sont point, comme en-
 fermerait-il tout en soy? Mais c'est
 de l'estre que les choses ont dans
 l'esprit, dit le Defenseur; voila
 vne explication bien tirée par les
 cheueux. Mais quand ce seroit le

sens de la proposition, elle n'est pas meilleure, car c'est à dire en bon François, que Iesus Christ ne pense point en nous, comme il est expliqué apres plus clairement. O la belle pensée, & la belle spiritualité ! les impies, & ceux qui le haïssent, en demanderoient bien autant, qu'il ne pensast iamais à eux, comme ils ne veulēt pas penser à luy. Ces beaux contemplatifs qui accusent les autres d'auoir trop d'occupations, en ont trop peu, ou en prennent trop peu ; & s'ils en auoient dauantage, peut estre ils n'auoient pas tant de chimeres en leurs esprits.

PAROLES DE LA FILLE.

II. PROPOSITION.

Qu'il n'ait égard à rien qui se passe hors de luy,

O B I E C T I O N.

Cela sent l'impiété, & ce desir est horrible, de desirer que Iesus Christ ne se soucie qui se sauue, qui se damne, ny de rien qui soit au monde.

R E S P O N S E.

Il blasphème tousiours ce qu'il ignore; elle ne desire point que Iesus Christ ne se soucie qui se sauue, ou qui se damne, mais qu'il soit tousiours occupé dans luy mesme, en sorte qu'il n'ait égard à rien qui se passe hors de luy, c'est à dire, qu'il ne considere rien hors de luy, mais

qu'il considere tout en luy mesme, & demeure en toutes ses pensées & ses regards dans l'application à son essence, & non à l'estre propre des creatures; car elle iuge indigne de Dieu qu'il voye rien selon ce qu'il est hors de luy, & veut que son objet soit tousiours son essence. En ce sens elle ne veut pas qu'il donne dans luy d'estre aux neants, c'est à dire, qu'il admette dans sa pensée les creatures selon l'estre & le neant qu'elles ont hors de luy, mais selon l'estre infiny qu'elles ont dans son essence. Ainsi elle reiette la doctrine de ceux qui tiennent qu'il ne cognoist pas nos actiōs dans luy, mais hors de luy dans nous mesmes, car elle veut qu'il cognoisse tout dans ses volontez, & dans sa propre essence, sans s'appliquer qu'à elle, & sans porter sa veüe sur autre objet, estimant le contraire deshonorabile à Dieu; comme

sainct Augustin tient qu'on ne le peut dire sans sacrilege. Elle veut donc dire qu'il voye toutes ces choses, mais qu'il les voye dans son essence, & sous elle, puis que comme elles sont dans luy beaucoup mieux qu'en elles mesmes, il les cognoist aussi beaucoup mieux dans son essence que dans la leur: car Dieu & la creature s'entrerepresentant comme deux miroirs; on voit Dieu dans la creature, & la creature dans Dieu, mais avec ceste differēce, que l'un de ses miroirs est de beaucoup plus excellent que son obiet, au lieu que l'obiet est de beaucoup plus excellent que l'autre. Car la creature est un miroir de Dieu fort obscur & imparfait, qui forme une image qui est infiniment au dessous de luy: mais Dieu est un miroir tres-clair & tres parfait de la creature, & en forme une representation qui est in-

S. August.
l. 8. 3. quæst.
946.

finiment au dessus d'elle, puis qu'elle est aussi excellente que Dieu mesme; & c'est dans ceste image eminente, & digne de l'esprit de Dieu, que la Fille veut qu'il voye les ames, & tout ce qu'elles sont, & non dans la forme basse & infiniment estoignée de l'excellence de Dieu qu'elles ont en elles mesmes.

EXAMEN.

Ceste proposition oste tout d'un coup le soin, l'amour, & la prouidence de Dieu sur ses creatures. Car auoir égard, ne dit pas seulement voir, ou regarder, mais encor se soucier, & cela par la mesme raison de ceux qui parmy les Payens ont d'autres fois combattu la mesme prouidence, disant qu'il estoit indigne de la grandeur de Dieu, d'abaisser ses pensées, ses

regards, & ses soins à tant de viles
 creatures qu'il y a dans le monde.
 Mais le Defenseur nous apporte
 son, c'est à dire, & dit que c'est
 qu'on ne veut pas que Iesus Christ
 admette en sa pensée les creatures,
 selon l'estre & le neant qu'elles ont
 hors de luy. Pour rendre là l'estre
 & le neant sinonimes, & vne mes-
 mesme chose, c'est peu à la subti-
 lité de son esprit. Mais si les crea-
 tures ne sont point en Iesus Christ
 par l'estre qu'elles ont hors de luy,
 & en luy, il ne leur en doit point
 donner; quel estre y auront-elles?
 mais c'est à dire, encor (dit-il) que
 Iesus Christ ne considere rien hors
 de luy, mais considere tout en luy
 mesme, & pense auoir trouué vne
 grande subtilité, pour expliquer
 vne chose qui ne peut s'expliquer.

Il y a eu cōtention entre les Theologiens Scholastiques, pluſtoſt, à mon aduis, pour les mots que pour le ſens. Sainct Thomas ſemble dire que Dieu ne voit les choſes qu'en luy meſme, & non en elles; & le Scot au contraire, & qu'il les voit en ſoy, & qu'il les voit en elles. Pour les accorder on explique, qu'il eſt vray que Dieu voit les choſes & en luy & en elles, mais qu'il ne les voit pas par elles, ains par ſa propre eſſence, c'eſt à dire, que les choſes ne peuuent eſtre, ny produire vne eſpece, ou vn moyen de ſoy qui ſoit proportionné à Dieu, & que c'eſt tout ce que S. Thomas a voulu dire, & ſainct Auguſtin auant luy. Mais quoy que ſainct Thomas ait dit, il n'a pas dit que Dieu ne voyoit rien,

ou ne deuoit rien voir de ce qui se
 passe hors de luy, comme veut la
 proposition, & qui est vn blasphem-
 me : car tous sont constamment
 d'accord, qu'il n'y a rien qui se pas-
 se hors de Dieu que Dieu ne voye,
 ne regarde, & ne considere. Et de
 telles espines de la Theologie, des
 filles en pouuoient-elles cueillir
 des fleurs sans se piquer ? mais quãd
 il seroit vray que Dieu ne veist les
 choses qu'en soy mesme, & non
 en elles, seroit-il vray de I. Christ ?
 & se pourroit-il dire sans erreur &
 sans fausseté ? A quel propos donc
 expliquer les propositions qui sont
 de luy, & pour luy au sainct Sacre-
 ment, par des choses qui sont de la
 seule essence diuine, & encor mal
 entendues ?



PAROLES DE LA FILLE.

III. PROPOSITION.

Q*ue les ames ne se presentent pas à Iesus Christ, pour obiet de son application, mais plustost pour estre rebutées par la preference qu'il doit à soy.*

OBIECTION.

Cela est heretique, comme si Iesus Christ qui est Dieu, n'estoit pas capable de s'appliquer à soy & aux creatures, mais qu'il en faille quitter l'un pour s'appliquer à l'autre? 2. Quel desir horrible de vouloir estre objet du rebut de Iesus Christ?

RESPONSE.

*Ces exclamations sont maintenant
ridicules,*

ridicules, & il paroist assez qu'elles ne procedent que de ce que nostre Censeur ne voit goutte dans les discours sublimes de ceste Fille. Elle ne veut pas que les ames se presentent à Iesus Christ comme l'objet de son application, & pour estre considerées de luy en elles mesmes, mais qu'elles soient rebutées, si elles se presentent en ceste maniere, parce que cela n'est deu qu'à son essence, à laquelle seule il est tousiours appliqué lors qu'il les regarde. Il semble qu'elle a fait mention de ce rebut, comme si Dieu eust voulu tesmoigner par elle l'auersion qu'il a des maximes de ceux qui pretendent que leurs ames, & celles des autres, se peuuent presenter ainsi à luy, afin qu'il s'y applique, & les regarde hors de son essence. Car Dieu monstre par elle qu'il reiette bien loin ceste pretention, & ne peut souffrir qu'elle face


si grand tort à son essence, que de vouloir prendre sa place, comme les premières creatures qui se sont souleuées contre luy. Ainsi il est hors de raison de dire qu'elle a creu que Iesus Christ ne pouuoit s'appliquer à soy & aux creatures, puis que, selon elle, il ne s'applique iamais aux creatures, mais à son essence seule, dans laquelle, & par laquelle il les voit en Dieu d'une veüe infiniment separée & esleuée au dessus d'elles, & sans auoir besoin d'entendre ses regards hors de luy mesme.

EXAMEN.

Si ces nouueaux Spirituels scauoient que c'est que d'estre rebutez de Dieu, ils ne seroient pas si prompts à vouloir l'estre: mais comme tous leurs actes interieurs ne sont que des actes en l'air, sans substance, sans effet, ou mal appli-

quez, ils ne leur coustent rien. Ie-
sus Chr. luy mesme sentit quelque
effet de ce rebut, mais non encor
pour la grace, & cela le toucha
plus viuement & plus sensible-
ment que les clous, que les fouiets,
& les autres tourmens de sa Pas-
sion; car demeurant muet à tout le
reste, comme vn agneau quand on
le tond, dit le Prophete, il s'escrie
& se plaint de ce reiettement de
Dieu, avec tant d'effort & tant de
violence, qu'il est croyable que cela
luy causa la mort plustost qu'il ne
deuoit mourir, & que ce rebut plus
tost que la croix mesme le fit
mourir, & osta la vie à vn Dieu.
Et nos Spirituels s'offrent aussi fa-
cilement à estre rebutez de Dieu,
& à estre damnez, qu'ils boiroient
vne goutte d'eau. Quel mespris du

tourroux de Dieu, qu'elle temerité, & quelle impiété? Et le pretexte en est fort beau, & fort solide, de peur que Dieu ne se destourne de luy mesme, & ne perde la veuë de luy mesme en regardât ailleurs. Peut-on imaginer rien de plus ridicule & de plus ignorant.



PAROLES DE LA FILLE.

IV. PROPOSITION.

Que les ames se donnent à l'application de Iesus Christ, aimant mieux estre exposées à son oubly, qu'estant en son souuenir luy donner suiet de sortir de l'application de soy mesme pour s'appliquer aux creatures.

OBIECTION.

Voila qui est bien blasphéma-

toire, comme si Dieu ne pouuoit
 penser à foy & aux creatures, com-
 me si Iesus Christ, pensant aux
 hommes, s'oublioit foy mesme !
 Que veut dire l'ame se donner à
 l'inapplication ? Tous les Saincts
 desirerent que Dieu les regarde &
 pense à eux, & Dieu ordōne qu'on
 parle ainsi, & toute la Bible en est
 pleine. Quelle temerité & info-
 lence d'aymer le contraire ?

R E S P O N S E.

*Ces blasphemes, ces insolences, ces
 temeritez ne sont que dans les tenebres
 de cet homme, qui l'emportent avec tant
 de chaleur, contre des choses qu'il n'est
 pas capable d'entendre. La Fille parle
 consequemment dans sa pensée diuine,
 elle aime mieux estre exposée à l'oubly
 de Iesus Christ, que d'estre considerée
 de luy hors de l'application à son essence,*

de laquelle application le tirēt ceux qui
maintiennent qu'il regarde la vie &
les actions des hommes, non dans soy,
mais dans eux; non dans la plénitude
de ce qu'il est, mais dans le neant de ce
qu'ils sont, & dans ces regards là, l'ap-
pliquēt au neant, & rien à la source de
tout estre. Ce qui est une iniure envers
luy, quelle iuge si grande, quelle ai-
meroit mieux n'estre point du tout dans
son esprit, que d'y estre d'une maniere si
disproportionnée à l'eminence de Dieu,
& à sa bassesse, & de voir qu'il fust
deshonoré par la pensée qu'il auroit
d'elle. Elle adore ceste inapplication, cest
à dire, ce destachement & cet esloigne-
ment que son esprit a des creatures, &
ceste perpetuelle application à son essen-
ce, qui luy fournit infiniment plus d'ob-
iets, & d'une façon infiniment plus
eminente que les creatures ne luy en

ſçauroient preſenter. Elle ſe ſoumet à
ceſte inapplication, elle ſe donne à elle,
c'eſt à dire, à Dieu meſme, qui n'eſt point
different de cet attribut, & de ceſte ex-
cellence de ſa nature, afin de luy rendre
touſiours hommage dans les veües qu'il
aura d'elle, & n'eſtre point du tout re-
gardée de luy, ou de l'eſtre en ceſte ma-
niere infinie & diuine.

EXAMEN.

Je ne ſçay ce qu'on doit blaſmer
dauantage, ou ces doctrines erro-
nées, ou l'aſſurance de ceux qui
les defendent, avec autant de har-
dieſſe que ſils defendoient les plus
belles choſes du monde. Je vou-
drois bien qu'ils me trouuaſſent vn
Saint, ou ſeulement vn homme
de bon ſens, qui depuis que le
monde eſt monde, ſe ſoit donné à
l'inapplication de Dieu, ou de le-

fus Christ. Il y a en cela deux fau-
 tes bien enormes, l'une de vouloir
 que Nostre Seigneur nous oublie,
 & qu'il ne pense pas à nous, (ce
 que j'ay desia dit estre le souhait
 des demons,) & sans penser à nous,
 & s'appliquer à nos besoins, com-
 ment fera-t'il nostre Aduocat? Car
 saint Paul dit qu'il l'est, mais com-
 me Iuge mesme, & comme Re-
 dempteur, il s'y doit appliquer.
 L'autre luy est iniurieuse, & indi-
 gne de la pensée d'un Chrestien,
 qu'il ne puisse regarder en deux
 lieux, ny s'appliquer à nous, sans
 se desappliquer de soy mesme, se
 souuenir de nous, sans s'oublier
 soy mesme. Personne eust-il ia-
 mais des pensées de Iesus Christ si
 foibles, si basses, & si indignes? &
 cependant on defend tout cela, &

la prefomption humaine aime
mieux entasser erreurs sur erreurs,
que d'en recognoistre vne seule.

Voila, Monsieur, vne brieue
discussion de la doctrine & defen-
se du Chappelet: le temps, le lieu,
& les empeschemens ne m'ont pas
permis de la faire plus longue; Elle
l'est neantmoins assez, à mon ad-
uis, pour vous faire voir les erreurs
& dangers de ceste doctrine, &
vous faire iuger si vn ordre nou-
veau doit estre estably là des-
sus. Vous ne verrez en tout ce
Chappelet ny humilité, ny vertu,
ny priere; mais vanité, esleuation,
& mespris de tout ce que l'Eglise &
les Saincts ont iamais pratiqué.
Vous ne verrez pas aussi qu'on y
parle, ny qu'on vueille considerer

l'amour de Dieu sur nous, ny ses bontez, ny ses misericordes; mais seulement par vn faux pretexte de desgagement de soy mesme, & par vne imagination presomptueuse, d'auoir l'amour de Dieu en souverain degre, sans interest, & sans pretension, luy faire des souhaits plus iniurieux qu'honorables, comme s'il estoit en besoin, en manquement, & en necessite, & que nous ne le fussions pas, non pas seulement de son amour & de sa grace. Tout cela vous fera, ie m'asseure, estonner, & qu'il soit fait, & qu'il soit protegé; mais ressouvenez-vous qu'il n'y a iamais eu opinion ny doctrine de Dieu, & de deuotion, pour extrauagante qu'elle ait peü estre, qui n'ait trouué ses sectateurs & defenseurs. Et puis la


nouueauté a ses attraits & ses ap-
 pas, comme les nouueaux fruiçts,
 maiselle & eux ont de grands acci-
 dens & inconueniens, que les plus
 auisez sçauent tousiours preuoir.
 Vous estes de ce nombre, c'est ce
 qui me fait croire que vous de-
 meurerez tousiours dans les saines
 & solides maximes de la deuotion
 & de la pieté. Je prie Nostre Sei-
 gneur vous en faire la grace, &
 suis,

MONSIEVR,



Vostre tres-humble seruiteur.





5-3-6-2

